



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



CANTONALE ET

BIBLIOTHÈQUE

EX
DONO

JEAN
HERBETTE

ancien ambassadeur

1878-1960

UNIVERSITAIRE

DE LAUSANNE

1972




$$A 14858 = -13a$$

3—

17250







Marillier del.

De Longueil sculp.

Voicy la SAGESSE descendue du Ciel.

DE
IMITATIONE
CHRISTI
LIBRI QUATUOR,

Ad germanam lectionem reduci, juxta
editionem Rosweydianam, ad fidem
Autographi anni M. CCCC. XLI
recensitam.

Hac meditare, in his esto. I. Timoth. jv. 15.

Edidit NIC. BEAUZÉE, unus ex Academia
gallicæ Quadragintaviris; ex florentinâ
fursurorum Academiâ; regiarum Acade-
miarum rothomagensis, metensis, & atre-
batensis albo inscriptus; emeritus Scholæ
regio-militaris Professor; & Serenissimo
Principi, ATREBATENSII COMITI,
CHRISTIANISSIMI REGIS fratri,
à secretis Interpres.

AZ 5318



PARISIIS,
BIBLIOTHECA REGIA

Typis BARBONÆ & MATTHIENSIUM,

M DCC LXXXIX.

51436



P R Æ F A T I O.

MULTIFARIAM multisque modis olim Deus loquens patribus in prophetis, novissimè.... loquutus est nobis in filio (Hebr. j, 1, 2): sed & etiamnum nobis loquitur in Sanctis quos identidem in Ecclesiâ suscitât. Hos inter omni procul dubio annumerandus est auctor, quisquis fuerit, quatuor librorum qui sub nomine *IMITATIONIS CHRISTI* circumferuntur; & nemo est profectò sanus qui libros illos, sinceram undique pietatem & divini Spiritûs afflatum redolentes, eâdem ferè quâ sacros codices aut proximâ saltem reverentiâ non prosequatur & prosequi non debeat.

Ea in illos mens fuit sancti Pontificis Pii V, sancti Caroli Borromæi, sancti Philippi Neri, sancti Ignatii Loyolæ, sancti Francisci Salesii; ea mens virorum omnium his tribus sæculis pietate & doctrinâ

conspicuum ; ea mens *Fontanelli* nostri , qui longè ante cæteros optimum esse scripsit hunc humanæ sapientiæ fetum , quum hujus opus non sit Evangelium . Quid , quod rex quidam Mauritaniae libros eosdem in vulgarem turcarum linguam converti jussit , in bibliothecâ suâ religiosè servavit , omnibusque mahumetanorum libris semper antetulit ?

Attamen vulgatarum ubiquè venerandi hujus operis editionum formam his diebus nostris ausus est immutare *Josephus Valart*. Singularem scilicet & nemini huc usque cognitam capitum dispositionem excogitavit ; capitum inscriptiones & sectiones à receptis alienas passim finxit ; lacunas , ubi nihil desiderat sensus , ubi omnia plena sunt & integra ; somniavit ; novas dialogorum personas induxit : maximè autem in eo est censoria grammaticæ virgula , ut voces ac loquutiones Augusti ævo inauditas corrigat , solœcismos emendet , verba elegan-

P R Æ F A T I O. v

tiarum nomine ad arbitrium invertat ; & auctoris idiotismos procul amoveat. Indé exstitit editio à primigeniâ operis confectione omninò absona , & foedum in modum depravata potius quam utiliter emendata.

Nobis vero manent altâ mente reposita hæc salutaria pii auctoris nostri monita (*I. v. 1, 2*) : *Ita libenter devotos & simplices libros legere debemus , sicut altos & profundos. Non te offendat auctoritas scribentis , utrum parvæ vel magnæ litteraturæ fuerit ; sed amor puræ veritatis te trahat ad legendum. . . . Sine personarum acceptione variis modis loquitur nobis Deus. . . . Si vis profectum haurire : lege humiliter , simpliciter , & fideliter ; nec unquam velis habere nomen scientiæ. . . . Audi tacens verba Sanctorum.*


Novam hanc igitur librorum *de Imitatione CHRISTI* editionem piis lectoribus offerimus , Rosweydiænæ ad fidem Autographi anni 1441 recensitæ consonam , ne

viii *P R Æ F A T I O.*

Hæc parum perpendisse videtur *Jos. Valart*, quum genuinam pii auctoris orationem emendare aggressus est. At quæ erat præjudicata ejus de vero auctore opinio, libros *de Imitatione CHRISTI* non emendare non poterat; quomodo enim teutonismos tulisset in opere, quod *Joann. Gersen* italo adscribebat & *Th. à Kempis* teutoni abnuebat?

Cæterum, litem istam hîc rursus movere non est operæ pretium; quia, ut monet auctor ipse (*III. xlv, 1.*), *utilius est à rebus displicentibus avertere & unicuique suum sentire relinquere, quam contentiosis sermonibus deservire.* Si quis tamen certam hæc de re opinionem velit adipisci, legat in primis *Rosweydi Vindicias kempenses*, quæ viros ejus ætatis doctissimos simul & à Thomâ kempensi alienissimos ad ipsum reduxerunt; legat *Dissertationem de auctore libri cui titulus DE IMITATIONE CHRISTI*, gallicè scriptam & Parisiis editam anno 1775; legat & supræ

laudatam *Fr. Jos. Desbillons Disputationem*, quæ exstat in capite editionis librorum *DE IMITATIONE CHRISTI* datæ Manhemii anno 1780: his duabus postremis omnia contradictorum, & speciatim recentioris *Jos. Valart*, argumenta enucleatè perpenduntur ac sophismata potenter refelluntur. Unum tamen cum pio auctore monitum velimus: *Non quæras quis hoc dixerit, sed quid dicatur ostende* (I. v, 1.)



xij ORATIO UNIVERSALIS.

propensiones, excolam idoneas virtutes.

Tribue mihi, bone Deus, amorem tui, odium mei, zelum proximi, contemptum sæculi.

Studeam Superioribus obedire, Inferioribus subvenire, amicis consulere, inimicis parcere.

Vincam voluptatem austeritate, avaritiam largitate, iracundiam lenitate, tepiditatem fervore.

Redde me prudentem in consiliis, constantem in periculis, patientem in adversis, humilem in prosperis.


Fac, Domine, ut sim in oratione attentus, in epulo sobrius, in munere sedulus, in proposito firmus.

Curem habere innocentiam interiorem, modestiam exteriorem, conversationem exemplarem, vitam regularem.

Affiduè invigilem naturæ domandæ, gratiæ fovendæ, legi servandæ, saluti acquirendæ.

Difcam à te quam tenue sit quod terrenum est, quam grande quod divinum, quam breve quod temporaneum, quam durabile quod æternum.

Da ut mortem præveniam, iudicium pertimeam, infernum effugiam, paradisum obtineam. Amen.





Morillet del.

De Longuel Sculp.

Prédication de JESUS - CHRIST sur la Montagne.



DE
IMITATIONE
CHRISTI.

LIBER PRIMUS.

Monitiones ad spiritualem vitam utiles.

CAPUT I.

*De Imitatione CHRISTI, & contemptu
omnium vanitatum mundi.*

1. **Q**UI sequitur me non ambulat in tenebris
(Joan. viij, 12). Hæc sunt verba CHRISTI,
quibus admonemur quatenus vitam ejus &
mores imitemur, si volumus veraciter illu-
minari & ab omni cæcitate cordis liberari.
Summum igitur studium nostrum fit in vitâ
JESU-CHRISTI meditari.



CAPUT II.

De humili sentire sui ipsius.

1. OMNIS homo naturaliter scire desiderat; sed scientia sine timore Dei quid importat? Melior est profectò humilis rusticus qui Deo servit, quam superbus philosophus qui, se neglecto, cursum cœli considerat. Qui bene se ipsum cognoscit, sibi ipsi vilescit nec laudibus delectatur humanis. Si scirem omnia quæ in mundo sunt, & non essem in caritate; quid me juvaret coram Deo, qui me judicaturus est ex facto?

2. Quiesce à nimio sciendi desiderio, quia magna ibi invenitur distractio & deceptio. Scientes libenter volunt videri & Sapientes dici. Multa sunt, quæ scire, parum vel nihil animæ prosunt. Et valde insipiens est, qui aliquibus intendit quam his quæ salutis suæ deserviunt. Multa verba non satisfiunt animam; sed bona vita refrigerat mentem, & pura conscientia magnam ad Deum præstat confidentiam.

3. Quanto r'us & melius scis , tanto gravius inde judicaberis , nisi sanctius vixeris. Noli ergo extolli de ullâ arte vel scientiâ , sed potius time de datâ tibi notitiâ. Si tibi videtur quod multa scis & satis bene intelligis , scito tamen quia sunt multo plura quæ nescis. *Noli altum sapere* (Rom. xj, 20) : sed ignorantiam tuam magis fatere. Quid te vis alicui præferre , quum plures doctiores te inveniantur & magis in lege periti ? Si vis utiliter aliquid scire & discere , ama nesciri & pro nihilo reputari.

4. Hæc est altissima scientia & utilissima lectio , sui ipsius vera cognitio & despectio. De se ipso nihil tenere & de aliis semper bene & altè sentire , magna sapientia est & perfectio. Si videres alium apertè peccare vel aliqua gravia perpetrare , non deberes te tamen meliorem æstimare ; quia nescis quam diu possis in bono stare. Omnes fragiles sumus ; sed tu neminem fragiliorem te ipso tenebis.





CAPUT III.

De doctrinâ veritatis.

1. **F**ELIX quem Veritas per se docet, non per figuras & voces transeuntes, sed sicuti se habet ! Nostra opinio & noster sensus sæpe nos fallit, & modicum videt. Quid prodest magna cavillatio de occultis & obscuris rebus, de quibus nec arguemur in iudicio quia ignoravimus ? Grandis insipientia, quod, neglectis utilibus & necessariis, ultro intendimus curiosis & damnosis. Oculos habentes non videmus.

2. Et quid curæ nobis de generibus & speciebus ? Cui æternum Verbum loquitur, à multis opinionibus expeditur. Ex uno Verbo omnia, & unum loquuntur omnia ; & hoc est *Principium quod & loquitur nobis* (Joan. viij, 25). Nemo sine illo intelligit aut rectè judicat. Cui omnia unum sunt, & omnia ad unum trahit, & omnia in uno videt, potest stabilis corde esse & in Deo

LIBER I. CAP. iij. 19

pacificus permanere. O veritas Deus ! fac me unum tecum in caritate perpetuâ ! Tædet me sæpe multa legere & audire ; in te est totum quod volo ac desidero. Taceant omnes doctores , fileant universæ creaturæ in conspectu tuo ; tu mihi loquere solus.

3. Quanto aliquis magis sibi unitus & interiùs simplicatus fuerit , tanto plura & altiora sine labore intelligit , quia desuper lumen intelligentiæ accipit. Purus , simplex , & stabilis spiritus in multis operibus non dissipatur ; quia omnia ad Dei honorem operatur , & in se otiosus ab omni propriâ exquisitione esse nititur. Quis te magis impedit & molestat quam tua immortificata affectio cordis ? Bonus & devotus homo opera sua priùs intus disponit quæ foris agere debet : nec illa trahunt eum ad desideria vitiosæ inclinationis , sed ipse inflectit ea ad arbitrium rectæ rationis. Quis habet fortius certamen , quam qui nititur vincere se ipsum ? Et hoc deberet esse negotium nostrum ; vincere videlicet se ipsum , & quotidie se ipso fortiolem fieri , atque in melius aliquid proficere.

4. Omnis perfectio in hac vitâ quâdam imperfectionem sibi habet annexam , & omnis speculatio nostra quâdam caligine non caret. Humilis tui cognitio certior via est ad Deum , quam profunda scientiæ inquisitio. Non est culpanda scientia aut quælibet simplex rei notitia , quæ bona est in se considerata & à Deo ordinata : sed præferenda est semper bona conscientia & virtuosa vita. Quia vero plures magis student scire quam bene vivere , ideo sæpe errant , & penè nullum vel modicum fructum ferunt.

5. O ! si tantam adhiberent diligentiam ad extirpanda vitia & virtutes inferendas , sicuti ad movendas quæstiones ; non fierent tanta mala & scandala in populo , nec tanta dissolutio in cœnobiis. Certè , adveniente die judicii , non quæretur à nobis quid legimus , sed quid fecimus ; nec quam bene diximus , sed quam religiosè viximus. Dic mihi : Ubi sunt modo omnes illi domini & magistri , quos bene novisti dum adhuc viverent & in studiis

LIBER I. CAP. iij. 21

florerent ? Jam eorum præbendas alii possident , & nescio utrum de eis recogitant : in vitâ suâ aliquid esse videbantur , & modo de eis tacetur.

6. O ! quam cito transit gloria mundi ! Unam vitâ eorum scientiæ ipsorum concordasset ! tunc bene studuissent & legis-
sent. Quam multi pereunt per vanam scientiam in seculo , qui parum curant de Dei servitio ! Et quia magis eligunt magni esse quam humiles , ideo *evanescent in cogitationibus suis* (Rom. j , 21). Verè magnus est , qui magnam habet caritatem. Verè magnus est , qui in se parvus est & pro nihilo omne culmen honoris ducit. Verè prudens est , qui *omnia terrena arbitratur ut stercora ut CHRISTUM lucrifaciat* (Philipp. iij , 8). Et verè bene doctus est , qui Dei voluntatem facit & suam voluntatem re-
linquit.





CAPUT IV.

De providentiâ in agendis.

1. **N**ON est credendum omni verbo nec instinctui, sed cautè & longanimitè res est secundum Deum ponderanda. Proh dolor! sæpe malum faciliùs quam bonum de alio creditur & dicitur; ita infirmi sumus! Sed perfecti viri non facile credunt omni enarranti, qui sciunt naturam humanam ad malum proclivem & in verbis satis labilem.

2. Magna sapientia, non esse præcipientem in agendis nec pertinacitè in propriis stare sensibus. Ad hanc etiam pertinet, non quibuslibet hominum verbis credere; nec audita vel credita mox ad aliorum aures effundere. Cum sapiente & conscientioso viro consilium habe, & quære potius à meliore instrui quam tuas adinventiones sequi. Bona vita facit hominem sapientem secundum Deum & expertum in multis. Quanto quis in se humilior fuerit & Deo

LIBER I. CAP. iv. 23

subjectior, tanto in omnibus erit sapientior
& pacatior.



CAPUT V.

De lectione sanctarum Scripturarum.

1. **V**ERITAS est in Scripturis sanctis
quærenda, non eloquentia. Omnis Scrip-
tura sacra eo spiritu debet legi quo facta
est. Quærere potius debemus utilitatem in
Scripturis, quam subtilitatem sermonis. Ita
libenter devotos & simplices libros legere
debemus, sicut altos & profundos. Non te
offendat auctoritas scribentis, utrum parvæ
vel magnæ litteraturæ fuerit; sed amor
puræ veritatis te trahat ad legendum. Non
quæras quis hoc dixerit, sed quid dicatur
attende.

2. Homines transeunt, sed *veritas Do-*
mini manet in æternum (Psalm. cxvj, 2).
Sine personarum acceptione, variis modis
loquitur nobis Deus. Curiositas nostra sæpe
nos impedit in lectione Scripturarum, quum

24 DE IMIT. CHRISTI.

volumus intelligere & discutere ubi simpliciter esset transeundum. Si vis profectum haurire : lege humiliter , simpliciter , & fideliter ; nec unquam velis habere nomen scientiæ. Interroga libenter , & audi tacens verba Sanctorum ; nec displiceant tibi parabolæ Seniorum , sine causâ enim non proferuntur.

C A P U T VI.

De inordinatis affectionibus.

I. **Q**UANDOCUMQUE homo aliquid inordinate appetit , statim in se inquietus fit : superbus & avarus nunquam quiescunt , pauper & humilis spiritu in *multitudine pacis* (Psalm. xxxvj , 11) conversantur. Homo qui necdum perfecte in se mortuus est cito tentatur , & vincitur in parvis & vilibus rebus. Infirmus in spiritu , & quodammodo adhuc carnalis , & ad sensibilia inclinatus , difficulter se potest à terrenis desideriis ex toto abstrahere : & ideo sæpe habet tristitiam ,

LIBER I. CAP. vj. 25

tiam, quum se subtrahit; leviter etiam indignatur, si quis ei resistit.

2. Si autem prosequutus fuerit quod concupiscit, statim ex reatu conscientiae gravatur; quia sequutus est passionem suam, quæ nihil juvat ad pacem quam quæsit. Resistendo igitur passionibus, invenitur pax vera cordis, non autem eis serviendo. Non est ergo pax in corde hominis carnalis, non in homine exterioribus dedito; sed in fervido & spiritali.

C A P U T V I I .

De vanâ spe & elatione fugiendâ.

1. **V**ANUS est, qui spem suam ponit in hominibus aut in creaturis. Non te pudeat aliis servire amore JESU-CHRISTI, & pauperem in hoc seculo videri. Non stes super te ipsum, sed in Deo spem tuam constitue. Fac quod in te est, & Deus aderit bonæ voluntati tuæ. Non confidas in tuâ scientiâ vel astutiâ cujuscumque viventis;

26 DE IMIT. CHRISTI.

sed magis in Dei gratiâ , qui adjuvat humiles & de se præsumentes humiliat.

2. Ne glorieris in divitiis , si adsunt ; nec in amicis , quia potentes sunt ; sed in Deo , qui omnia præstat & se ipsum super omnia dare desiderat. Non te extollas de magnitudine vel pulchritudine corporis , quæ modicâ infirmitate corrumpitur & defœdatur. Non placeas tibi ipsi de habilitate aut ingenio tuo , ne displiceas Deo , cujus est totum quidquid boni naturaliter habueris.

3. Non te reputes aliis meliorem , ne forte coram Deo deterior habearis , qui scit quid est in homine. Non superbias de operibus bonis ; quia aliter sunt judicia Dei quam hominum , cui sæpe displicet quod hominibus placet. Si aliquid boni habueris , crede de aliis meliora ut humilitatem conserves. Non nocet , si omnibus te supponas ; nocet autem plurimum , si vel uni te præponas. Jugis pax cum humili ; in corde autem superbi zelus & indignatio frequens.





CAPUT VIII.

De cavendâ nimiâ familiaritate.

1. *NON* omni homini cor tuum manifestes (Eccli. viij, 22); sed cum sapiente & timente Deum age causam tuam. Cum juvenibus & extraneis rarus esto. Cum divitibus noli blandiri, & coram magnatibus non libenter appareas. Cum humilibus & simplicibus, cum devotis & morigeratis sociare, & quæ ædificationis sunt pertracta. Non sis familiaris alicui mulieri, sed in communi omnes bonas mulieres Deo commendare. Soli Deo & angelis ejus opta familiaris esse, & hominum notitiam devita.

2. Caritas habenda est ad omnes, sed familiaritas non expedit. Quandoque accidit ut persona ignota ex bonâ famâ luceat, cujus tamen præsentia oculos intuentium offuscat. Putamus aliquando aliis placere ex conjunctione nostrâ, & incipimus magis displicere ex morum improbitate in nobis consideratâ.

B ij



CAPUT IX.

De obedientia & subjectione.

1. **V**ALDE magnum est in obedientia stare, sub praelato vivere, & sui juris non esse. Multo tutius est stare in subjectione quam in praelatura. Multi sunt sub obedientia magis ex necessitate quam ex caritate; & illi poenam habent, & leviter murmurant; nec libertatem mentis acquirunt, nisi ex toto corde propter Deum se subjiciant. Curre hinc vel ibi; non invenies quietem nisi in humili subjectione sub praelati regimine. Imaginatio locorum & mutatio multos fefellit.

2. Verum est quod unusquisque libenter agit pro sensu suo, & inclinatur ad eos magis qui secum sentiunt. Sed si Deus est inter nos, necesse est ut relinquamus etiam quandoque nostrum sentire propter bonum pacis. Quis est ita sapiens qui omnia plenè scire potest? Ergo noli nimis in sensu tuo

confidere, sed velis etiam libenter aliorum sensum audire. Si bonum est tuum sentire, & hoc ipsum propter Deum dimittis, & alium sequeris; magis exinde proficies.

3. Audivi enim sæpe, securius esse accipere consilium, quam dare. Potest etiam contingere ut bonum sit uniuscujusque sentire; sed nolle aliis acquiescere, quum id ratio postulat aut causa, signum est superbiæ & pertinaciæ.



CAPUT X.

De cavendâ superfluitate verborum.

I. **C**AVEAS tumultum hominum, quantum potes: multum enim impedit tractatus secularium gestorum, etiamsi simplici intentione proferantur; cito enim inquinamur vanitate & captivamur. Vellem me pluries tacuisse, & inter homines non fuisse. Sed quare tam libenter loquimur & invicem fabulamur, quum tamen raro sine læsione conscientiæ ad silentium redimus? Ideo

30 *DE IMIT. CHRISTI.*

tam libenter loquimur , quia per mutuas loquutiones ab invicem consolari quærimus , & cor diversis cogitationibus fatigatum optamus relevare. Et multum libenter de his quæ multum diligimus vel cupimus , vel quæ nobis contraria sentimus , libet loqui & cogitare.

2. Sed , proh dolor ! sæpe inaniter & frustra : nam hæc exterior consolatio interioris & divinæ consolationis non modicum detrimentum est. Ideo vigilandum est & orandum , ne tempus otiosè transeat. Si loqui licet & expedit , quæ ædificabilia sunt loquere. Malus usus & negligentia profectûs nostri , multum facit ad incustodiam oris nostri. Juvat tamen non parum ad profectum spirituales devota spiritualium rerum collatio , maximè ubi pares animo & spiritu in Deo sibi sociantur.





CAPUT XI.

*De pace acquirendâ , & zelo
proficiendi.*

1. **M**ULTAM possemus pacem habere ; si non vellemus nos cum aliorum dictis & factis , quæ ad curam nostram non spectant , occupare. Quomodo potest ille diu in pace manere , qui alienis curis se intermiscet ? qui occasiones forinsecus quærit ? qui parum vel raro se intrinsecus colligit ? Beati simplices , quoniam multam pacem habebunt !

2. Quare quidam Sanctorum tam perfecti & contemplativi fuerunt ? Quia omnino se ipsos mortificare ab omnibus terrenis desideriis studuerunt ; & ideo totis medullis cordis Deo inhærere , atque liberè sibi vacare potuerunt. Nos nimium occupamur propriis passionibus , & de transitoriis nimis sollicitamur ; raro etiam unum vitium perfectè vincimus , & ad quotidianum

32 *DE IMIT. CHRISTI.*

profectum non accendimur : ideo frigidi & tepidi remanemus.

3. Si essemus nobis ipsis perfectè mortui & interiùs minimè implicati , tunc possemus etiam divina sapere & de cœlesti contemplatione aliquid experiri. Totum & maximum impedimentum est , quia non sumus à passionibus & concupiscentiis liberi , nec perfectam Sanctorum viam conamur ingredi. Quando etiam modicum adversitatis occurrit , nimis cito dejicimur & ad humanas consolationes convertimur.

4. Si niteremur , sicut viri fortes , stare in prælio ; profectò auxilium Domini super nos videremus de cœlo : ipse enim certantes & de suâ gratiâ sperantes paratus est adjuvare , qui nobis certandi occasiones procurat ut vincamus. Si tantum in istis exterioribus observantiis profectum religionis ponimus , cito finem habebit devotio nostra. Sed ad radicem securim ponamus , ut , purgati à passionibus , pacificam mentem possideamus.

5. Si omni anno unum vitium extirpa-

LIBER I. CAP. xj. 33

remus, cito viri perfecti efficeremur. Sed modo è contrario sæpe sentimus, ut meliores & puriores in initio conversionis nos fuisse inveniamus quam post multos annos professionis. Fervor & profectus quotidie deberet crescere; sed nunc pro magno videtur, si quis primi fervoris partem posset retinere. Si modicam violentiam faceremus in principio, tunc postea cuncta possemus facere cum levitate & gaudio.

6. Grave est assueta dimittere, sed gravius est contra propriam voluntatem ire: sed si non vincis parva & levia, quando superabis difficiliora? Resiste in principio inclinationi tuæ, & malam dedisce consuetudinem, ne forte paulatim ad maiorem te ducat difficultatem. O! si adverteres quantum tibi pacem & aliis lætitiā faceres te ipsum bene habendo, puto quod sollicitior esses ad spiritualem profectum.





CAPUT XII.

De utilitate adversitatis.

1. **B**ONUM nobis est quod aliquando habeamus aliquas gravitates & contrarietates; quia sæpe hominem ad cor revocant, quatenus se in exilio esse cognoscat, nec spem suam in aliquâ re mundi ponat. Bonum est quod patiamur quandoque contradictiones & quod malè & imperfectè de nobis sentiat, etiam si bene agimus & intendimus; ista sæpe juvant ad humilitatem & à vanâ gloriâ nos defendunt. Tunc enim melius interiorem testem Deum quærimus, quando foris vilipendimur ab hominibus & non bene nobis creditur.

2. Ideo deberet se homo in Deo totaliter firmare, ut non esset ei necesse multas humanas consolationes quærere. Quando homo bonæ voluntatis tribulatur, vel tentatur, aut malis cogitationibus affligitur; tunc Deum sibi magis necessarium intelli-

LIBER I. CAP. xij. 35

git, sine quo nihil boni se posse deprehendit: tunc etiam tristatur, gemit, & orat pro miseriis quas patitur; tunc tædet eum diutius vivere & mortem optat venire, ut possit *dissolvi & esse cum CHRISTO* (Philipp. j, 23); tunc etiam bene advertit, perfectam securitatem & plenam pacem in mundo non posse constare.



CAPUT XIII.

De tentationibus resistendis.

QUAMDIU in mundo vivimus, sine tribulatione & tentatione esse non possumus. Unde in Job scriptum est, *Militia est vita hominis super terram* (Job. vij, 1). Ideo unusquisque sollicitus esse deberet circa tentationes suas & vigilare in orationibus, ne diabolus locum inveniret decipiendi, qui nunquam dormitat, sed semper *circuit quærens quem devoret* (Petr. v, 8). Nemo tam perfectus est & sanctus, qui non habeat aliquando tentationes; & plenè eis carere non possumus.

B vj

36 DE IMIT. CHRISTI.

2. Sunt tamen tentationes homini sæpe valde utiles, licet molestæ sint & graves; quia in illis homo humiliatur, & purgatur, & eruditur. Omnes Sancti per multas tribulationes & tentationes transierunt, & profecerunt: & qui tentationes sustinere nequiverunt, reprobi facti sunt & defecerunt. Non est aliquis Ordo tam sanctus nec locus tam secretus, ubi non sint tentationes & adversitates.

3. Non est homo securus à tentationibus totaliter, quamdiu vixerit; quia in nobis est unde tentamur, ex quo in concupiscentiâ nati sumus. Unâ tentatione seu tribulatione recedente, alia supervenit; & semper aliquid ad patiendum habebimus: nam bonum felicitatis nostræ perdidimus. Multi quæruunt tentationes fugere, & gravius incidunt in eas. Per solam fugam non possumus vincere; sed per patientiam & veram humilitatem omnibus hostibus effirmur fortiores.

4. Qui tantummodo exteriùs declinat nec radicem evellit, parum proficiet; imò ci-

tiùs ad eum tentationes redient, & pejor sentiet. Paulatim, per patientiam & longanimitatem, Deo juvante, melius superabis, quam cum duritiâ & importunitate propriâ. Sæpiùs accipe consilium in tentatione: & cum tentato noli duriter agere; sed consolationemingere, sicut tibi optares fieri.

5. Initium omnium malarum tentationum, inconstantia animi & parva ad Deum confidentia; quia, sicut navis sine gubernaculo hinc inde à fluctibus impellitur, ita homo remissus & suum propositum desereus variè tentatur. Ignis probat ferrum; & tentatio, hominem justum: nescimus sæpe quid possumus, sed tentatio aperit quid sumus. Vigilandum est tamen, præcipuè circa initium tentationis; quia tunc faciliùs hostis vincitur, si ostium mentis nullatenùs intrare finitur, sed extra limen, statim ut pulsaverit, illi obviatur. Unde quidam dixit [Ovid. Remed. am. 91]:

Principiis obstâ: sèro medicina paratur,

Quum mala per longas. invaluère moras.

38 DE IMIT. CHRISTI.

Nam primo occurrit menti simplex cogitatio, deinde fortis imaginatio, postea delectatio, & motus pravus, & assensio; sicque paulatim ingreditur hostis malignus ex toto, dum illi non resistitur in principio: & quanto diutius ad resistendum quis torpuerit, tanto in se quotidie debilior fit, & hostis contra eum potentior.

6. Quidam, in principio conversionis suæ, graviores tentationes patiuntur; quidam autem, in fine; quidam vero quasi per totam vitam suam malè habent. Nonnulli satis leniter tentantur, secundum divinæ ordinationis sapientiam & æquitatem, quæ statum & merita hominum pensat, & cuncta ad electorum suorum salutem præordinat.

7. Ideo non debemus desperare quum tentamur, sed eo ferventiùs Deum exorare, quatenùs nos in omni tribulatione dignetur adjuvare; qui utique, secundum dictum Pauli, talem *faciet cum tentatione proventum, ut possimus sustinere* (I. Cor. x, 13). Humiliemus ergo animas nostras sub

LIBER I. CAP. xiiij. 39

manu Dei in omni tentatione & tribulatione , quia *humiles spiritu salvabit* (Ps. xxxiiij, 19) & exaltabit.

8. In tentationibus & tribulationibus probatur homo quantum profecit ; & ibi majus meritum existit , & virtus melius patet. Nec magnum est , si homo devotus sit & fervidus quum gravitatem non sentit ; sed si tempore adversitatis patienter sustinet , spes magni profectus erit. Quidam à magnis tentationibus custodiuntur , & in parvis quotidianis sæpe vincuntur ; ut , humiliati , nunquam de se ipsis in magnis confidant , qui in tam modicis infirmantur.



CAPUT XIV.

De temerario judicio vitando.

1. **A**D te ipsum oculos reflecte & aliorum facta caveas judicare. In judicando alios , homo frustra laborat , sæpiùs errat , & leviter peccat ; se ipsum vero judican-

40 DE IMIT. CHRISTI.

do & discutiendo , semper fructuosè laborat. Sicut nobis res cordi est , sic de eà frequenter judicamus ; nam verum iudicium propter privatum amorem faciliter perdimus. Si Deus semper esset pura intentio nostri desiderii , non tam faciliter turbaremur pro resistantiâ sensûs nostri.

2. Sed sæpe aliquid ab intrâ latet vel etiam ab extrâ concurrit , quod nos etiam pariter trahit. Multi occultè se ipsos quærunt in rebus quas agunt , & nesciunt. Videntur etiam in bonâ pace stare , quando res pro eorum velle fiunt & sentire ; si autem aliter fit quam cupiunt , cito moventur & tristes fiunt. Propter diversitatem sensuum & opinionum , satis frequenter oriuntur dissensiones inter amicos & cives , inter religiosos & devotos.

3. Antiqua consuetudo difficulter relinquitur , & ultra proprium videre nemo libenter ducitur. Si rationi tuæ magis inniteris vel industriæ quam virtuti subjectivæ JESU-CHRISTI , raro & tardè eris homo illuminatus ; quia Deus vult nos sibi perfec-

tè subjici, & omnem rationem per inflammatum amorem transcendere.

CAPUT XV.

De operibus ex caritate factis.

PRO nullâ re mundi & pro nullius hominis dilectione, aliquod malum est faciendum: sed pro utilitate tamen indigentis, opus bonum liberè aliquando intermittendum est aut etiam pro meliori mutandum; hoc enim factò opus bonum non destruitur, sed in melius commutatur. Sine caritate opus externum nihil prodest: quidquid autem ex caritate agitur, quantumcumque etiam parvum sit & despectum, totum efficitur fructuosum; magis siquidem Deus pensat ex quanto quis agit, quam opus quod facit.

2. Multum facit qui multum diligit. Multum facit qui rem bene facit. Bene facit qui communitati magis quam suæ voluntati servit. Sæpe videtur esse caritas,

42 DE IMIT. CHRISTI.

& est magis carnalitas ; quia naturalis inclinatio , propria voluntas , spes retributionis , affectus commoditatis , raro abesse volunt.

3. Qui veram & perfectam caritatem habet in nullâ re se ipsum quærit , sed Dei solummodo gloriam in omnibus fieri desiderat : nulli etiam invidet , quia nullum privatum gaudium amat : nec in se ipso vult gaudere , sed in Deo super omnia bona optat beatificari : nemini aliquid boni attribuit ; sed totaliter ad Deum refert , à quo fontaliter omnia procedunt , in quo finaliter omnes Sancti fruibilter requiescunt. O ! qui scintillam haberet veræ caritatis , profectò omnia terrena sentiret plena fore vanitatis.





CAPUT XVI.

De sufferentiâ defectuum aliorum.

1. **Q**UÆ homo in se vel in aliis emendare non valet, debet patienter sustinere, donec Deus aliter ordinet. Cogita quia sic forte melius est pro tuâ probatione & patientiâ, sine quâ non sunt multum ponderanda merita nostra. Debes tamen pro talibus impedimentis supplicare, ut Deus dignetur tibi subvenire & possis benignè portare.

2. Si quis, semel aut bis admonitus, non acquiescit, noli cum eo contendere; sed totum Deo committe, ut fiat voluntas ejus & honor in omnibus servis suis, qui scit bene mala in bonum convertere. Stude patiens esse in tolerando aliorum defectus & qualescumque infirmitates, quia & tu multa habes quæ ab aliis oportet tolerari. Si non potes te talem facere qualem vis, quomodo poteris alium ad tuum habere

44 DE IMIT. CHRISTI.

beneplacitum ? Libenter habemus alios perfectos , & tamen proprios non emendamus defectus.

3. Volumus quod alii strictè corrigantur , & ipsi corrigi nolumus ; displicet larga aliorum licentia , & tamen nobis nolumus negari quod petimus ; alios restringi per statuta volumus , & ipsi nullatenus patimur ampliùs cohiberi : sic ergo patet quam raro proximum sicut nos ipsos pensamus. Si essent omnes perfecti , quid tunc haberemus ab aliis pro Deo pati ?

4. Nunc autem Deus sic ordinavit ut discamus *alter alterius onera portare* (Gal. vj , 2) ; quia nemo sine defectu , nemo sine onere , nemo sibi sufficiens , nemo sibi satis sapiens : sed oportet nos invicem portare , invicem consolari , pariter adjuvare , instruere , & admonere. Quantæ autem virtutis quisque fuerit meliùs patet occasione adversitatis ; occasiones namque hominem fragilem non faciunt , sed qualis sit ostendunt.





CAPUT XVII.

De monasticâ vitâ.

I. **O**PORTET quod discas te ipsum in multis frangere, si vis pacem & concordiam cum aliis tenere. Non est parvum in monasteriis vel in congregatione habitare, & inibi sine querelâ conversari, & usque ad mortem fidelis perseverare. Beatus, qui ibidem bene vixerit & feliciter consummaverit. Si vis debitè stare & proficere, teneas te tanquam exulem, peregrinum super terram. Oportet te stultum fieri propter CHRISTUM, si vis religiosam ducere vitam.

2. Habitus & tonsura modicum conferunt, sed mutatio morum & integra mortificatio passionum verum faciunt Religiosum. Qui aliud quærit quam purè Deum & animæ suæ salutem, non inveniet nisi tribulationem & dolorem. Non potest etiã diu stare pacificus, qui non nititur esse minimus & omnibus subiectus.

3. Ad serviendum venisti , non ad regendum ; ad patiendum & laborandum scias te vocatum , non ad otia dum vel fabulandum. Hic ergo probantur homines , *sicut aurum in fornace* (Sap. iij , 6) ; hic nemo potest stare , nisi ex toto corde se voluerit propter Deum humiliare.



CAPUT XVIII.

De exemplis sanctorum Patrum.

I. **I**NTUERE sanctorum Patrum vivida exempla , in quibus vera perfectio refulsit & religio ; & videbis quam modicum sit & penè nihil quod nos agimus. Heu ! quid est vita nostra , si illis fuerit comparata ? Sancti & amici CHRISTI Domino servierunt *in fame & siti , in frigore & nuditate , in labore & fatigatione , in vigiliis & jejuniis* (II. Cor. xj , 27) , in orationibus & meditationibus sanctis , in persecutionibus & opprobriis multis.

2. O ! quam multas & graves tribulationes

LIBER I. CAP. xviii. 47

passi sunt apostoli, martyres, confessores, virgines, & reliqui omnes qui CHRISTI vestigia voluerunt sequi! nam *animas suas in hoc mundo oderunt, ut in æternam vitam eas possiderent* (Joan. xij, 25). O! quam strictam & abdicatam vitam sancti Patres in eremo duxerunt! quam longas & graves tentationes pertulerunt! quam frequenter ab inimico vexati sunt! quam crebras & fervidas orationes Deo obtulerunt! quam rigidas abstinentias peregerunt! quam magnum zelum & fervorem ad spiritualem profectum habuerunt! quam forte bellum adversus edomationem vitiorum gesserunt! quam puram & rectam intentionem ad Deum tenuerunt! Per diem laborabant & noctibus orationi divinæ vacabant, quamquam laborando ab oratione mentali minimè cessarent.

3. Omne tempus utiliter expendebant; omnis hora ad vacandum Deo brevis videbatur, & præ magnâ dulcedine contemplationis etiam oblivioni tradebatur necessitas corporalis refectionis. Omnibus divi-

48 DE IMIT. CHRISTI.

tiis , dignitatibus , honoribus , amicis , & cognatis renunciabant : nil de mundo habere cupiebant , vix necessaria vitæ fume-
bant ; corpori servire etiam in necessitate dolebant. Pauperes igitur erant rebus terrenis , sed divites valde in gratiâ & virtutibus : foris egebant , sed intus gratiâ & consolatione divinâ reficiebantur.

4. Mundo erant alieni , sed Deo proximi ac familiares amici : sibi ipsis videbantur tamquam nihili & huic mundo despecti , sed erant in oculis Dei pretiosi & dilecti. In verâ humilitate stabant , in simplici obedientiâ vivebant , in caritate & patientiâ ambulabant ; & ideo quotidie in spiritu proficiebant , & magnam apud Deum gratiam obtinebant. Dati sunt in exemplum omnibus Religiosis ; & plus provocare nos debent ad bene proficiendum , quam tepidorum numerus ad relaxandum.

5. O ! quantus fervor omnium Religiosorum in principio suæ sanctæ institutionis fuit ! O ! quanta devotio orationis ! quanta æmulatio virtutis ! quam magna disciplina viguit !

LIBER I. CAP. xviii 49

viguit ! quanta reverentia & obedientia sub regulâ magistri in omnibus effloruit ! Testantur adhuc vestigia derelicta , quod verè viri sancti fuerant & perfecti , qui , tam strenuè militantes , mundum suppeditaverunt. Jam magnus putatur , si quis transgressor non fuerit ; si quis , quod accepit , cum patientiâ tolerare potuerit.

6. Oh teporis & negligentiae statûs nostri , quod tam cito declinamus à pristino fervore , & jam tædet vivere præ lassitudine & tepore ! Utinam in te penitus non dormitet profectus virtutum , qui multa sæpius exempla vidisti devotorum !

C A P U T . X I X .

De exercitiis boni Religiosi.

I. **V**ITA boni Religiosi omnibus virtutibus pollere debet , ut sit talis interiùs qualis videtur hominibus exterius : & merito , multo plus debet esse intus quam quod cernitur foris ; quia inspector noster est Deus ,

quem summopere revereri debemus ubicumque fuerimus , & tanquam angeli in conspectu ejus mundi incedere. Omni die renovare debemus propositum nostrum , & ad fervorem nos excitare quasi hodie primum ad conversionem venissemus , atque dicere : « Adjuva me , Domine Deus , » in bono proposito & sancto servitio tuo ; » & da mihi nunc hodie perfecte incipere , » quia nihil est quod hactenus feci ».

2. Secundum propositum nostrum , cursus profectus nostri ; & multâ diligentia opus est bene proficere volenti. Quod si fortiter proponens sæpe deficit , quid ille qui raro aut minus fixè aliquid proponit ? Variis tamen modis contingit desertio propositi nostri , & levis omisio exercitiorum vix sine aliquo dispendio transit. Justorum propositum in gratiâ Dei potius quam in propriâ sapientiâ pendet ; in quo & semper confidunt , quidquid arripiunt : nam homo proponit , sed Deus disponit ; & *non est hominis via ejus.* (Jer. x , 23.)

3. Si , pietatis causâ aut fraternæ utili-

LIBER I. CAP. XIX. 51

tatis proposito, quandoque omittitur consuetum exercitium; facile postea poterit recuperari: si autem tædio animi aut negligentia facilliter relinquitur; satis culpabile est, & noxivum sentietur. Conemur quantum possumus, adhuc leviter deficiemus in malis. Semper tamen aliquid certi proponendum est, & contra illa præcipue quæ amplius nos impediunt. Exteriora nostra & interiora pariter nobis scrutanda sunt & ordinanda, quia utraque expediunt ad profectum.

4. Si non continuè te vales colligere, saltem interdum; & ad minus semel in die, mane videlicet aut vespere. Mane propone, vespere discute mores tuos, qualis hodie fuisti in verbo, opere, & cogitatione; quia in his sæpius forsitan offendisti Deum & proximum. Accinge te, sicut vir, contra diabolicas nequitias: frena gulam, & omnem carnis inclinationem facilius frenabis: nunquam sis otiosus; sed aut legens, aut scribens, aut orans, aut meditans, aut aliquid utilitatis pro communi

52 DE IMIT. CHRISTI.

laborans. Corporalia tamen exercitia discretè sunt agenda, nec omnibus æqualiter assumenda.

5. Quæ communia non sunt, non sunt foris ostendenda; nam in secreto tutius exercentur privata. Cavendum tamen ne piger sis ad communia & ad singularia promptior; sed, expletis integrè & fideliter debitis & injunctis, si jam ultra vacat, redde te tibi prout devotio tua desiderat. Non possunt omnes habere unum exercitium; sed aliud isti, aliud illi magis deservit. Etiam pro temporis congruentiâ diversa placent exercitia; quia alia in festis, alia in feriatis magis sapiunt diebus: aliis indigemus tempore tentationis, & aliis tempore pacis & quietis: alia, quum tristamur, libet cogitare; & alia, quum læti in Domino fuerimus.

6. Circa principalia festa renovanda sunt bona exercitia, & Sanctorum suffragia ferventiùs imploranda. De festo in festum proponere debemus, quasi tunc de hoc sæculo migraturi & ad æternum festum

LIBER I. CAP. XIX. 53

perventuri : ideoque sollicitè nos præparare debemus in devotis temporibus , & devotiùs conversari , atque omnem observantiam strictiùs custodire , tanquam in brevi præmium laboris nostri à Deo percepturi.

7. Et si dilatum fuerit , credamus nos minùs bene præparatos atque indignos tantæ adhuc gloriæ , *quæ revelabitur in nobis* (Rom. viij , 18) tempore præfinito ; & studeamus nos meliùs ad exitum præparare. *Beatus servus* , ait evangelista Lucas , *quem , quum venerit Dominus ejus , invenerit vigilantem : amen dico vobis , super omnia bona sua constituet eum.* (Luc. xij , 43 , 44 .)

C A P U T XX.

De amore solitudinis & silentii.

1. **Q**UÆRE aptum tempus vacandi tibi , & de beneficiis Dei frequenter cogita. Relinque curiosa ; tales perlege materias , quæ compunctionem magis præstant quam occupationem. Si te subtraxeris à superfluis

54 DE IMIT. CHRISTI.

loquutionibus & otiosis circuitionibus , nec-
non à novitatibus & rumoribus audiendis ;
invenies tempus sufficiens & aptum pro bo-
nis meditationibus insistendis. Maximi Sanc-
torum humana consortia , ubi poterant ,
vitabant , & Deo in secreto servire elige-
bant.

2. Dixit quidam (Seneca , *ep. 7. sed aliis verbis*) : « Quoties inter homines fui ,
» minor homo redii ». Hoc sæpiùs exper-
rimur , quando diu confabulamur. Facilius
est omnino tacere , quam verbo non ex-
cedere : facilius est domi latere , quam fo-
ris se posse sufficienter custodire. Qui igitur
intendit ad interiora & spiritualia per-
venire , oportet eum cum JESU à turbâ de-
clinare. Nemo securè apparet , nisi qui li-
benter latet : nemo securè loquitur , nisi
qui libenter tacet : nemo securè præest ,
nisi qui libenter subest : nemo securè præ-
cipit , nisi qui bene obedire didicit.

3. Nemo securè gaudet , nisi bonæ con-
scientiæ in se testimonium habeat. Semper
tamen Sanctorum securitas plena timoris

LIBER I. CAP. XX. 55

Dei exstitit ; nec eo minùs solliciti & humiles in se fuerunt, quia magnis virtutibus & gratiâ emicuerunt. Pravorum autem securitas ex superbiâ & præsumptione oritur, & in fine in deceptionem sui vertitur. Nunquam promittas tibi securitatem in hâc vitâ, quamvis bonus videaris cœnobita aut devotus eremita.

4. Sæpe meliores in æstimatione hominum gravitùs periclitati sunt propter suam nimiam confidentiam. Unde multis utilius est ut non penitùs temptationibus careant, sed sæpiùs impugnentur ; ne nimiùm securi sint, ne fortè in superbiam eleventur, ne etiam ad exteriores consolationes licentiùs declinent. O ! qui nunquam transitoriam lætitiâ quæreretur, qui nunquam cum mundo se occuparet, quam bonam conscientiam servaret ! O ! qui omnem vanam sollicitudinem amputaret, & duntaxat salutaria ac divina cogitaret, & totam spem in Deo constitueret, quam magnam pacem & quietem possideret !

5. Nemo dignus est cœlesti consolatio-

56 DE IMIT. CHRISTI.

ne , nisi diligenter se exercuerit in sanctâ compunctione. Si vis corde tenus compungi , intra in cubile tuum & exclude tumultus mundi , sicut scriptum est ; *In cubilibus vestris compungimini.* (Ps. iv , 5.) In cellâ invenies quod de foris sæpius amittes. Cella continuata dulcescit , & malè custodita tædium generat. Si in principio conversionis tuæ bene eam incolueris & custodieris , erit tibi postea dilecta amica & gratissimum solatium.

6. In silentio & quiete , proficit anima devota & discit abscondita Scripturarum. Ibi invenit fluentia lacrymarum , quibus singulis noctibus se lavet & mundet , ut Conditori suo tanto familiarior fiat , quanto longiùs ab omni sæculari tumultu degit. Qui ergo se abstrahit à notis & amicis , approximabit illi Deus cum angelis sanctis. Melius est latere & sui curam agere , quam , se neglecto , signa facere. Laudabile est homini religioso , raro foras ire , fugere videri , nolle etiam homines videre.

7. Quid vis videre quod non licet habere ? *Mundus transit & concupiscentia ejus.* (I. Joan. ij, 17.) Trahunt desideria sensualitatis ad spatiandum ; sed quum hora transferit , quid nisi gravitatem conscientiae & cordis dispersionem reportas ? Lætus exitus tristem sæpe reditum parit ; & læta vigilia serotina triste mane facit. Sic omne carnale gaudium blandè intrat , sed in fine mordet & perimit. Quid potes alibi videre , quod hîc non vides ? Ecce cœlum , & terra , & omnia elementa ; nam ex istis omnia sunt facta.

8. Quid potes alicubi videre , quod diu potest sub sole permanere ? Credis te forsitan satiari , sed non poteris pertingere. Si cuncta videres præsentia , quid esset nisi visio vana ? Leva oculos tuos ad Deum in excelsis , & ora pro peccatis tuis & negligentis. Dimitte vana vanis ; tu autem , intende illis quæ tibi præcepit Deus. Clau-
de super te ostium tuum , & voca ad te JESUM dilectum tuum : mane cum eo in cellâ , quia non invenies alibi tantam pa-

58 DE IMIT. CHRISTI.

cem. Si non exisses nec quidquam de rumoribus audisses, melius in bonâ pace permanisses. Ex quo nova delectat aliquando audire, oportet te exinde turbationem cordis tolerare.



CAPUT XXI.

De compunctione cordis.

1. **S**I vis aliquid proficere, conserva te in timore Dei; & noli esse nimis liber; sed sub disciplinâ cohibe omnes sensus tuos nec ineptæ te tradas lætitiæ. Da te ad cordis compunctionem, & invenies devotionem: compunctio multa bona aperit, quæ dissolutio cito perdere consuevit. Mirum est quod homo possit unquam perfectè lætari in hac vitâ, qui suum exilium & tam multa pericula animæ suæ considerat & pensat.

2. Propter levitatem cordis & negligentiam defectuum nostrorum, non sentimus animæ nostræ dolores; sed sæpe vanè ri-

demus , quando merito flere deberemus. Non est vera libertas nec bona lætitia , nisi in timore Dei cum bonâ conscientia. Felix , qui abjicere potest omne impedimentum distractionis , & ad unionem se recolligere sanctæ compunctionis ! Felix , qui à se abdicat quidquid conscientiam suam maculare potest vel gravare ! Certa viriliter ; consuetudo consuetudine vincitur. Si tu scis homines dimittere , ipsi bene te dimittent tua facta facere.

3. Non attrahas tibi res aliorum , nec te implices causis Majorum. Habeas semper oculum super te primum , & admo-
neas te ipsum specialiter præ omnibus tibi dilectis. Si non habes favorem hominum , noli ex hoc tristari ; sed hoc sit tibi grave , quia non habes te satis bene & circumspectè , sicut deceret Dei servum & devotum Religiosum conversari. Utilius est sæpe & securius quod homo non habeat multas consolationes in hâc vitâ , secundum carnem præcipuè. Tamen , quod divinas non habemus aut rariùs sentimus , nos in

culpâ sumus ; quia compunctionem cordis non quærimus , nec vanas & externas omnino abjicimus.

4. Cognosce te indignum divinâ consolatione , sed magis dignum multâ tribulatione. Quando homo est perfectè compunctus , tunc gravis & amarus est ei totus mundus. Bonus homo sufficientem invenit materiam dolendi & flendi. Sive enim se considerat , sive de proximo pensat , scit quia nemo sine tribulatione hîc vivit ; & quanto strictiùs sese considerat , tanto amplius dolet. Materiæ justi doloris & internæ compunctionis sunt peccata & vitia nostra , quibus ita involuti jacemus , ut raro cœlestia contemplari valeamus.

5. Si frequentiùs de morte tuâ quam de longitudine vitæ cogitares , non dubium quin ferventiùs te emendares. Si etiam futuras Inferni sive Purgatorii pœnas cordialiter perpenderes , credo quod libenter laborem & dolorem sustineres & nihil rigoris formidares. Sed quia ad cor ista non transeunt & blandimenta adhuc amamus ,

ideo frigidi & valde pigri remanemus.

6. Sæpe est inopia spiritûs, unde tam leviter conqueritur miserum corpus. Ora igitur humiliter ad Dominum ut det tibi compunctionis spiritum, & dic cum Prophetâ : *Ciba me, Domine, pane lacrymarum, & potum da mihi in lacrymis in mensurâ* (Ps. lxxix, 6).



CAPUT XXII.

De consideratione humanæ miseriæ.

I. **M**ISER eris, ubicumque fueris & quocumque te verteris, nisi ad Deum te convertas. Quid turbaris, quia non succedit tibi sicut vis & desideras? Quis est qui habet omnia secundum suam voluntatem? nec ego, nec tu, nec aliquis hominum super terram. Nemo est in mundo sine aliquâ tribulatione vel angustia, quamvis rex sit vel papa. Quis est qui melius habet? utique qui pro Deo aliquid pati valet.

2. Dicunt multi imbecilles & infirmi :

62 DE IMIT. CHRISTI.

« Ecce quam bonam vitam ille homo habet ! quam dives ! quam magnus ! quam potens & excelsus ! » Sed attende ad cœlestia bona ; & videbis quod omnia ista temporalia nulla sunt , sed valde incerta & magis gravantia , quia nunquam sine solitudine & timore possidentur. Non est hominis felicitas habere temporalia ad abundantiam ; sed sufficit ei mediocritas. Verè miseria est vivere super terram. Quanto homo voluerit esse spiritualior , tanto præfens vita fit ei amarior , quia sentit meliùs & videt clariùs humanæ corruptionis defectus. Nam comedere , bibere , vigilare , dormire , quiescere , laborare , & ceteris necessitatibus naturæ subjacere , verè magna miseria est & afflictio homini devoto , qui libenter esset absolutus & liber ab omni peccato.

3. Valde enim gravatur interior homo necessitatibus corporalibus in hoc mundo. Unde Propheta devotè rogat , quatenùs liber ab istis esse valeat , dicens : *De necessitatibus meis erue me , Domine.* (Ps. xxiv ,

LIBER I. CAP. XXij. 63

17.) Sed vae non cognoscentibus suam miseriam ! & ampliùs vae illis qui diligunt hanc miseram & corruptibilem vitam ! Nam in tantum quidam hanc amplectuntur , licet etiam vix necessaria laborando aut mendicando habeant , ut , si possent hic semper vivere , de regno Dei nihil curarent.

4. O ! infani & infideles corde , qui tam profundè in terrenis jacent ut nihil nisi carnalia sapiant ! Sed miseri adhuc in fine graviter sentient quam vile & nihilum erat quod amaverunt. Sancti autem Dei & omnes devoti amici CHRISTI , non attenderunt quæ carni placuerunt nec quæ in hoc tempore floruerunt ; sed tota spes eorum & intentio ad æterna bona anhebat. Ferebatur totum desiderium eorum sursum ad mansura & invisibilia , ne amore visibilium traherentur ad infima. Noli , Frater , amittere confidentiam proficiendi ad spiritualia ; adhuc habes tempus & horam.

64 DE IMIT. CHRISTI.

5. Quare vis procrastinare propositum tuum ? Surge , & in instanti incipe , & dic : « Nunc tempus est faciendi , nunc » tempus est pugnandi , nunc aptum tempus est emendandi ». Quando malè habes & tribularis , tunc tempus est merendi. Oportet *te transire per ignem & aquam* , ante quam venias *ad refrigerium* (Ps. lxxv , 11). Nisi tibi vim feceris , vitium non superabis. Quam diu istud fragile corpus gerimus , sine peccato esse non possumus nec sine tædio & dolore vivere. Libenter haberemus ab omni miseriâ quietem ; sed , quia per peccatum amisimus innocentiam , amisimus etiam veram beatitudinem. Ideo oportet nos tenere patientiam & Dei exspectare misericordiam , *donec transeat iniquitas* (Ps. lvj , 2) hæc & *absorbeatur quod mortale est à vitâ*. (II. Cor. v , 4.)

6. O ! quanta fragilitas humana , quæ semper prona est ad vitia ! Hodie confiteris peccata tua , & cras iterum perpetras confessa : nunc proponis cavere , & post horam agis quasi nihil proposuisses.

LIBER I. CAP. xxij 65

Merito ergo nos ipsos humiliare possumus nec unquam aliquid magni de nobis sentire , quia tam fragiles & instabiles sumus. Cito etiam potest perdi , per negligentiam , quod multo labore vix tandem acquisitum est per gratiam.

7. *Quid fiet de nobis adhuc in fine , qui tepescimus tam mane ? Væ nobis , si sic volumus declinare ad quietem quasi jam pax sit & securitas , quum necdum appareat vestigium veræ sanctitatis in conversatione nostrâ ! Bene opus esset quod iterum instrueremur tanquam boni novitii ad mores optimos , si forte spes esset de aliquâ futurâ emendatione & majori spiritali profectu.*





CAPUT XXIII.

De meditatione mortis.

I. **V**ALDE cito erit tecum hic factum; vide aliter quomodo te habeas. Hodie homo est, & cras non comparet; quum autem sublatus fuerit ab oculis, etiam cito transit à mente. O hebetudo & duritia cordis humani, quod solum præsentia meditatur & futura non magis prævidet! Sic te in omni facto & cogitatu debes tenere, quasi hodie esses moriturus. Si bonam conscientiam haberes, non multum mortem timeres. Melius esset peccata cavere quam mortem fugere. Si hodie non es paratus, quomodo cras eris? Cras est dies incerta; & quid scis si crastinum habebis?

2. Quid prodest diu vivere, quando tam parum emendamur? Ah! longa vita non semper emendat, sed sæpe culpam magis auget. Utinam per unam diem bene essemus conversati in hoc mundo! Multi annos

LIBER I. CAP. XXIIJ. 67

computant conversionis, sed sæpe parvus est fructus emendationis. Si formidolosum est mori, forsitan periculosius erit diutius vivere. Beatus, qui horam mortis suæ semper ante oculos habet & ad moriendum quotidie se disponit. Si vidisti aliquando hominem mori, cogita quia & tu per eandem viam transibis.

3. Quum mane fuerit, puta te ad vespere non perventurum; vespere autem facto, mane non audeas tibi polliceri. Semper ergo paratus esto, & taliter vive ut nunquam te imparatum mors inveniat. Multi subito & improvisè moriuntur; nam *quâ horâ non putatis filius hominis veniet* (Luc. xij, 40). Quando illa extrema hora veniet, multum aliter sentire incipies de totâ vitâ tuâ præteritâ, & valde dolebis quia tam negligens & remissus fuisti.

4. Quam felix & prudens, qui talis nunc nititur esse in vitâ qualis optat inveniri in morte! dabit namque magnam fiduciam feliciter moriendi perfectus contemptus mundi, fervens desiderium in virtuti-

68 DE IMIT. CHRISTI.

bus proficiendi , amor disciplinæ , labor poenitentiaë , promptitudo obedientiaë , abnegatio sui , & supportatio cujuslibet aduersitatis pro amore CHRISTI. Multa bona potes operari dum sanus es ; sed infirmatus , nescio quid poteris. Pauci ex infirmitate meliorantur , sic & qui multum peregrinantur raro sanctificantur.

5. Noli confidere super amicos & proximos , nec in futurum tuam differas salutem ; quia citiùs obliviscentur tui homines quam æstimas. Melius est nunc tempestivè providere & aliquid boni præmittere , quam super aliorum auxilio sperare. Si non es pro te ipso sollicitus modo , quis erit sollicitus pro te in futuro ? Nunc tempus est valde pretiosum ; *ecce nunc tempus acceptabile , ecce nunc dies salutis* (II. Cor. vj , 2) : sed proh dolor ! quod hoc utiliùs non expendis , in quo promereri vales unde æternaliter vivas ! Veniet quando unam diem seu horam pro emendatione desiderabis , & nescio an impetrabis.

6. Eia , Carissime , de quanto periculo

LIBER I. CAP. xxiiij. 69

te poteris liberare , de quam magno timore eripere , si modo semper timoratus fueris & suspectus de morte ? Stude nunc taliter vivere , ut in horâ mortis valeas potius gaudere quam timere. Disce nunc mori mundo , ut tunc incipias vivere cum **CHRISTO**. Disce nunc omnia contemnere , ut tunc possis liberè ad **CHRISTUM** pergere. Castiga nunc corpus tuum per pœnitentiam , ut tunc certam valeas habere confidentiam.

7. Ah ! Stulte , quid cogitas te diu victurum , quum nullum diem habeas securum ? Quam multi decepti sunt & insperatè de corpore extracti ! Quoties audisti à dicentibus , quia « Ille gladio cecidit , ille sub- » merfus est , ille ab alto ruens cervicem » fregit , ille manducando obriguit , ille » ludendo finem fecit ? » Alius igne , alius ferro , alius peste , alius latrocinio interiit : & sic omnium finis mors est , & vita hominum tamquam umbra subito pertransit.

8. Quis memorabitur tui post mortem ? & quis orabit pro te ? Age , age nunc ,

70 DE IMIT. CHRISTI.

Carissime , quidquid agere potes ; quia nescis quando morieris , nescis etiam quid tibi post mortem sequetur. Dum tempus habes , congrega tibi divitias immortales. Præter salutem tuam nihil cogites ; solum quæ Dei sunt cures. *Fac nunc tibi amicos , venerando Dei Sanctos & eorum actus imitando ; ut , quum defeceris in hâc vitâ , illi recipiant te in æterna tabernacula* (Luc. xvj , 9).

5. Serva te tamquam peregrinum & hospitem super terram , ad quem nihil spectat de mundi negotiis. Serva cor liberum & ad Deum sursum erectum , quia *non habes hîc manentem civitatem*. (Hebr. xiiij , 14.) Illuc preces & gemitus quotidianos cum lacrymis dirige , ut spiritus tuus mereatur ad Dominum post mortem feliciter transire. Amen.





CAPUT XXIV.

De judicio & pœnis peccatorum.

1. **I**N omnibus rebus respice finem, & qualiter ante districtum stabis judicem, cui nihil est occultum; qui muneribus non placatur nec excusationes recipit, sed quod justum est judicabit. O miserrime & insipiens Peccator! quid respondebis Deo omnia mala tua scienti, qui interdum formidas vultum hominis irati? Ut quid non prævides tibi in die judicii, quando nemo poterit per alium excusari vel defendi, sed unusquisque sufficiens onus erit sibi ipsi? Nunc labor tuus est fructuosus, fletus acceptabilis, gemitus exaudibilis, dolor satisfactorius & purgativus.

2. Magnum habet & salubre purgatorium patiens homo, qui, suscipiens injurias, plus dolet de alterius malitiâ quam de suâ injuriâ; qui pro contrariantibus sibi libenter orat, & ex corde culpas indulget;

72 *DE IMIT. CHRISTI.*

qui veniam ab aliis petere non retardat ; qui facilius miseretur quam irascitur ; qui sibi ipsi violentiam frequenter facit , & carnem omnino spiritui subjugare conatur. Melius est modo purgare peccata & vitia refecare , quam in futuro purganda reservare. Verè nos ipsos decipimus per inordinatum amorem quem ad carnem habemus.

3. Quid aliud ignis ille devorabit , nisi peccata tua ? Quanto amplius tibi ipsi nunc parcis & carnem sequeris , tanto durius postea lues & majorem materiam comburendi reservas. In quibus homo peccavit , in illis gravius punietur. Ibi acediosi ardentibus stimulis perurgebuntur , & gulosi ingenti siti ac fame cruciabuntur : ibi luxuriosi & voluptatum amatores ardenti pice & foetido sulphure perfundentur ; & sicut furiosi canes , præ dolore , invidiosi ululabunt.

4. Nullum vitium erit , quod suum proprium cruciatum non habebit. Ibi superbi omni confusione replebuntur , & avari miserimâ

LIBER I. CAP. XXIV. 73

ferrimâ egestate arctabuntur. Ibi erit una hora gravior in poenâ, quam hîc centum anni in gravissimâ poenitentiâ. Ibi nulla requies est, nulla consolatio damnatis; hîc tamen interdum cessatur à laboribus, atque amicorum fruitur solatiis. Esto modo sollicitus & dolens pro peccatis tuis, ut in die judicii securus sis cum Beatis : *tunc enim stabunt justi in magnâ constantiâ adversus eos qui se angustiaverunt* (Sap. v, 1) & depresserunt; tunc stabit ad judicandum qui modo se subjecit humiliter judiciis hominum; tunc magnam fiduciam habebit pauper & humilis, & pavebit undique superbus.

5. Tunc videbitur sapiens in hoc mundo fuisse, qui pro Christo didicit stultus & despectus esse; tunc placebit omnis tribulatio patienter perpeffa, & *omnis iniquitas oppilabit os suum* (Ps. cvj, 42); tunc gaudebit omnis devotus, & moerebit omnis irreligiosus; tunc plus exultabit caro afflicta, quam si in deliciis fuisset semper nutrita; tunc splendeat habitus vilis, &

74 *DE IMIT. CHRISTI.*

obtenebrescet vestis subtilis ; tunc plus laudabitur pauperculum domicilium quam deauratum palatium ; tunc juvabit plus constans patientia quam omnis mundi potentia ; tunc ampliùs exaltabitur simplex obedientia quam omnis secularis astutia.

6. Tunc plus lætificabit pura & bona conscientia quam docta philosophia ; tunc plus ponderabit contemptus divitiarum quam totus thesaurus terrigenarum ; tunc magis consolaberis super devotâ oratione quam super delicatâ comestione ; tunc plus gaudabis de servato silentio quam de longâ fabulatione ; tunc plus valebunt sancta opera quam multa pulchra verba ; tunc plus placebit stricta vita & ardua pœnitentia quam omnis delectatio terrena. Disce te nunc in modico pati, ut tunc à gravioribus valeas liberari. Hic primo proba quid possis postea : si nunc tam parum vales sustinere, quomodo æterna tormenta poteris sufferre ? si modo modica passio tam impatientem efficit, quid gehenna tunc faciet ? Ecce verè non potes duo gaudia habere ;

LIBER I. CAP. XXIV. 75

delectari hîc in mundo , & postea regnare cum CHRISTO.

7. Si usque in hodiernum diem semper in honoribus & voluptatibus vixisses ; quid totum tibi profuisset , si jam mori in instanti contingeret ? *Omnia ergo vanitas* (Eccle. j , 2) , præter amare Deum & illi soli servire. Qui enim Deum ex toto corde amat , nec mortem , nec supplicium , nec iudicium , nec Infernum metuit ; quia perfectus amor securum ad Deum accessum facit : quem autem adhuc peccare delectat , non mirum si mortem & iudicium timeat. Bonum tamen est ut , si necdum amor à malo te revocat , saltem timor gehennalis coërceat. Qui vero timorem Dei postponit , diu stare in bono non valebit , sed Diaboli laqueos citius incurret.





CAPUT XXV.

*De ferventi emendatione totius vitæ
nostræ.*

1. **E**STO vigilans & diligens in Dei servitio ; & cogita frequenter , ad quid huc venisti , & cur sæculum reliquisti : nonne ut Deo viveres & spiritualis homo fieres ? Igitur ad profectum ferveas , quia mercedem laborum tuorum in brevi recipies , nec erit tunc ampliùs timor aut dolor in finibus tuis. Modicum nunc laborabis , & magnam requiem , immo perpetuam lætitiā , invenies. Si tu permanferis fidelis & fervidus in agendo , Deus procul dubio erit fidelis & locuples in retribuendo. Spem bonam retinere debes quod ad palmam pervenies ; sed securitatem capere non oportet , ne torpeas aut elatus fias.

2. Quum quidam anxius inter metum & spem frequenter fluctuaret , & quādam vice mœrore confectus in ecclesiā ante

quoddam altare se in oratione prostravisset ; hæc intrà se revolvit , dicens , « O ! si » scirem quod adhuc perseveraturus essem ! » statimque audivit divinum intus responsum : » Quod si hoc scires , quid facere » velles ? fac nunc quod tunc facere velles , » & bene securus eris ». Moxque consolatus & confortatus , divinæ se commisit voluntati ; & cessavit anxia fluctuatio : noluitque curiosè investigare ut sciret quæ sibi essent futura ; sed magis studuit inquirere quæ esset voluntas Dei bene placens & perfecta , ad omne opus bonum inchoandum & perficiendum.

3. *Spera in Domino , & fac bonitatem ;* ait propheta ; *& inhabita terram , & pascèris in divitiis ejus* (Pf. xxxvj , 3). Unum est quod multos à profectu & ferventi emendatione retrahit , horror difficultatis seu labor certaminis : enimvero illi maxime præ cæteris in virtutibus proficiunt , qui ea quæ sibi magis gravia & contraria sunt viriliùs vincere nituntur ; nam ibi homo plus proficit & gratiam meretur am-

• 78 *DE IMIT. CHRISTI.*

pliolem, ubi magis se ipsum vincit & in spiritu mortificat.

4. Sed non omnes habent æquè multum ad vincendum & moriendum. Diligens tamen æmulator valentior erit ad proficiendum, etiamsi plures habeat passionēs, quam alius bene morigeratus, minùs tamen fervens ad virtutes. Duo specialiter ad magnam emendationem juvant; videlicet subtrahere se violenter ab eo ad quod natura vitiosè inclinatur, & ferventer instare pro eo bono quo ampliùs quis indiget. Illa etiam studeas magis cavere & vincere quæ tibi frequentius in aliis displicent.

5. Ubique profectum tuum capias; ut, si bona exempla videas vel audias, ad imitandum accendaris: si quid autem reprehensibile consideraveris, cave ne idem facias; aut, si aliquando fecisti, citiùs emendare te studeas. Sicut oculus tuus alios considerat, sic iterum ab aliis notaris. Quam jucundum & dulce est videre fervidos & devotos fratres, bene morigera-

LIBER I. CAP. XXV. 79

tos & disciplinatos ! quam triste est & grave videre inordinatè ambulantes , qui ex ad quæ vocati sunt non exercent ! quam nocivum est negligere vocationis suæ propositum , & ad non commissa sensum inclinare !

6. Memor esto arrepti propositi , & imaginem tibi propone Crucifixi. Bene verecundari potes , inspectâ vitâ JESU-CHRISTI ; quia necdum magis illi te conformare studuisti , licet diu in viâ Dei fuisti. Religiosus qui se intentè & devotè in sanctissimâ vitâ & passione Domini exercet , omnia utilia & necessaria sibi abundanter ibi inveniet ; nec opus est ut extra JESUM aliquid melius quærat. O ! si JESUS crucifixus in cor nostrum veniret , quam cito & sufficienter docti essemus !

7. Religiosus fervidus omnia bene portat & capit quæ illi jubentur. Religiosus negligens & tepidus habet tribulationem super tribulationem , & ex omni parte patitur angustiam ; quia interiori consolatione caret , & exteriorem quærere prohibe-

80 *DE IMIT. CHRISTI.*

tur. Religiosus extra disciplinam vivens gravi ruinæ patet. Qui laxiora quærit & remissiora, semper in angustiis erit; quia unum aut reliquum sibi displicebit.

8. Quomodo faciunt tam multi alii Religiosi, qui satis arctati sunt sub disciplinâ claustrali? Raro exeunt, abstractè vivunt, pauperrimè comedunt, grossè vestiuntur, multum laborant, parum loquuntur, diu vigilant, maturè surgunt, orationes prolongant, frequenter legunt, & se in omni disciplinâ custodiunt. Attende carthusienses, cistercienses, & diversæ religionis monachos ac moniales, qualiter omni nocte ad psallendum Domino assurgunt: & ideo turpe esset ut tu deberes in tam sancto opere pigritare, ubi tanta multitudo Religiosorum incipit Deo jubilaré.

9. O! si nihil aliud faciendum incumberet, nisi Dominum Deum nostrum toto corde & ore laudare! o! si nunquam indigeres comedere, nec bibere, nec dormire; sed semper posses Deum laudare, & solummodo spiritualibus studiis vacare!

LIBER I. CAP. XXV. 81

tunc multo felicior esses quam modo , quum
carni ex qualicumque necessitate ferveis.
Utinam non essent istæ necessitates , sed
solummodo spirituales animæ refectiones ,
quas , heu ! satis raro degustamus !

10. Quando homo ad hoc pervenit quod
de nullâ creaturâ consolationem suam quæ-
rit : tunc ei Deus primo perfectè sapere
incipit ; tunc etiam bene contentus de om-
ni eventu rerum erit ; tunc nec pro magno
lætabitur , nec pro modico contristabitur ;
sed ponet se integrè & fiducialiter in Deo ,
qui est ei omnia in omnibus , cui nihil
utique perit nec moritur , sed omnia ei
vivunt & ad nutum incunctanter deserviunt.

11. Memento semper finis , & quia per-
ditum non redit tempus. Sine solitudine
& diligentia nunquam acquies virtutes. Si
incipis tepescere , incipies malè habere : si
autem dederis te ad fervorem , invenies
magnam pacem , & senties levio-rem labo-
rem propter Dei gratiam & virtutis amo-
rem. Homo fervidus & diligens ad omnia
est paratus. Major labor est resistere vitis

82 *DE IMIT. CHRISTI.*

& passionibus , quam corporalibus insudare laboribus. Qui parvos non vitat defectus paulatim labitur ad majores. Gaudebis semper vespere , si diem expendas fructuosè. Vigila super te ipsum ; excita te ipsum ; admone te ipsum ; & quidquid de aliis sit , non negligas te ipsum. Tantum proficies , quantum tibi ipsi vim inruleris.

*Expliciunt admonitiones ad spiritualem
vitam utiles.*



54



Marillier del. De Longueil sculp.
Marie Magdeleine aux pieds du Seigneur
chez Simon le Pharisien.



D E

IMITATIONE CHRISTI.

LIBER SECUNDUS.

Admonitiones ad interna trahentes.



CAPUT I.

De internâ conversatione.

REGNUM Dei intrâ vos est, dicit Dominus (Luc. xvij, 21). Converte te ex toto corde tuo ad Dominum & relinque hunc miserum mundum, & inveniet anima tua requiem. Disce exteriora contemnere & ad interiora te dare, & videbis regnum Dei in te venire: est enim regnum Dei *pax & gaudium in Spiritu sancto* (Rom.

D vj

84 DE IMIT. CHRISTI.

xiv, 17), quod non datur impiis. Veniet ad te CHRISTUS ostendens tibi consolationem suam, si dignam illi ab intus paraveris mansionem. *Omnis gloria ejus & decor ab intus* (Pl. xiv, 14) est, & ibi complacet sibi. Frequens illi visitatio cum homine interno, dulcis fermocinatio, grata consolatio, multa pax, familiaritas stupenda nimis.

2. Eia, Anima fidelis, præpara huic sponso cor tuum, quatenus ad te venire & in te habitare dignetur. Sic enim dicit: *Si quis diligit me, sermonem meum servabit, & Pater meus diliget eum, & ad eum veniemus, & mansionem apud eum faciemus* (Joan. xiv, 23). Da ergo CHRISTO locum, & ceteris omnibus nega introitum. Quum CHRISTUM habueris, dives es & sufficit tibi: ipse erit provisor tuus & fidelis procurator in omnibus, ut non sit opus in hominibus sperare; homines enim cito mutantur & deficiunt velociter, CHRISTUS autem manet in æternum & adstat usque in finem firmiter.

LIBER. II. CAP. j. 85

3. Non est magna fiducia ponenda in homine fragili & mortali, etiamsi utilis sit & dilectus; neque tristitia multa ex hoc capienda, si interdum advescentur & contradicat. Qui hodie tecum sunt cras contrariari possunt, & è converso; sæpe ut aura vertuntur. Pone totam fiduciam in Deo, & sit ipse timor tuus & amor tuus: ipse pro te respondebit, & faciet bene sicut melius fuerit. *Non habes hîc manentem civitatem* (Hebr. xiiij, 14); & ubicumque fueris, extraneus es & peregrinus, nec requiem aliquando habebis, nisi CHRISTO intimè fueris unitus.

4. Quid hîc circumspicis, quum iste non sit locus tuæ requietionis? in cœlestibus debet esse habitatio tua, & sicut in transitu cuncta terrena sunt aspicienda. Transseunt omnia, & tu cum eis pariter. Vide ut non inhæreas, ne capiaris & pereas. Apud Altissimum sit cogitatio tua, & deprecatio tua ad CHRISTUM sine intermissione dirigatur. Si nescis speculari alta & cœlestia, requiesce in passione CHRISTI,

88 DE IMIT. CHRISTI.

fectè tibi ipsi mortuus nec segregatus ab omnibus terrenis. Nil sic maculat & implicat cor hominis, sicut impurus amor in creaturis. Si renuis consolari, exterius poteris speculari cœlestia & frequenter jubilare interiùs.



C A P U T I I.

De humili submissione.

NON magni pendas quis pro te vel contra te sit, sed hoc age & cura ut Deus tecum sit in omni re quam facis. Habeas conscientiam bonam, & Deus bene te defensabit : quem enim Deus adjuvare voluerit, nullius perversitas nocere poterit. Si tu scis tacere & pati, videbis procul dubio auxilium Domini. Ipse novit tempus & modum liberandi te, & ideo te debes illi resignare. Dei est adjuvare & ab omni confusione liberare. Sæpe valde prodest ad majorem humilitatem conservandam, quod defectus nostros alii sciunt & redargunt.

LIBER II. CAP. ij. 89

2. Quando homo pro defectibus suis se humiliat, tunc faciliter alios placat & leviter satisfacit sibi irascentibus. Humilem Deus protegit & liberat; humilem diligit & consolatur; humili homini se inclinat; humili largitur gratiam magnam, & post suam depressionem levat ad gloriam; humili sua secreta revelat, & ad se dulciter trahit & invitat. Humilis, acceptâ confusione, satis bene est in pace, quia stat in Deo, & non in mundo. Non reputes te aliquid profecisse, nisi omnibus inferiorem te esse sentias.



C A P U T I I I.

De bono pacifico homine.

1. **T**ENE te primo in pace, & tunc poteris alios pacificare. Homo pacificus magis prodest quam bene doctus. Homo passionatus etiam bonum in malum trahit, & faciliter malum credit. Bonus pacificus homo omnia ad bonum convertit. Qui bene

90 *DE IMIT. CHRISTI.*

in pace est de nullo suspicatur : qui autem malè contentus est & commotus , variis suspicionibus agitur ; nec ipse quiescit , nec alios quiescere permittit. Dicit sæpe quod dicere non deberet , & omittit quod sibi magis facere expediret : considerat quod alii facere tenentur , & negligit quod ipse tenetur. Habe ergo primo zelum super te ipsum , & tunc justè zelare poteris etiam proximum tuum.

2. Tu bene scis facta tua excusare & colorare , & aliorum excusationes non vis recipere : justius esset ut te accusares & fratrem tuum excusares. Si portari vis , porta & alium. Vide quam longè es adhuc à verâ caritate & humilitate , quæ nulli novit irasci vel indignari , nisi tantum sibi. Non est magnum cum bonis & mansuetis conversari ; hoc enim omnibus naturaliter placet , & unusquisque libenter pacem habet & secum sentientes magis diligit : sed cum duris & perversis , aut indisciplinatis , aut nobis contrariantibus pacificè posse vivere , magna gratia est & laudabile nimis virileque factum.

LIBER II. CAP. iij. 91

3. Sunt qui se ipsos in pace tenent & cum aliis etiam pacem habent : & sunt qui nec pacem habent nec alios in pace dimittunt ; aliis sunt graves , sed sibi semper graviores : & sunt qui se ipsos in pace retinent & ad pacem alios reducere student. Est tamen tota pax nostra , in hac miserabili vitâ , potius in humili sufferentiâ ponenda quam in non sentiendo contraria. Qui melius scit pati majorem tenebit pacem : iste est victor sui & dominus mundi , amicus CHRISTI & heres cœli.



C A P U T I V.

De purâ mente & simplici intentione.

1. **D**UABUS alis homo sublevatur à terrenis , simplicitate scilicet & puritate. Simplicitas debet esse in intentione ; puritas , in affectione : simplicitas intendit Deum , puritas apprehendit & gustat. Nulla bona actio te impediet , si liber intus ab inordinato affectu fueris. Si nihil aliud quam

92 *DE IMIT. CHRISTI.*

Dei beneplacitum & proximi utilitatem intendis & quæris, internâ libertate perfruêris. Si rectum cor tuum esset, tunc omnis creatura speculum vitæ & liber sanctæ doctrinæ esset. Non est creatura tam parva & vilis, quæ Dei bonitatem non repræsentet.

2. Si tu esses intus bonus & purus, tunc omnia sine impedimento videres & bene caperes. Cor purum penetrat cœlum & infernum. Qualis unusquisque intus est, taliter judicat exterius. Si est gaudium in mundo, hoc utique possidet puri cordis homo: & si est alicubi tribulatio & angustia, hoc melius novit mala conscientia. Sicut ferrum missum in ignem amittit rubiginem & totum candens efficitur, sic homo integrè ad Deum se convertens à torpore exuitur & in novum hominem transmutatur.

3. Quando homo incipit tepescere, tunc parvum metuit laborem & libenter externam accipit consolationem. Sed quando perfectè incipit se vincere & viriliter in viâ Dei ambulare, tunc minùs ea reputat quæ sibi priùs gravia esse sentiebat.



CAPUT V.

De propriâ consideratione.

1. **N**ON possumus nobis ipsis nimis credere, quia sæpe gratia nobis deest & sensus. Modicum lumen est in nobis, & hoc cito per negligentiam amittimus. Sæpe etiam non advertimus quod tam cæci intus sumus. Sæpe malè agimus, & pejùs excusamus. Passione interdum movemur, & zelum putamus. Parva in aliis reprehendimus, & nostra majora pertransimus. Satis cito sentimus & ponderamus quid ab aliis sustinemus, sed quantum alii de nobis sustinent non advertimus. Qui benè & rectè sua ponderaret, non esset quod de alio graviter judicaret.

2. Internus homo sui ipsius curam omnibus curis anteponit; & qui sibi ipsi diligenter intendit, faciliter de aliis tacet. Nunquam eris internus & devotus, nisi de alienis silueris & ad te ipsum specialiter

94 *DE IMIT. CHRISTI.*

respexeris. Si tibi & Deo totaliter intendis, modicum te movebit quod foris percipis. Ubi es, quando tibi ipsi præsens non es? & quando omnia percurristi, quid, te neglecto, profecisti? Si debes habere pacem & unionem veram, oportet quod totum adhuc postponas, & te solum prae oculis habeas.

3. Multum proinde proficies, si te feriatum ab omni temporali curâ conserves: valde deficies, si aliquid temporale reputaveris. Nil magnum, nil altum, nil gratum, nil acceptum tibi sit, nisi purè Deus aut de Deo sit. Totum vanum existima quidquid consolationis occurrit de aliquâ creaturâ. Amans Deum anima sub Deo despicit universa. Solus Deus æternus & immensus, implens omnia, solatium animæ, & vera cordis lætitia.





CAPUT VI.

De lætitiâ bonæ conscientiæ.

I. **G**LORIA boni hominis testimonium bonæ conscientiæ. Habe bonam conscientiam, & habebis semper lætitiâ. Bona conscientia valde multa potest portare, & valde læta est inter adversa. Mala conscientia semper timida est & inquieta. Suaviter requiesces, si cor tuum te non reprehenderit. Noli lætari, nisi quum bene feceris. Mali nunquam habent veram lætitiâ, nec internam sentiunt pacem; quia *non est pax impiis, dicit Dominus* (Is. xlvij, 22 : lvij, 21). Et si dixerint. « In pace sumus, non venient super nos mala: » & quis nobis nocere audebit? » ne credas eis; quoniam repenti exsurgit ira Dei; & in nihilum rediguntur actus eorum, & peribunt omnes cogitationes eorum (Ps. cxlv, 4).

2. Gloriari in tribulatione non est grave

96 DE IMIT. CHRISTI.

amanti ; sic enim gloriari , est gloriari in cruce Domini. Brevis gloria , quæ ab hominibus datur & accipitur. Mundi gloriam semper comitatur tristitia. Bonorum gloria in conscientiiis eorum , & non in ore hominum. Justorum lætitia de Deo & in Deo est ; & gaudium eorum , de veritate. Qui veram & æternam gloriam desiderat , temporalem non curat ; & qui temporalem requirit gloriam aut non ex animo contemnit , minùs amare convincitur cœlestem. Magnam habet cordis tranquillitatem , qui nec laudes curat nec vituperia.

3. Facile erit contentus & pacatus , cujus conscientia munda est. Non es sanctior , si laudaris ; nec vilius , si vituperaris. Quod es , hoc es ; nec major dici vales quam Deo teste sis. Si attendis quid apud te sis intus , non curabis quid de te loquantur homines. Homo videt in facie ; Deus autem , in corde : homo considerat actus ; Deus vero pensat intentiones. Bene semper agere & modicum de se tenere , humilis animæ indicium est. Nolle consolari ab ali-

quâ

LIBER II. CAP. vj. 97

quâ creaturâ , magnæ puritatis & internæ fiduciæ signum est.

4. Qui nullum extrinsecus pro se testimonium quærit , liquet, quod totaliter se Deo commisit. *Non enim qui se ipsum commendat , ille probatus est , ait B. Paulus , sed quem Deus commendat. (II. Cor. x , 18).* Ambulare cum Deo intus nec aliquâ affectione teneri foris , status est interni hominis.

C A P U T VII.

De amore JESU super omnia.

I. **B**EATUS , qui intelligit quid sit amare JESUM & contemnere se ipsum propter JESUM. Oportet dilectum pro dilecto relinquere , quia JESUS vult solus super omnia amari. Dilectio creaturæ , fallax & instabilis ; dilectio JESU , fidelis & perseverabilis. Qui adhæret creaturæ , cadet cum labili ; qui amplectitur JESUM , firmabitur in ævum. Illum dilige & amicum tibi retine , qui , omnibus recedentibus , te non

E

98 DE IMIT. CHRISTI.

relinquet nec patietur in fine perire. Ab omnibus oportet te aliquando separari, five velis, five nolis.

2. Teneas te apud JESUM vivens ac moriens ; & illius fidelitati te committe, qui, omnibus deficientibus, solus te potest juvare. Dilectus tuus talis est naturæ, ut alienum non velit admittere ; sed solus vult cor tuum habere, & tanquam rex in proprio throno sedere. Si scires te bene ab omni creaturâ evacuare, JESUS deberet libenter tecum habitare. Penè totum perditum invenies quidquid extra JESUM in hominibus posueris. Non confidas nec innitaris super calamum ventosum, quia *omnis caro fœnum, & omnis gloria ejus quasi flos agri* (Is. xl, 6) cadet.

3. Cito decipieris, si ad externam hominum apparentiam tantum aspexeris. Si enim tuum in aliis quæris solatium & lucrum, senties sæpiùs detrimentum. Si quæris in omnibus JESUM, invenies utique JESUM : si autem quæris te ipsum, invenies etiam te ipsum, sed ad tuam perni-

LIBER II. CAP. vij 99

ciem ; plus enim homo nocivior sibi si JESUM non quærit, quam totus mundus & omnes sui adversarii.

CAPUT VIII.

De familiari amicitia JESU.

I. QUANDO JESUS adest, totum bonum est nec quidquam difficile videtur ; quando vero JESUS non adest, totum durum est. Quando JESUS intus non loquitur, consolatio vilis est ; si autem JESUS unum tantum verbum loquitur, magna consolatio sentitur. Nonne Maria Magdalena statim surrexit de loco in quo flevit, quando Martha illi dixit, *Magister adest & vocat te* (Joan. xj, 28) ? Felix hora, quando JESUS vocat de lacrymis ad gaudium spiritûs ! Quam aridus & durus es sine JESU ! quam insipiens & vanus, si cupis aliquid extra JESUM ! Nonne hoc est majus damnum, quam si totum perderes mundum ?

2. Quid potest tibi mundus conferre sine *JESU*? Esse sine *JESU*, gravis est infernus; & esse cum *JESU*, dulcis paradisus. Si fuerit tecum *JESUS*, nullus poterit nocere inimicus. Qui invenit *JESUM* invenit thesaurum bonum, immo bonum super omne bonum; & qui perdit *JESUM* perdit nimis multum, & plus quam totum mundum. Pauperrimus est, qui vivit sine *JESU*; & ditissimus, qui bene est cum *JESU*.

3. Magna ars est, scire cum *JESU* conversari; & scire *JESUM* tenere, magna prudentia. Esto humilis & pacificus, & erit tecum *JESUS*. Sis devotus & quietus, & manebit tecum *JESUS*. Potes cito fugare *JESUM* & gratiam ejus perdere, si volueris ad exteriora declinare; & si illum effugaveris & perdideris, ad quem fugies & quem tunc quæres amicum? Sine amico non potes bene vivere; & si *JESUS* non fuerit tibi præ omnibus amicus, eris nimis tristis & desolatus. Fatuegiūtur agis, si in aliquo altero confidis aut

lætaris. Eligendum est magis totum mundum habere contrarium quam **JESUM** offensum. Ex omnibus ergo caris, sit **JESUS** dilectus specialis.

4. Diligantur omnes propter **JESUM**; **JESUS** autem, propter se ipsum. Solus **JESUS-CHRISTUS** singulariter est amandus, quia solus bonus & fidelis præ omnibus invenitur amicis. Propter ipsum & in ipso, tam amici quam inimici tibi sint cari; & pro omnibus his exorandus est, ut omnes ipsum cognoscant & diligant. Nunquam cupias singulariter laudari vel amari; quia hoc solius Dei est, qui similem sibi non habet: nec velis quod aliquis tecum in corde suo occupetur, neque tu cum alicujus occuperis amore; sed sit **JESUS** in te & in omni bono homine.

5. Esto purus & liber ab intus sine alicujus creaturæ implicamento. Oportet te esse nudum & purum cor ad Deum gere-
re, si vis vacare & videre quam suavis sit Dominus. Et reverâ ad hoc non per-
venies, nisi gratiâ ejus fueris præventus &

intractus , ut , omnibus evacuatis & licentiatis , solus cum solo uniaris. Quando enim gratia Dei venit ad hominem , tunc potens fit ad omnia ; & quando recedit , tunc pauper & infirmus erit & quasi tantum ad flagella relictus. In his non debet dejici nec desperare , sed ad voluntatem Dei æquanimiter stare & cuncta supervenientia sibi ad laudem JESU-CHRISTI perpeti ; quia post hiemem sequitur æstas , post noctem redit dies , & post tempestatem magna serenitas.



C A P U T I X.

De carentiâ omnis solatii.

I. **N**ON est grave humanum contemnere solatium , quum adest divinum. Magnum est & valde magnum tam humano quam divino posse carere solatio , & pro honore Dei libenter exsilium cordis velle sustinere , & in nullo se ipsum quærere , nec ad proprium meritum respicere. Quid magni

est , si hilaris sis & devotus adveniente gratiâ ? optabilis cunctis hæc hora. Satis suaviter equitat , quem gratia Dei portat : & quid mirum , si onus non sentit qui portatur ab Omnipotente & ducitur à summo ductore ?

2. Libenter habemus aliquid pro solatio , & difficulter homo exiit à se ipso. Vicit sanctus martyr Laurentius seculum cum suo sacerdote ; quia omne quod in mundo delectabile videbatur despexit , & summum Dei sacerdotem Sixtum , quem maximè diligebat , pro amore CHRISTI etiam à se tolli clementer ferebat. Amore igitur Creatoris amorem hominis superavit , & pro humano solatio divinum beneplacitum magis elegit. Ita & tu aliquem necessarium & dilectum amicum pro amore Dei discere relinquere ; nec graviter feras quum ab amico derelictus fueris , sciens quoniam oportet nos omnes tandem ab invicem separari.

3. Multum & diu oportet hominem in se ipso certare , ante quam discat se ip-

sum plenè superare & totum affectum suum in Deum trahere. Quando homo stat super se ipsum, facilè labitur ad consolationes humanas. Sed verus amator CHRISTI & studiosus sectator virtutum, non cadit super consolationes nec quærit tales sensibiles dulcedines, sed magis fortes exercitationes & pro CHRISTO duros sustinere labores.

4. Quum igitur spiritualis à Deo consolatio datur, cum gratiarum actione accipe eam; sed Dei munus intellige esse, non tuum meritum. Noli extolli, noli nimium gaudere nec inaniter præsumere: sed esto magis humilior ex dono, cautior quoque, & timoratio in cunctis actibus tuis; quoniam transibit hora illa & sequetur tentatio. Quum ablata fuerit consolatio, non statim desperes; sed cum humilitate & patientiâ expecta cœlestem visitationem, quoniam potens est Deus ampliorrem tibi redonare consolationem. Istud non est novum, nec alienum viam Dei expertis; quia in magnis Sanctis & in an-

LIBER II. CAP. ix. 105

tiquis prophetis fuit sæpe talis alternationis modus.

5. Unde quidam, præfente jam gratiâ, dicebat; *Ego dixi in abundantia meâ, Non movebor in æternum* (Ps. xxix, 7) : absente vero gratiâ, quid in se fuerit expertus adjungit, dicens; *Avertisti faciem tuam à me, & factus sum conturbatus* (Ib. 8). Inter hæc tamen nequaquam desperat, sed instantius Dominum rogat & dicit; *Ad te, Domine, clamabo, & ad Deum meum deprecabor* (Ib. 9). Denique orationis suæ fructum reportat & se exauditum testatur, dicens; *Audivit Dominus & misertus est mei, Dominus factus est adjutor meus* (Ib. 11) : sed in quo? *Convertisti*, inquit, *planctum meum in gaudium mihi, & circumdedit me lætitiâ* (Ib. 12). Si sic actum est cum magnis Sanctis, non est desperandum nobis infirmis & pauperibus, si interdum in fervore & interdum in frigiditate sumus; quoniam Spiritus venit & recedit secundum suæ beneplacitum voluntatis. Unde beatus Job ait: *Vistas cum diluculo,*

& subito probas illum (Job. vij, 18).

6. Super quid igitur sperare possum aut in quo confidere debeo, nisi in solâ misericordiâ Dei & in solâ spe gratiæ cœlestis ? Sive enim adsint homines boni, sive devoti fratres vel amici fideles, sive libri sancti vel tractatus pulchri, sive dulcis cantus & hymni; omnia hæc modicum juvant, modicum sapiunt, quando desertus sum à gratiâ & in propriâ paupertate relictus. Tunc non est melius remedium, quam patientia & abnegatio mei in voluntate Dei.

7. Nunquam inveni aliquem tam religiosum & devotum, qui non habuerit interdum gratiæ subtractionem aut non senserit fervoris diminutionem. Nullus Sanctus fuit tam altè raptus & illuminatus, qui, prius vel postea, non fuit tentatus. Non enim dignus est altâ Dei contemplatione, qui pro Deo non est exercitatus aliquâ tribulatione; solet enim sequentis consolationis tentatio præcedens esse signum. Nam tentationibus probatis cœlestis pro-

mittitur consolatio. *Vincenti*, inquit, *dabo edere de ligno vitæ* (Apoc. ij, 7).

8. Datur autem consolatio divina, ut homo fortior sit ad sustinendum adversa. Sequitur etiam tentatio, ne se elevet de bono. Non dormit diabolus, nec caro adhuc mortua est; ideo non cesses te præparare ad certamen, quia à dextris & à sinistris hostes sunt, qui nunquam quiescunt.

C A P U T X.

De gratitudine pro gratiâ Dei.

1. **C**UR quæris quietem, quum natus sis ad laborem? Pone te ad patientiam magis quam ad consolationes, & ad crucem portandam magis quam ad lætitiâ. Quis enim secularium non libenter consolationem & lætitiâ spirituale acciperet, si semper obtinere posset? Excedunt enim spirituales consolationes omnes mundi delicias & carnis voluptates: nam omnes

deliciæ mundanæ aut vanæ sunt aut turpes ; spirituales vero deliciæ , solæ jucundæ & honestæ , ex virtutibus progenitæ , & à Deo puris mentibus infusæ. Sed istis divinis consolationibus nemo semper pro suo affectu frui valet , quia tempus temptationis non diu cessat.

2. Multum autem contrariatur supernæ visitationi falsa libertas animi & magna confidentia sui. Deus bene facit , consolationis gratiam dando ; sed homo malè agit , non totum Deo cum gratiarum actione retribuendo. Et ideo non possunt in nobis dona gratiæ fluere , quia ingrati sumus auctori nec totum refundimus fontali origini ; semper enim datur gratia dignè gratias referenti , & auferetur ab elato quod dari solet humili.

3. Nolo consolationem quæ mihi aufert compunctionem , nec affectu contemplationem quæ ducit in elationem : non enim omne altum , sanctum ; nec omne dulce , bonum ; nec omne desiderium , purum ; nec omne carum , Deo gratum. Libenter

LIBER II. CAP. X. 109

accepto gratiam , unde semper humilior & timoratioꝝ inveniar atque ad relinquendum me paratioꝝ fiam. Doctus dono gratiæ & eruditus subtractionis verbere , non sibi audebit quidquam boni attribuere , sed potius se pauperem & nudum confitebitur. Da Deo quod Dei est , & tibi adscribe quod tuum est ; hoc est , Deo gratias pro gratiâ tribue , tibi autem soli culpam & dignam poenam pro culpâ deberi sentias.

4. Pone te semper ad infimum , & dabitur tibi summum ; nam summum non stat sine infimo. Summi Sancti apud Deum minimi sunt apud se ; & quanto gloriosiores , tanto in se humiliores. Pleni veritate & gloriâ coelesti , non sunt vanæ gloriæ cupidi. In Deo fundati & confirmati , nullo modo possunt esse elati : & qui totum Deo adscribunt quidquid boni acceperunt , gloriam ab invicem non quærunt ; sed gloriam quæ à solo Deo est volunt , & Deum in se & in omnibus Sanctis laudari super omnia cupiunt , & semper in idipsum tendunt.

5. Esto igitur gratus pro minimo , & eris dignus majora accipere. Sit tibi minimum etiam pro maximo , & magis contemptibile pro speciali dono. Si dignitas datoris inspicitur , nullum datum parvum aut nimis vile videbitur ; non enim parvum est quod à summo Deo donatur. Etiam si pœnas & verbera dederit , gratum esse debet ; quia semper pro salute nostrâ facit quidquid nobis advenire permittit. Qui gratiam Dei retinere desiderat , sit gratus pro gratiâ datâ , patiens pro sublatâ : oret ut redeat ; cautus sit & humilis , ne amittat.



C A P U T X I.

De paucitate amatorum crucis JESU.

I. **H**ABET JESUS nunc multos amatores regni sui cœlestis ; sed paucos bajulatores suæ crucis : multos habet desideratores consolationis ; sed paucos , tribulationis : plures invenit socios mensæ ; sed

LIBER II. CAP. xj. III

paucos , abstinentiæ. Omnes cupiunt cum eo gaudere , pauci volunt pro eo aliquid sustinere. Multi JESUM sequuntur usque ad fractionem panis ; sed pauci , usque ad bibendum calicem passionis. Multi miracula ejus venerantur ; pauci ignominiam crucis sequuntur. Multi JESUM diligunt quandiu adversa non contingunt ; multi illum laudant & benedicunt quandiu consolationes aliquas ab ipso percipiunt : si autem JESUS se absconderit & modicum eos reliquerit , aut in querimoniam vel in dejectionem nimiam cadunt.

2. Qui autem JESUM , propter JESUM & non propter suam aliquam consolationem , diligunt , ipsum in omni tribulatione & angustia cordis , sicut in summa consolatione , benedicunt : & si nunquam eis consolationem dare vellet , ipsum tamen semper laudarent & semper gratias agere vellent.

3. O ! quantum potest amor JESU purus , nullo proprio commodo vel amore permixtus ! Nonne omnes mercenarii sunt di-

cendi qui consolationes semper quærunt? Nonne amatores sui magis quam CHRISTI probantur, qui sua commoda & lucra semper meditantur? Ubi invenietur talis, qui velit Deo servire gratis?

4. Raro invenitur tam spiritualis aliquis, qui omnibus sit nudatus: nam verum pauperem spiritu & ab omni creaturâ nudum quis inveniet? *Procul & de ultimis finibus pretium ejus* (Proverb. xxxj, 10). Si dederit homo omnem substantiam suam, adhuc nihil est; & si fecerit poenitentiam magnam, adhuc exiguum est; & si apprehenderit omnem scientiam, adhuc longè est; & si habuerit virtutem magnam & devotionem nimis ardentem, adhuc multum sibi deest, scilicet unum quod summè sibi necessarium est. Quid illud? ut omnibus relictis se relinquat; & à se totaliter exeat; nihilque de privato amore retineat; quumque omnia fecerit quæ facienda noverit, nihil se fecisse sentiat.

5. Non grande ponderet quod grande æstimari possit; sed in veritate servum

LIBER II. CAP. xij. 113

inutilem se pronunciet, sicut Veritas ait: *Quum feceritis omnia quæ præcepta sunt vobis, dicite, Servi inutiles sumus* (Luc. xvij, 10). Tunc verè pauper & nudus spiritu esse poterit, & cum prophetâ dicere; *Quia unicus & pauper sum ego.* (Ps. xxiv, 16). Nemo tamen isto ditior, nemo potentior, nemo liberior, qui se & omnia relinquere scit & ad infimum se ponere.

C A P U T X I I.

De regiâ viâ sanctæ Crucis.

1. **D**URUS multis videtur hic sermo; *Abnega temet ipsum, tolle crucem tuam, & sequere JESUM* (Luc. ix, 23): sed multo durius erit audire illud extremum verbum; *Discedite à me, Maledicti, in ignem æternum* (Matth. xxv, 41). Qui enim modo libenter audiunt & sequuntur verbum crucis, tunc non timebunt ab auditione æternæ damnationis. Hoc signum crucis erit in cœlo, quum Dominus ad judican-

114 DE IMIT. CHRISTI.

dum venerit : tunc omnes servi crucis , qui se Crucifixo conformaverunt in vitâ , accedent ad CHRISTUM judicem cum magnâ fiduciâ.

2. Quid igitur times tollere crucem , per quam itur ad regnum ? in cruce salus , in cruce vita , in cruce protectio ab hostibus , in cruce infusio supernæ suavitatis , in cruce robur mentis , in cruce gaudium spiritûs , in cruce summa virtutis , in cruce perfectio sanctitatis ; non est salus animæ nec spes æternæ vitæ , nisi in cruce. Tolle ergo crucem tuam & sequere JESUM , & ibis in vitam æternam. Præcessit ille bajulans sibi crucem , & mortuus est pro te in cruce ; ut & tu tuam portes crucem , & mori affectes in cruce : quia , si commortuus fueris , etiam cum illo pariter vives ; & si socius fueris poenæ , eris & gloriæ.

3. Ecce in cruce totum constat , & in moriendo totum jacet ; & non est alia via ad vitam & ad veram internam pacem , nisi via sanctæ crucis & quotidianæ

LIBER II. CAP. xij. 115

mortificationis. Ambula ubi vis , quære quodcumque volueris ; & non invenies al-
torem viam supra nec securiorem viam
infra , nisi viam sanetæ crucis. Dispone &
ordina omnia secundum tuum velle & vi-
dere : & non invenies nisi semper aliquid
pati debere aut sponte aut invitè , & ita
crucem semper invenies ; aut enim in cor-
pore dolorem senties , aut in animâ spiri-
tûs tribulationem sustinebis.

4. Interdum à Deo relinquêris , inter-
dum à proximo exercitaberis , & quod
amplius est , sæpe tibimet ipsi gravis eris :
nec tamen aliquo remedio vel solatio li-
berari seu alleviari poteris , sed donec
Deus voluerit oportet ut sustineas ; vult
enim Deus , ut tribulationem sine con-
solatione pati discas , & ut illi totaliter
te subicias , & humilior ex tribulatione
fias. Nemo ita cordialiter sentit passionem
CHRISTI , sicut is cui contigerit similia
pati. Crux ergo semper parata est & ubi-
que te exspectat. Non potes effugere ubi-
cumque cucurreris ; quia , ubicumque ve-

116 DE IMIT. CHRISTI.

neris , te ipsum tecum portas & semper te ipsum invenies. Converte te supra , converte te infra , converte te extra , converte te intrà : & in his omnibus invenies crucem ; & necesse est te ubique tenere patientiam , si internam vis habere pacem & perpetuam promereri coronam.

5. Si libenter crucem portas , portabit te & ducet ad desideratum finem , ubi scilicet finis patiendi erit , quamvis hic non erit. Si invitè portas , onus tibi facis & te ipsum magis gravas ; & tamen oportet ut sustineas. Si abjicis unam crucem , aliam procul dubio invenies & forsitan graviolem.

6. Credis tu evadere quod nullus mortalium potuit præterire ? Quis Sanctorum in mundo sine cruce & tribulatione fuit ? Nec enim JESUS - CHRISTUS , Dominus noster , unâ horâ sine dolore passionis fuit quandiu vixit. *Oportuit* , ait , *pati CHRISTUM* , & resurgere à mortuis , & ita intrare in gloriam suam (Luc. xxiv ,

6): & quomodo tu aliam viam quæris quam hanc regiam viam, quæ est via sanctæ crucis?

7. Tota vita CHRISTI crux fuit & martyrium, & tu tibi quæris requiem & gaudium? Erras, erras, si aliud quæris, quam pati tribulationes; quia tota ista vita mortalis plena est miseriis & circumsignata crucibus. Et quanto altiùs quis in spiritu profecerit, tanto graviores sæpe cruces invenit; quia exilii sui poena magis ex amore crescit.

8. Sed tamen iste sic multipliciter afflictus non est sine levamine consolationis; quia fructum maximum sibi sentit accrescere ex sufferentiâ suæ crucis: nam dum sponte se illi subjicit, omne onus tribulationis in fiduciam divinæ consolationis convertitur; & quanto caro magis per afflictionem atteritur, tanto spiritus ampliùs per internam gratiam roboratur. Et nunquam in tantum confortatur ex affectu tribulationis & adversitatis, ob amorem conformitatis crucis CHRISTI, ut

malè habebis, & sequetur te ubique fuga tribulationis.

12. Si ponis te ad quod esse debes, videlicet ad patiendum & moriendum; fiet cito melius, & pacem invenies. Etiam- si raptus fueris usque ad tertium coelum cum Paulo, non es propterea securatus de nullo contrario patiundo. *Ego*, inquit *JESUS*, ostendam illi quanta oporteat eum pro nomine meo pati (Act. ix, 16). Pati ergo tibi remanet, si *JESUM* diligere & perpetuo illi servire placet.

13. Utinam dignus esses aliquid pro nomine *JESU* pati! quam magna gloria remaneret tibi! quanta exultatio omnibus Sanctis Dei! quanta quoque ædificatio esset proximi! Nam patientiam omnes recommendant, quamvis pauci tamen pati velint. Merito deberes libenter modicum pati pro *CHRISTO*, quum multi graviora patiuntur pro mundo.

14. Scias pro certo quia morientem te oportet ducere vitam: & quanto quisque plus sibi moritur, tanto magis Deo vivere incipit.

LIBER II. CAP. xij. 121

incipit. Nemo aptus est ad comprehendendum cœlestia , nisi se submiserit ad portandum pro CHRISTO aduersa. Nihil Deo acceptius , nihil tibi salubrius in mundo isto , quam libenter pati pro CHRISTO : & si eligendum tibi esset , magis optare deberes pro CHRISTO aduersa pati ; quam multis consolationibus recreari ; quia CHRISTO similior esses & omnibus Sanctis magis conformior. Non enim stat meritum nostrum & profectus statûs nostri , in multis suauitatibus & consolationibus ; sed potius in magnis gravitatibus & tribulationibus perferendis.

15. Si quidem aliquid melius & utilius saluti hominum quam pati fuisset , CHRISTUS utique verbo & exemplo ostendisset. Nam & sequentes se discipulos omnesque eum sequi cupientes manifestè ad crucem portandam hortatur , & dicit ; *Si quis vult post me venire , abneget semet ipsum , & tollat crucem suam quotidie , & sequatur me* (Luc. ix , 23). Omnibus ergo perfectis & scrutatis , sit hæc conclusio fina-

122 *DE IMIT. CHRISTI.*

lis ; Quoniam per multas tribulationes oportet nos intrare in regnum Dei (A&. xiv , 21).

Expliciunt admonitiones ad interna trahentes.







Variller Ino.

JESUS-CHRIST chez Marthe et Marie -

De Longuel. Sup.
Luc. C. 10. l. 38. - 45



DE
IMITATIONE
CHRISTI.

LIBER TERTIUS.

De internâ consolatione.

CAPUT I.

*De internâ CHRISTI loquutione
ad animam fidelem.*

I. AN. FID. *A*UDIAM quid loquatur in
me Dominus Deus (Pf. lxxxiv, 9). Beata
anima, quæ Dominum in se loquentem
audit, & de ore ejus verbum consolatio-
nis accipit ! Beatæ aures, quæ venas di-
vini susurri suscipiunt, & de mundi hujus
susurrationibus nihil advertunt ! Beatæ pla-
nè aures, quæ, non vocem foris sonantem,

sed intus auscultant Veritatem docentem ! Beati oculi , qui , exterioribus clausi , interioribus autem sunt intenti ! Beati , qui interna penetrant , & ad capienda arcana cœlestia magis ac magis per quotidiana exercitia se student præparare ! Beati , qui Deo vacare gestiunt & ab omni impedimento seculi se excutiunt ! Animadvertite hæc , Anima mea , & claude sensualitatis tuæ ostia , ut possis audire quid loquatur in te Dominus Deus tuus.

2. CHR. Hæc dicit dilectus tuus : *Salus tua ego sum* (Ps. xxxiv. 3) , pax tua , & vita tua. Serva te apud me , & pacem invenies ; dimitte omnia transitoria , quære æterna, Quid sunt omnia temporalia , nisi seductoria ? Et quid juvant omnes creaturæ , si fueris à Creatore deserta ? Omnibus ergo abdicatis , Creatori tuo te redde placitam ac fidelem , ut veram valeas apprehendere beatitudinem.





CAPUT II.

*Quod Veritas intus loquitur sine strepitu
verborum.*

1. AN. FID. **L**OQUERE, Domine, quia
audit servus tuus (I. Reg. iiij, 9, 10).
Servus tuus sum ego, da mihi intellectum ut
sciam testimonia tua (Pl. cxviii, 125). In-
clina cor meum in verba oris tui; fluat ut
ros eloquium tuum (Deut. xxxij, 2). Dice-
bant olim filii Israël ad Moysem: *Loquere*
tu nobis, & audiemus; non loquatur nobis
Dominus, ne forte moriamur (Exod. xx,
19). Non sic, Domine, non sic oro; sed
magis cum Samuele prophetâ humiliter ac
desideranter obsecro, *Loquere, Domine,*
quia audit servus tuus (I. Reg. iiij, 9, 10).
Non loquatur mihi Moyſes aut aliquis ex
prophetis: sed tu potiùs loquere, Domine
Deus, inspirator & illuminator omnium
prophetarum; quia tu ſolus ſine eis potes
me perfectè imbuere, illi autem ſine te
nihil proficient.

126 DE IMIT. CHRISTI.

2. Possunt quidem verba sonare , sed spiritum non conferunt : pulchriter dicunt ; sed , te tacente , cor non accendunt : litteras tradunt , sed tu sensum aperis : mysteria proferunt , sed tu reſeras intellectum signatorum : mandata edicunt , sed tu iuvas ad perficiendum : viam ostendunt , sed tu confortas ad ambulandum : illi foris tantum agunt , sed tu corda instruis & illuminas : illi exterius rigant , sed tu foecunditatem donas : illi clamant verbis , sed tu auditui intelligentiam tribuis.

3. Non ergo loquatur mihi Moyses , sed tu , Domine Deus meus , æterna Veritas : ne forte moriar & sine fructu efficiar , si fuero tantum foris admonitus & intus non accensus ; ne sit mihi ad iudicium verbum auditum & non factum , cognitum & non amatum , creditum & non servatum. *Loquere* igitur , Domine , quia audit servus tuus (I. Reg. iij , 9 , 10) ; verba enim vitæ æternæ habes (Joan. vj , 69). Loquere mihi ad qualemcumque animæ meæ consolationem , & ad totius vitæ meæ

LIBER III. CAP. iij. 127

emendationem ; tibi autem ad laudem , & gloriam , & perpetuum honorem.

C A P U T I I I.

*Quod verba Dei cum humilitate sunt
audienda , & quod multi ea non
ponderant.*

1. CHR. **A**UDI, Fili, verba mea , verba suavissima , omnem philosophorum & sapientium hujus mundi scientiam excedentia. *Verba mea spiritus & vita sunt* (Joan. vj, 64) , nec humano sensu pensanda : non sunt ad vanam complacentiam trahenda ; sed in silentio audienda , & cum omni humilitate atque magno affectu suscipienda.

2. AN. FID. Et dixi : *Beatus homo , quem tu erudieris , Domine , & de lege tuâ docueris eum , ut mitiges ei à diebus malis* (Ps. xcij, 12 , 13) , & non desoletur in terrâ.

3. CHR. Ego , inquit Dominus , docui prophetas ab initio , & usque nunc non cesso omnibus loqui ; sed multi ad vocem

meam furdi sunt & duri. Plures mundum libentiùs audiunt quam Deum, faciliùs sequuntur carnis suæ appetitum quam Dei beneplacitum. Promittit mundus temporalia & parva, & servitur ei aviditate magnâ; ego promitto summa & æterna, & torpescunt mortalium corda. Quis tantâ curâ mihi in omnibus servit & obedit, sicut mundo & dominis ejus servitur? *Erubescere, Sidon, ait mare* (Is. xxij, 4); & si causam quæris, audi quare. Pro modicâ præbendâ, longa via curritur; pro æternâ vitâ, à multis vix pes semel à terrâ levatur: vile pretium quæritur, pro uno numismate interdum turpiter litigatur, pro vanâ re & parvâ promissione diu noctuque fatigari non timetur.

4. Sed proh pudor! pro bono incommutabili, pro præmio inæstimabili, pro summo honore & gloriâ interminabili, vel ad modicum fatigari pigritatur. *Erubescere ergo, Serve piger & querulose*, quod illi paratiores inveniuntur ad perditionem quam tu ad vitam; gaudent illi amplius ad vani-

LIBER III. CAP. iij. 129

tatem quam tu ad veritatem. Equidem à spe suâ nonnunquam frustrantur ; sed promissio mea neminem fallit, nec confidentem mihi dimittit inanem. Quod promisi dabo , quod dixi implebo , si tamen usque in finem fidelis in dilectione meâ quis permanserit : ego remunerator sum omnium bonorum , & fortis probator omnium devotorum.

5. Scribe verba mea in corde tuo , & pertracta diligenter ; erunt enim in tempore tentationis valde necessaria. Quod non intelligis quum legis , cognosces in die visitationis. Dupliciter soleo electos meos visitare , tentatione scilicet & consolatione : & duas lectiones eis quotidie lego ; unam, increpando eorum vitia ; alteram , exhortando ad incrementa virtutum. *Qui spernit me & non accipit verba mea , habet qui iudicet eum... in novissimo die (Joan. xij , 48).*

ORATIO

ad implorandam devotionis gratiam.

6. AN. FID. DOMINE Deus , omnia bona mea tu es. Et quis ego sum , ut au-

F v

130 DE IMIT. CHRISTI.

deam ad te loqui ? Ego sum pauperrimus
servulus tuus , & abjectus vermiculus , mul-
to pauperior & contemptibilior quam scio
& dicere audeo. Memento tamen , Domi-
ne , quia nihil sum , nihil habeo , nihilque
valeo. Tu solus bonus , iustus , & sanctus ;
tu omnia potes , omnia præstas , omnia
imples , solum peccatorem inanem relin-
quens. *Reminiscere miserationum tuarum* (Ps.
xxiv , 6) , & imple cor meum gratiâ tuâ ,
qui non vis esse vacua opera tua.

7. Quomodo possum me tolerare in hâc
miserâ vitâ , nisi me confortaverit miseri-
cordia & gratia tua ? Noli *avertere faciem*
tuam à me (Ps. xxvj , 9) , noli visitatio-
nem tuam prolongare , noli consolationem
tuam abstrahere ; ne fiat *anima mea sicut*
terra sine aquâ tibi (Ps. cxlij , 6). Domi-
ne , *doce me facere voluntatem tuam* (Ibid.
10) , doce me coram te dignè & humiliter
conversari ; quia sapientia mea tu es , qui
in veritate me cognoscis , & cognovisti ante
quam fieret mundus & ante quam natus
essem in mundo.



C A P U T I V.

*Quod in veritate & humilitate coram
Deo conversandum est.*

1. CHR. **F**ILI, ambula coram me in veritate, & in simplicitate cordis tui quære me semper. Qui ambulat coram me in veritate tutabitur ab incurfibus malis, & veritas liberabit eum à seductoribus & detractionibus iniquorum. Si veritas te liberaverit, verè liber eris & non curabis de vanis hominum verbis.

2. AN. FID. Domine, verum est sicut dicis; ita, quæso, mecum fiat. Veritas tua me doceat, ipsa me custodiat & usque ad salutarem finem conservet: ipsa me liberet ab omni affectione malâ & inordinatâ dilectione, & ambulabo tecum in magnâ cordis libertate.

3. CHR. Ego te docebo, ait Veritas, quæ recta sunt & placita coram me. Cogita peccata tua cum displicentiâ magnâ

132 *DE IMIT. CHRISTI.*

& mœrore , & numquam reputes te aliquid esse propter opera bona. Reverâ peccator es ; & multis passionibus obnoxius & implicatus. Ex te semper ad nihilum tendis ; cito laberis , cito vinceris , cito turbaris , cito dissolveris ; non habes quidquam unde possis gloriari , sed multa unde te debeas vilificare ; quia multo infirmior es quam vales comprehendere.

4. Nil ergo magnum tibi videatur ex omnibus quæ agis ; nil grande , nil pretiosum & admirabile , nil reputatione appareat dignum , nil altum , nihil verè laudabile & desiderabile , nisi quod æternum est. Placeat tibi super omnia æterna veritas ; displiceat tibi semper tua maxima vitia. Nil sic timeas , sic vituperes & fugias , sicut vitia & peccata tua , quæ magis displicere debent quam quælibet rerum damna. Quidam non sincerè eorum me ambulant ; sed quâdam curiositate & arrogantia ducti , volunt secreta mea scire & alta Dei intelligere , se & suam salutem negligentes : hi sæpe in magnas tentationes

LIBER III. CAP. IV. 133

& peccata , propter suam superbiam & curiositatem me eis adversante , labuntur.

5. Time judicia Dei , expavesce iram Omnipotentis. Noli autem discutere opera Altissimi ; sed tuas iniquitates perscrutare , in quantis deliquisti , & quam multa bona neglexisti. Quidam solum portant suam devotionem in libris ; quidam , in imaginibus ; quidam autem , in signis exterioribus & figuris. Quidam habent me in ore , sed modicum est in corde. Sunt alii qui , intellectu illuminati & affectu purgati , ad æterna semper anhelant , de terrenis graviter audiunt , necessitatibus naturæ dolenter inserviunt : & hi sentiunt quid Spiritus loquatur in eis ; quia docet eos terrena despicere & amare cœlestia , mundum negligere & cœlum totâ die ac nocte desiderare.





CAPUT V,

De mirabili effectū divini amoris.

I. AN. FID. **B**ENEDICO te, Pater cœlestis, Pater Domini mei JESU-CHRISTI, quia mei pauperis dignatus es recordari. *O Pater misericordiarum & Deus totius consolationis* (II. Cor. j, 3), gratias tibi, qui me, indignam omni consolatione, quandoque tuâ recreas consolatione. Benedico te semper & glorifico, cum unigenito Filio tuo & Spiritu sancto Paracleto, in secula seculorum. Eia, Domine Deus, Amator sancte meus, quum tu veneris in cor meum exsultabunt omnia interiora mea. Tu es gloria mea & *exsultatio cordis mei* (Ps. cxviii, iii); tu spes mea & refugium meum in die tribulationis meæ.

2. Sed quia adhuc debilis sum in amore & imperfectus in virtute, ideo necesse habeo à te confortari & consolari; propterea visita me sæpius & instrue disciplinis

LIBER III. CAP. V. 135

sanctis. Libera me à passionibus malis, & sana cor meum ab omnibus affectionibus inordinatis; ut, intus sanatus & bene purgatus, aptus efficiat ad amandum, fortis ad patiendum, stabilis ad perseverandum.

3. Magna res est amor, magnum omnino bonum, quod solum leve facit omne onerosum, & fert æqualiter omne inæquale; nam onus sine onere portat, & omne amarum dulce ac sapidum efficit. Amor JESU nobilis ad magna operanda impellit, & ad desideranda semper perfectiora excitat. Amor vult esse sursum, nec ullis infimis rebus retineri. Amor vult esse liber & ab omni mundanâ affectione alienus, ne internus ejus impediatur aspectus, ne per aliquod commodum temporale implicationes sustineat aut per incommodum succumbat. Nihil dulcius est amore, nihil fortius, nihil altius, nihil latius, nihil jucundius, nihil plenius nec melius in cœlo & in terrâ; quia amor ex Deo natus est, nec potest nisi in Deo super omnia creata quiescere.

136 *DE IMIT. CHRISTI.*

4. Amans volat , currit , & lætatur ; liber est , & non tenetur. Dat omnia pro omnibus , & habet omnia in omnibus ; quia in uno summo super omnia quiescit , ex quo omne bonum fluit & procedit. Non respicit ad dona , sed ad donantem se convertit super omnia bona. Amor modum sæpe nescit , sed super omnem modum fervescit. Amor onus non sentit , labores non reputat ; plus affectat quam valet ; de impossibilitate non causatur , quia cuncta sibi posse & licere arbitratur. Valet igitur ad omnia ; & multa implet & effectui mancipat, ubi non amans deficit & jacet.

5. Amor vigilat , & dormiens non dormitat : fatigatus non lassatur , arctatus non coarctatur , territus non conturbatur ; sed , sicut vivax flamma & ardens facula , sursum erumpit securèque pertransit. Si quis amat , novit quid hæc vox clamet. Magnus clamor in auribus Dei est ipse ardens affectus animæ quæ dicit , » Deus meus ! » Amor meus ! tu totus meus , & ego totus » tuus. ».

LIBER III. CAP. V. 137

6. Dilata me in amore, ut discam interiori cordis ore degustare, quam suave sit amare & in amore liquefieri & natare. Tenear amore, vadens supra me præ nimio fervore & stupore; cantem amoris canticum; sequar te dilectum meum in altum; deficiat in laude tuâ anima mea, jubilans ex amore. Amem te plus quam me, nec me nisi propter te, & omnes in te qui verè amant te, sicut jubet lex amoris lucens ex te.

7. Est amor velox, sincerus, pius, jucundus & amœnus, fortis, patiens, fidelis, prudens, longanimis, virilis, & se ipsum nunquam quærens; ubi enim se ipsum aliquis quærit, ibi ab amore cadit. Est amor circumspectus, humilis & rectus; non mollis, non levis, nec vanis intendens rebus; sobrius, castus, stabilis, quietus, & in cunctis sensibus custoditus. Est amor subjectus & obediens prælatis, sibi vilis & despectus, Deo devotus & graticus, fidens & sperans semper in eo, etiam quum sibi non sapit Deus; quia sine dolore non vivitur in amore.

138 *DE IMIT. CHRISTI.*

8. Qui non est paratus omnia pati, & ad voluntatem stare dilecti, non est dignus amator appellari. Oportet amantem omnia dura & amara propter dilectum libenter amplecti, nec ob contraria accidentia ab eo deflecti.



C A P U T V I.

De probatione veri amatoris.

1. CHR. **F**ILI, non es adhuc fortis & prudens amator.

2. AN. FID. Quare, Domine?

3. CHR. Quia propter modicam contrarietatem deficis à coëptis, & nimis avidè consolationem quæris. Fortis amator stat in tentationibus, nec callidis credit persuasionibus inimici: sicut ei in prosperis placeo, ita nec in adversis displiceo.

4. Prudens amator non tam donum amantis considerat quam dantis amorem; affectum potiùs attendit quam censum, & infra dilectum omnia data ponit. Nobilis

LIBER III. CAP. vj. 139

amator non quiescit in dono , sed in me
super omne donum.

5. Non est ideo totum perditum , si
quandoque minùs bene de me vel de Sanctis
meis sentis quam velles. Affectus ille bonus
& dulcis quem interdum percipis , effectus
gratiæ præsentis est & quidam prægustus
patriæ coelestis ; super quo non nimium in-
nitendum , quia vadit & venit. Certare au-
tem adversùs malos motus animi suggestio-
nemque spernere diaboli , insigne est virtu-
tis & magni meriti.

6. Non ergo te conturbent alienæ phan-
tasæ , de quâcumque materiâ ingestæ. For-
te serva propositum & intentionem rectam
ad Deum. Nec est illusio , quod aliquando
in excessum subito raperis , & statim ad
solitas ineptias cordis reverteris : illas enim
invitè magis pateris quam agis ; & quan-
diu displicent & reniteris , meritum est &
non perditio.

7. Scito quod antiquus inimicus omnino
nititur impedire desiderium tuum in bono ,
& ab omni devoto exercitio evacuare ; à

140 DE IMIT. CHRISTI.

Sanctorum scilicet cultu , à piâ passionis
 meæ memoriâ , à peccatorum utili recor-
 datione , à proprii cordis custodiâ , & à
 firmo proposito proficiendi in virtute : mul-
 tas malas cogitationes ingerit , ut tædium
 tibi faciat & horrorem , ut te ab oratione
 revocet & sacrâ lectione : displicet sibi hu-
 milis confessio , & , si posset , à commu-
 nione cessare faceret. Non credas ei ne-
 que cures illum , licet sæpius tibi deceptio-
 nis tetenderit laqueos : sibi imputa , quum
 mala inserit & immunda : dicito illi ; » Va-
 » de , immunde Spiritus ; erubescere , Miser ;
 » valde immundus es tu , qui talia inferis
 » auribus meis. Discede à me , Seducitor
 » pessime , non habebis in me partem ul-
 » lam ; sed JESUS mecum erit tanquam
 » bellator fortis , & tu stabis confusus.
 » Malo mori & omnem poenam subire ,
 » quam tibi consentire. Tace & obmutef-
 » ce ; non audiam te amplius , licet plures
 » mihi moliaris molestias. *Dominus illumi-*
 » *natio mea & salus mea , quem timebo ?*
 » *Dominus protector vitæ meæ , à quo trepi-*

LIBER III. CAP. vj. 141

» dabo ? Si consistent adversum me castra ,
» non timebit cor meum (Pf. xxvj , 1 , 3).
» Dominus adjutor meus & redemptor meus
(Pf. xviiij , 15) n.

8. Certa , tanquam miles bonus ; & si interdum ex fragilitate corruis , resume vires fortiores prioribus , confidens de ampliori gratiâ meâ ; & multum præcave à vanâ complacentiâ & superbiâ. Propter hoc multi in errorem ducuntur , & in cæcitatem penè incurabilem labuntur. Sit tibi in cautelam & perpetuam humilitatem ruina hæc superborum , de se stultè præsumendum.

CAPUT VII.

De occultandâ gratiâ sub humilitatis custodiâ.

I. CHR. **F**ILI , utilius est tibi & securius devotionis gratiam abscondere , nec in altum te efferre , nec multum inde loqui ; æque multum ponderare ; sed magis temet

ipsum despiciere & tanquam indigno datam timere. Non est huic affectioni tenaciùs in-hærendum, quæ citiùs potest mutari in contrarium. Cogita in gratiâ, quam miser & inops esse soles sine gratiâ. Nec est in eo tantum vitæ spiritualis profectus, quum consolationis habueris gratiam; sed quum humiliter, & abnegatè, patienterque tuleris ejus subtractionem: ita quod tunc ab orationis studio non torpeas, nec reliqua opera tua ex usu facienda omnino dilabi permittas; sed sicut meliùs potueris & intellexeris libenter quod in te est facias; nec, propter ariditatem seu anxietatem mentis quam sentis, te totaliter negligas.

2. Multi enim sunt qui, quum non bene eis successerit, statim impatientes fiunt aut desides: *non enim semper est in potestate hominis via ejus* (Jer. x, 23); sed Dei est dare & consolari, quando vult, & quantum vult, & cui vult, sicut sibi placuerit & non ampliùs. Quidam incauti, propter devotionis gratiam, se ipsos destruxerunt; quia plus agere voluerunt quam

potuerunt , non penſantes ſuæ parvitatís meſuram , ſed magis cordis affectum ſequentes quam rationis iudicium : & quia maiora præſumpſerunt quam Deo placitum fuit , idcirco gratiam cito perdiderunt. Facti ſunt inopes & viles relictí , qui in cælum poſuerunt nidum ſibi ; ut , humiliati & depauperati , diſcant non in aliis ſuis volare ſed ſub pennis meis ſperare. Qui adhuc novi ſunt & imperiti in viâ Domini , niſi conſilio diſcretorum ſe regant , faciliter decipi poſſunt & elidi.

3. Quod ſi ſuum ſentire magis ſequi quam aliis exercitatis credere volunt , erit eis periculoſus exitus , ſi tamen retrahi à proprio conceptu noluerint. Raro ſibi ipsis ſapientes ab aliis regi humiliter patiuntur. Melius eſt ſapere modicum cum humilitate & parvâ intelligentiâ , quam magni ſcientiarum theſauri cum vanâ complacentiâ. Melius eſt tibi minus habere , quam multum unde poſſes ſuperbire. Non ſatis diſcretè agit qui ſe totum lætitiæ tradit , obliſcens priſtinæ inopiæ ſuæ & caſti timo-

ris Domini , qui timet gratiam oblatam amittere. Nec etiam satis virtuosè sapit qui, tempore adversitatis & cujuscunque gravitatis , nimis desperatè se gerit , & minùs fidenter de me quam oportet recogitat ac sentit.

4. Qui tempore pacis nimis securus esse voluerit , sæpe tempore belli nimis dejectus & formidolosus reperietur. Si scires semper humilis & modicus in te permanere , necnon spiritum tuum bene moderare ac regere , non incideres tam cito in periculum & offensam. Consilium bonum est ut , fervoris spiritu concepto , mediteris quid futurum sit abscedente lumine. Quod dum contigerit , recogita & denuò lucem posse reverti , quam , ad cautelam tibi , mihi autem ad gloriam , ad tempus subtraxi.

5. Utilior est sæpe talis probatio , quam si semper prospera pro tuâ haberes voluntate. Nam merita non sunt ex hoc existimanda , si quis plures visiones aut consolationes habeat , vel si peritus sit in Scripturis , aut in altiori ponatur gradu : sed si verà

LIBER III. CAP. vij. 145

verâ fuerit humilitate fundatus & divinâ caritate repletus ; si Dei honorem purè & integrè semper quærat ; si se ipsum nihil reputet & in veritate despiciat , atque ab aliis etiam despici & humiliari magis gaudeat quam honorari.

CAPUT VIII.

De vili æstimatione sui ipsius in oculis Dei.

I. AN. FID. **L**OQUAR ad Dominum meum ;
quam sim pulvis & cinis (Gen. xvij , 27).
Si me ampliùs reputavero , ecce tu stas
contra me ; dicunt testimonium verum ini-
quitates meæ , nec possum contradicere. Si
autem me vilificavero , & ad nihilum re-
degero , & ab omni propriâ reputatione
defecero , atque sicut sum pulverisavero :
erit mihi propitia gratia tua , & vicina
cordi meo lux tua ; & omnis æstimatio ,
quantulacumque minima , in valle nihilei-
tatis meæ submergetur & peribit in æter-

num. Ibi ostendis me mihi , quid sum ; quid fui , & quo deveni ; quia nihil sum , & nescivi. Si mihi ipsi relinquor , ecce nihil & tota infirmitas ; si autem subito me respexeris , statim fortis efficior & novo repleor gaudio : & mirum valde , quod sic repentè sublevor & tam benignè à te complector , qui proprio pondere semper ad ima feror.

2. Facit hoc amor tuus , gratis prævieniens me , & in tam multis subveniens necessitatibus , à gravibus quoque custodiens me periculis , & ab innumeris , ut verè dicam , eripiens malis. Me siquidem malè amando , me perdidi ; & te solum quærendo & purè amando , me & te pariter inveni , atque ex amore profundius ad nihilum me redegi : quia tu , ô Dulcissime , facis mecum supra meritum omne & supra id quod audeo sperare vel rogare,

3. Benedictus sis , Deus meus ; quia ; licet ego omnibus bonis sim indignus , tua tamen nobilitas & infinita bonitas nunquam cessat benefacere , etiam ingratis &

longè à te averfis. Converte nos ad te ,
ut simus grati , humiles , & devoti ; quia
salus nostra tu es , virtus , & fortitudo nostra.

C A P U T I X.

*Quod omnia ad Deum , sicut ad finem
ultimum , sunt referenda.*

I. CHR. **F**ILI, ego debeo esse finis tuus
supremus & ultimus , si verè desideras
esse beatus. Ex hâc intentione purificabitur
affectus tuus , sæpiùs ad se ipsum & ad
creaturas malè incurvatus. Nam si te ip-
sum in aliquo quæris , statim in te deficis
& arescis. Omnia ergo ad me principaliter
referas , quia ego sum qui omnia dedi :
sic singula considera , sicut ex summo bono
manantia ; & ideo ad me , tanquam ad
suam originem , cuncta sunt reducenda.

2. Ex me pusillus & magnus , pauper
& dives , tanquam ex fonte vivo , aquam
vivam hauriunt ; & qui mihi sponte &
liberè deserviunt , gratiam pro gratiâ acci-

piant. Qui autem extra me voluerit gloriari, vel in aliquo privato bono delectari, non stabilietur in vero gaudio neque in corde suo dilatabitur, sed multipliciter impiedietur & angustabitur. Nihil ergo tibi de bono adscribere debes, nec alicui homini virtutem attribuas; sed totum da Deo, sine quo nihil habet homo: ego totum dedi; ego totum rehabere volo, & cum magnâ districtione gratiarum actiones requiro.

3. Hæc est veritas, quâ fugatur gloriæ vanitas. Et si intraverit cœlestis gratia & vera caritas, non erit aliqua invidia, nec contractio cordis, neque privatus amor occupabit: vincit enim omnia divina caritas & dilatat omnes animæ vires. Si rectè sapias, in me solo gaudebis, in me solo sperabis; quia *nemo bonus nisi solus Deus* (Luc. xvij, 19), qui est super omnia laudandus & in omnibus benedicendus.





CAPUT X.

*Quod, spreto mundo, dulce est servire
Deo.*

1. AN. FID. **N**UNC iterum loquar, Domine, & non filebo; dicam in auribus Dei mei, Domini mei, & Regis mei, qui est in excelsis: *O quam magna multitudo dulcedinis tuæ; Domine, quam abscondisti timentibus te (Ps. xxx, 26)!* Sed quid es amantibus? quid, toto corde tibi ferventibus? Verè ineffabilis dulcedo contemplationis tuæ, quam largiris amantibus te. In hoc maxime ostendisti mihi dulcedinem caritatis tuæ, quia, quum non essem, fecisti me; & quum errarem longè à te, reduxisti me ut servirem tibi, & præcepisti ut diligam te.

2. O Fons amoris perpetui! quid dicam de te? Quomodo potero tui oblivisci, qui mei dignatus es recordari etiam postquam contabui & perii? Fecisti, ultra

cabilem , dæmonibus terribilem , & cunctis fidelibus commendabilem ! O amplectendum & semper optandum servitium , quo summum promeretur bonum & gaudium acquiritur sine fine mansurum !



C A P U T X I.

*Quod desideria cordis examinanda sunt
& moderanda.*

1. CHR. **F**ILI , oportet te adhuc multa addiscere quæ necdum bene didicisti.

2. AN. FID. Quæ sunt hæc , Domine ?

3. CHR. Ut desiderium tuum ponas totaliter secundum beneplacitum meum ; & tui ipsius amator non sis , sed meæ voluntatis cupidus æmulator. Desideria te sæpe accendunt & vehementer impellunt : sed considera , an propter honorem meum an propter tuum commodum magis movearis. Si ego sum in causâ ; bene contentus eris , quomodocumque ordinavero : si autem de proprio quæsitum aliquid latet ,

LIBER III. CAP. xj. 153

ecce hoc est quod te impedit & gravat.

4. Cave ergo ne nimium innitaris super desiderio præconcepto, me non consulto; ne forte postea poeniteat, aut displiceat quod primo placuit & quasi pro meliore zelaſti. Non enim omnis affectio quæ videtur bona statim est sequenda; sed neque omnis contraria affectio ad primum fugienda. Expedit interdum refrenatione uti, etiam in bonis studiis & desideriis; ne per importunitatem mentis distractionem incurras, ne aliis per indisciplinationem scandalum generes, vel etiam per resistantiam aliorum subito turberis & corruas.

5. Interdum vero oportet violentiâ uti, & viriliter appetitui sensitivo contraire, nec advertere quid velit caro & quid non velit; sed hoc magis satagere ut subiecta sit, etiam nolens, spiritui. Et tam diu castigari ea debet & cogi servituti subesse, donec parata sit ad omnia, paucisque contentari discat & simplicibus delectari, nec contra aliquod inconveniens mulitare.



CAPUT XII.

*De informatione patientiæ, & luctamine
adversus concupiscentias.*

1. AN. FID. **D**OMINE Deus, ut video, patientia est mihi valde necessaria: multa enim in hâc vita accidunt contraria; nam qualitercumque ordinavero de pace meâ, non potest esse sine bello & dolore vita mea.

3. CHR. Ita est, Fili. Sed volo te non talem quærere pacem, quæ tentationibus careat aut contraria non sentiat; sed tunc etiâ æstimare te pacem invenisse, quum fueris variis tribulationibus exercitatus & in multis contrarietatibus probatus. Si dixeris te non posse multa pati, quomodo tunc sustinebis ignem Purgatorii? De duobus malis minus est semper eligendum: ut ergo æterna futura supplicia possis evadere, mala præsentia stude pro Deo æquanimiter tolerare. An putas quod homines

seculi hujus nihil vel parum patiantur ? nec hoc invenies , etiamsi delicatissimos quæsieris.


3. Sed habent , inquis , multas delectationes & proprias sequuntur voluntates , ideoque parum ponderant suas tribulationes.

4. Esto , ita sit ut habeant quidquid voluerint ; sed quam diu , putas , durabit ? Ecce , *quemadmodum fumus deficient* (Pl. xxxvj , 20) abundantes in seculo , & nulla erit recordatio præteritorum gaudiorum : sed & , quum adhuc vivunt , non sine amaritudine , & tædio , ac timore in eis quiescunt. Ex eâdem namque re unde sibi delectationem concipiunt , inde doloris pœnam frequenter recipiunt. Justè illis fit ut , quia inordinatè delectationes quæerunt & sequuntur , non sine confusione & amaritudine eas expleant. O quam breves , quam falsæ , quam inordinatæ & turpes omnes sunt ! Verumtamen præ ebrietate & cæcitate non intelligunt ; sed velut muta animalia , propter modicum corruptibilis vitæ

156 DE IMIT. CHRISTI.

delectamentum , mortem animæ incurrunt. Tu ergo , Fili , *post concupiscentias tuas non eas , & à voluntate tuâ avertere* (Eccli. xvij , 30). *Delectare in Domino , & dabit tibi petitiones cordis tui* (Pl. xxxvj , 4).

5. Etenim si veraciter vis delectari & abundantius à me consolari : ecce in contemptu omnium mundanorum & in abscissione omnium infirmarum delectationum erit benedictio tua , & copiosa tibi reddetur consolatio ; & quanto te plus ab omni creaturarum solatio subtraxeris , tanto in me suaviores & potentiores consolationes invenies. Sed primo non sine quâdam tristitiâ & labore certaminis ad has pertinges : obfistet inolita consuetudo , sed meliori consuetudine devincetur : remurmurabit caro , sed fervore spiritûs frenabitur : infligabit & exacerbabit te serpens antiquus , sed oratione fugabitur ; insuper & labore utili aditus ei magnus obstruetur.





CAPUT XIII.

*De obedientiâ humilis subditi ,
ad exemplum JESU-CHRISTI.*

I. CHR. **F**ILI , qui se subtrahere nititur
ab obedientiâ , ipse se subtrahit à gratiâ ;
& qui quærit habere privata , amittit com-
munia : qui non libenter & sponte sup-
Superiori se subdit , signum est quod caro
sua necdum perfectè sibi obedit , sed sæpe
recalcitrât & remurmurat. Disce ergo celeri-
ter Superiori tuo te submittere , si carnem
propriam optas subjugare. Citiùs namque
exterior vincitur inimicus , si interior homo
non fuerit devastatus. Non est molestior
& peior animæ hostis , quam tu ipse tibi
non bene concordans spiritui. Oportet om-
nino verum te assumere tui ipsius contemp-
tum , si vis prævalere adversus carnem &
sanguinem. Quia adhuc nimis inordinatè te
diligis , ideo plenè te resignare aliorum vo-
luntati trepidas.

2. Sed quid magnum , si tu , qui pulvis es & nihil , propter Deum te homini subdis ; quando ego , Omnipotens & Altissimus , qui cuncta creavi ex nihilo , me homini propter te humiliter subjeci ? Factus sum omnium humillimus & infimus , ut tuam superbiam meâ humilitate vinceret. Disce obtemperare , Pulvis ; disce te humiliare , Terra & limus , & sub omnium pedibus incurvare ; disce voluntates tuas frangere & ad omnem subjectionem te dare.

3. Exardesce contra te , nec patiaris timorem in te vivere ; sed ita subiectum & parvulum te exhibe , ut omnes super te ambulare possint & sic *ut lutum platearum* (Pl. xvij , 43) conculcare. Quid habes , Homo inanis , conqueri ? Quid , sordide Peccator , potes contradicere exprobrantibus tibi , qui toties Deum offendisti & infernum multoties meruisti ? Sed pepercit tibi oculus meus , quia pretiosa fuit anima tua in conspectu meo ; ut cognosceres dilectionem meam & gratus semper benefi-

ciis meis existeres, & ut ad veram subjectionem & humilitatem te jugiter dares, patienterque proprium contemptum ferres.

C A P U T X I V.

*De oculis Dei judiciis considerandis,
ne extollamur in bonis.*

1. AN. FID. **I**NTONAS super me judicia tua, Domine, & timore ac tremore concutis omnia ossa mea, & expavescit anima mea valde. Sto attonitus & considero quia *cæli non sunt mundi in conspectu tuo* (Job. xv, 15). Si in angelis reperisti *pravitatem* (Job. iv, 18) nec tamen percisti, quid fiet de me? *Stellæ de cælo ceciderunt* (Apoc. vj, 13) : & ego, pulvis, quid præsumo? Quorum opera videbantur laudabilia, ceciderunt ad infima; & qui comedebant panem angelorum, vidi filiquis delectari porcorum.

2. Nulla est ergo sanctitas, si manum tuam, Domine, subtrahas; nulla prodest

sapientia, si gubernare desistas; nulla juvat fortitudo, si conservare desinas; nulla secura castitas, si eam non protegas; nulla propria prodest custodia, si non adsit tua sacra vigilantia. Nam relictī, mergimur & perimus; visitati vero, erigimur & vivimus: instabiles quippe sumus, sed per te confirmamur; tepescimus, sed per te accendimur.

3. O! quam humiliter & abjecte mihi de me ipso sentiendum est! quam nihili pendendum, si quid boni videar habere! O! quam profundè submittere me debeo sub abyssalibus judiciis tuis, Domine, ubi nihil aliud me esse invenio quam nihil & nihil! O pondus immensum! O pelagus intransitabile, ubi nihil aliud de me reperio quam in toto nihil! Ubi est ergo latebra gloriæ? ubi confidentia de virtute concepta? Absorpta omnis est gloriatio vana in profunditate judiciorum tuorum super me.

4. Quid est omnis caro in conspectu tuo? Numquid gloriabitur lutum contra

LIBER III. CAP. XIV 161

formantem se ? Quomodo potest erigi vaniloquio, cuius cor in veritate subiectum est Deo ? Non eum totus mundus eriget quem veritas sibi subjecit ; nec omnium laudantium ore movebitur qui totam spem suam in Deo firmavit : nam & ipsi qui loquuntur ecce omnes nihil ; deficient enim cum sonitu verborum , *veritas autem Domini manet in æternum* (Ps. cxvj , 2).

C A P U T X V.

Qualiter standum sit ac dicendum in omni re desiderabili.

I. CHR. **F**ILI , sic dicas in omni re ;
 » Domine , si tibi placitum fuerit , fiat hoc
 » ita. Domine , si fuerit honor tuus , fiat hoc
 » in nomine tuo. Domine , si mihi videris
 » expedire & utile esse probaveris , tunc
 » dona mihi hoc uti ad honorem tuum ;
 » sed si mihi nocivum fore cognoveris
 » nec animæ meæ salutî prodesse , aufer
 » à me tale desiderium ». Non enim omne

desiderium est à Spiritu sancto , etiamsi homini videatur rectum & bonum. Difficile est pro vero judicare , utrum spiritus bonus an alienus te impellat ad desiderandum hoc vel illud , an etiam ex proprio movearis spiritu. Multi in fine sunt decepti , qui primo bono spiritu videbantur induci.

2. Igitur semper cum timore Dei & cordis humilitate desiderandum est & petendum quidquid desiderabile menti occurrit : maximèque cum propriâ resignatione mihi totum committendum est , atque dicendum ; » Domine , tu scis qualiter melius est ; fiat hoc vel illud sicut volueris. » Da quod vis , & quantum vis , & quando vis. Fac mecum sicut scis , & sicut ubi magis placuerit & major honor tuus fuerit. Pone me ubi vis , & liberè age mecum in omnibus. In manu tuâ sum ; » gyra & reversa me per circuitum. En servus tuus ego , paratus ad omnia : » quoniam non desidero mihi vivere , sed » tibi ; utinam dignè & perfectè ! «

LIBER III. CAP. XV. 163

Oratio pro beneplacito Dei perficiendo.

3. AN. FID. Concede mihi, benignissime JESU, gratiam tuam, *ut tecum sit & tecum laboret* (Sap. ix, 10), tecumque usque in finem perseveret. Da mihi hoc semper desiderare & velle quod tibi magis acceptum est & carius placet. Tua voluntas mea sit ; & mea voluntas tuam semper sequatur & optimè ei concordet ! Sit mihi unum velle & nolle tecum, nec aliud posse velle aut nolle nisi quod tu vis aut nolis.

4. Da mihi omnibus mori quæ in mundo sunt, & propter te amare contemni & nesciri in hoc seculo. Da mihi super omnia desiderata in te requiescere, & cor meum in te pacificare. Tu vera pax cordis, tu sola requies ; extra te dura sunt omnia & inquieta. *In hâc pace in idipsum*, hoc est, in te, uno summo æterno bono, *dormiam & requiescam* (Ps. iv, 9). Amen !





CAPUT XVI.

*Quod verum solatium in solo Deo est
quærendum.*

1. AN. FID. **Q**UID QUID desiderare possum vel cogitare ad solatium meum, non hîc exspecto, sed in posterum. Quod si omnia solatia mundi solus haberem & omnibus deliciis frui possem, certum est quod diu durare non possent. Unde non poteris, Anima mea, plenè consolari nec perfectè recreari nisi in Deo, consolatore pauperum ac susceptore humilium. Exspecta modicum, Anima mea; exspecta divinum promissum, & habebis abundantiam omnium bonorum in cœlo. Si nimis inordinatè ista appetis præsentia, perdes æterna & cœlestia. Sint temporalia in usu, æterna in desiderio. Non potes aliquo bono temporali satiari, quia ad hæc fruenda non es creata.

2. Etiam si omnia creata bona haberes,

LIBER III. CAP. xvj. 165

non posses esse felix & beata ; sed in Deo , qui cuncta creavit , tota beatitudo tua & felicitas consistit : non qualis videtur & laudatur à stultis mundi amatoribus ; sed qualem exspectant boni CHRISTI fideles , & prægustant interdum spirituales ac mundicordes , quorum *conversatio in caelis est* (Philipp. iij , 20). Vanum est & breve omne humanum solatium : beatum & verum solatium , quod intus à Veritate percipitur. Devotus homo ubique secum fert consolatorem suum JESUM , & dicit ad eum : « Adesto mihi , Domine JESU , in » omni loco & tempore. Hæc mihi sit » consolatio libenter velle carere omni humano solatio : & si tua defuerit consolatio , sit mihi tua voluntas & justa probatio pro summo solatio ; *non enim in » perpetuum irascēris , neque in æternum » comminaberis* (Ps. cij , 9). »





CAPUT XVIII.

*Quod temporales miseriæ , exemplo
CHRISTI , æquanimiter sunt
ferendæ.*

I. CHR. **F**ILI, ego descendi de cælo pro tuâ salute : suscepi tuas misérias , non necessitate , sed caritate trahente ; ut patientiam disceres , & temporales misérias non indignanter ferres. Nam , ab horâ ortus mei usque ad exitum in cruce , non defuit mihi tolerantia doloris : defectum rerum temporalium magnum habui ; multas querimonias de me frequenter audiui ; confusiones & opprobria benignè sustinui ; pro beneficiis ingratitudinem recepi , pro miraculis blasphemias , pro doctrinâ reprehensiones.

2. AN. **F**ID. Domine , quia tu patiens fuisti in vitâ tuâ , in hoc maximè implendo præceptum Patris tui ; dignum est ut ego , misellus peccator , secundum voluntatem

LIBER III. CAP. xviiij. 169

tatem tuam patienter me sustineam, &, donec ipse volueris, onus corruptibilis vitæ pro salute meâ portem. Nam etsi onerosa sentitur præsens vita; facta est tamen jam per gratiam tuam valde meritoria, atque, exemplo tuo & Sanctorum tuorum vestigiis, infirmis tolerabilior: sed & multo magis consolatoria quam olim in lege veteri fuerat, quum porta cœli clausa persisteret; & obscurior etiam via ad cœlum videbatur, quando tam pauci regnum cœlorum quærere curabant. Sed neque qui tunc iusti erant & salvandi, ante passionem tuam & sacræ mortis debitum, cœleste regnum poterant introire.

3. O! quantas tibi gratias teneor referre, quod viam rectam & bonam dignatus es mihi & cunctis Fidelibus ad æternum regnum tuum ostendere! Nam vita tua, via nostra; & per sanctam patientiam ambulamus ad te, qui es corona nostra. Nisi tu nos præcessisses & docuisses, quis sequeretur? Heu! quanti longè retroque manerent, nisi tua præclara exempla inspice-

rent ! Ecce , adhuc tepescimus , auditis tot signis tuis & doctrinis ; quid fieret , si tantum lumen ad sequendum te non haberemus ?



CAPUT XIX.

*De tolerantia injuriarum , & quis verus
patiens probetur.*

. CHR. **Q**UID est quod loqueris , Fili ? Cessa conqueri , consideratâ meâ & aliorum Sanctorum passione. *Nondum usque ad sanguinem restitisti* (Hebr. xij , 4). Parum est quod tu pateris , in comparatione eorum qui tam multa passi sunt , tam fortiter tentati , tam graviter tribulati , tam multipliciter probati & exercitati. Oportet te igitur aliorum graviora ad mentem reducere , ut levius feras tua minima ; & si tibi minima non videntur , vide ne & hoc tua faciat impatentia : sive tamen parva sive magna sunt , stude cuncta patienter sufferte.

LIBER III. CAP. xix. 171

2. Quanto melius ad patiendum te disponis , tanto sapientius agis & amplius promereris ; feres quoque levius , animo & usu ad hoc non segniter paratus. Nec dicas ; « Non valeo hæc ab homine tali » pati , nec hujuscemodi mihi patienda » sunt ; grave enim intulit damnum , & » impropere mihi quæ nunquam cogita- » veram : sed ab alio libenter patiar , & » sicut patienda videro ». Insipiens est talis cogitatio , quæ virtutem patientiæ non considerat nec à quo coronanda erit , sed magis personas & offensas sibi illatas perpendit.

3. Non est verus patiens , qui pati non vult , nisi quantum sibi visum fuerit & à quo sibi placuerit. Verus autem patiens non attendit à quo homine , utrum à præ- lato suo an ab aliquo æquali aut inferiori ; utrum à bono & sancto viro vel à per- verso & indigno exerceatur : sed indiffe- renter ab omni creaturâ , quantumcumque & quotiescumque ei aliquid adversi acci- derit , totum hoc de manu Dei gratanter

H ij

172 *DE IMIT. CHRISTI.*

accipit, & ingens lucrum reputat ; quia nil apud Deum , quantumlibet parvum , pro Deo tamen passum , poterit sine merito transire.

4. Esto itaque expeditus ad pugnam , si vis habere victoriam. Sine certamine non potes venire ad patientiæ coronam. Si pati non vis , recusas coronari ; si autem coronari desideras , certa viriliter , sustine patienter. Sine labore non tenditur ad requiem , nec sine pugna pervenitur ad victoriam,

5. AN. FID. Fiat , Domine , mihi possibile per gratiam , quod mihi impossibile videtur per naturam. Tu scis quod modicum possum pati , & quod cito dejicior levi exsurgente adversitate. Efficiatur mihi quælibet exercitatio tribulationis pro nomine tuo amabilis & optabilis ; nam pati & vexari pro te valde salubre est animæ meæ.





CAPUT XX.

*De confessione propriæ infirmitatis ,
& hujus vitæ miseriis.*

I. AN. FID. *C*ONFITEBOR *adversum*
me injustitiam meam (Ps. xxxj , 5) : confi-
tebor tibi , Domine , infirmitatem meam.
Sæpe parva res est quæ me dejicit &
contristat. Propono me fortiter acturum ;
sed quum modica tentatio venerit , magna
mihi angustia fit. Valdè vilis quandoque
res est unde gravis tentatio provenit ; &
dum puto me aliquantulum tutum , quum
non sentio , invenio me nonnunquam penè
devictum ex levi flatu.

2. Vide ergo , Domine , humilitatem
meam & fragilitatem tibi undique notam.
Miserere & *eripe me de luto , ut non infi-*
gar (Ps. lxxvij , 15.) , ne permaneam de-
jectus usquequaque. Hoc est quod me fre-
quenter reverberat & coram te confundit ,
quod tam labilis sum & infirmus ad re-

sistendum passionibus : etsi non omnino ad consensionem , tamen mihi etiam molesta & gravis est earum infectatio ; & tædet me valde sic quotidie vivere in lite. Ex hinc nota mihi fit infirmitas mea , quia multo facilius irruunt abominandæ semper phantasie quam discedunt.

3. Utinam , fortissime Deus Israel , zelator animarum fidelium , respicias servi tui laborem & dolorem , affistasque illi in omnibus ad quæcumque perrexerit ! Robora me cœlesti fortitudine , ne vetus homo , misera carô spiritui necdum plenè subacta , prævaleat dominari ; adversus quam certare oportebit , quam diu spirabitur in hâc vitâ miserrimâ. Heu ! qualis est hæc vita , ubi non desunt tribulationes & miseriæ , ubi plena laqueis & hostibus sunt omnia ! nam unâ tribulatione seu tentatione recedente , alia accedit ; sed & priore adhuc durante conflictu , alii plures superveniunt & insperatè.

4. Et quomodo potest amari vita tantas habens amaritudines , tot subiecta calami-

LIBER III. CAP. XX. 175

tatibus & miseriis ! Quomodo etiam dicitur vita , tot generans mortes & pestes ? & tamen amatur , & delectari in eâ à multis quæritur. Reprehenditur frequenter mundus quod fallax sit & vanus ; nec tamen facile relinquitur , quia concupiscentiæ carnis nimis dominantur. Sed alia trahunt ad amandum , alia ad contemnendum : trahunt ad amorem mundi , *desiderium carnis* , *desiderium oculorum* , & *superbia vitæ* (I. Joan. ij , 16) ; sed poenæ ac miseriæ , iustè sequentes ea , odium mundi pariunt & tædium.

5. Sed vincit , prohi dolor ! delectatio prava mentem mundo deditam , & esse sub sensibus delicias reputat ; quia Dei suavitatem & internam virtutis amœnitatem nec vidit nec gustavit. Qui autem mundum perfecte contemnunt & Deo vivere sub sanctâ disciplinâ student , illi divinam dulcedinem veris abrenunciatoribus promissam non ignorant , & quam graviter mundus errat & variè fallitur clariùs vident.



CAPUT XXI.

*Quod in Deo super omnia bona & dona
requiescendum est.*

I. AN. FID. **S**UPER omnia & in omnibus requiesces, Animea mea, in Domino semper; quia ipse est Sanctorum æterna requies. Da mihi, dulcissime & amantissime JESU, in te super omnem creaturam requiescere, super omnem salutem & pulchritudinem, super omnem gloriam & honorem, super omnem potentiam & dignitatem, super omnem scientiam & subtilitatem, super omnes divitias & artes, super omnem lætitiā & exultationem, super omnem famam & laudem, super omnem suavitatem & consolationem, super omnem spem & promissionem, super omne meritum & desiderium, super omnia dona & munera quæ potes dare & infundere, super omne gaudium & jubilationem quam potest mens capere ac

LIBER III. CAP. XXj, 177

sentire , denique super angelos & archangelos & super omnem exercitum cœli , super omnia visibilia & invisibilia , & super omne quod tu , Deus meus , non es.

2. Quia tu , Domine Deus meus , super omnia optimus es ; tu solus altissimus ; tu solus potentissimus ; tu solus sufficientissimus & plenissimus ; tu solus suavissimus & solatiofissimus ; tu solus pulcherrimus & amantissimus ; tu solus nobilissimus & gloriosissimus super omnia , in quo cuncta bona simul & perfectè sunt , & semper fuerunt , & erunt : atque ideo minus est & insufficiens quidquid præter te ipsum mihi donas , aut de te ipso revelas vel promittis , te non viso nec plenè adepto ; quoniam quidem non potest cor meum veraciter requiescere nec totaliter contentari , nisi in te requiescat & omnia dona omnemque creaturam transcendat.

3. O mi dulcissime Sponse , JESU-CHRISTE , amator purissime , dominator universæ creaturæ ! quis mihi det pen-
nas veræ libertatis ad volandum & pau-

178 *DE IMIT. CHRISTI.*

sandum in te ? O quando ad plenum dabitur mihi vacare , & videre quam suavis es , Domine Deus meus ! Quando ad plenum me recolligam in te , ut præ amore tuo non sentiam me ; sed te solum supra omnem sensum & modum , in modo non omnibus noto ! Nunc autem frequenter gemo , & infelicitatem meam cum dolore porto : quia multa mala in hâc valle miserrarum occurrunt , quæ me sæpiùs conturbant , contristant , & obnubilant ; sæpiùs impediunt & distrahunt , alliciunt & implicant , ne liberum habeam accessum ad te , & ne jucundis fruar amplexibus , præstò semper beatis spiritibus. Moveat te suspirium meum & desolatio multiplex in terrâ !

4. O JESU , splendor æternæ gloriæ , solamen peregrinantis animæ ! apud te est os meum sine voce , & silentium meum loquitur tibi. Usquequo tardat venire Dominus meus ? Veniat ad me pauperculum suum , & lætum faciat ! Mittat manum suam , & miserum eripiat de omni angus-

tiâ ! Veni , veni ; quia sine te nulla erit læta dies aut hora ; quia tu lætitia mea , & sine te vacua est mensa mea. Miser sum , & quodammodo incarceratus , & compedibus gravatus , donec luce præsentiæ tuæ me reficias , ac libertati dones , vultumque amicabilem demonstres.

5. Quærant alii pro te aliud quodcumque libuerit ; mihi aliud interim nil placet nec placebit , nisi tu , Deus meus , spes mea , salus æterna. Non reticebo nec deprecari cessabo , donec gratia tua revertatur mihi que tu intus loquaris.

6. CHR. Ecce adsum. Ecce ego ad te , quia invocasti me. Lacrymæ tuæ & desiderium animæ tuæ , humiliatio tua & contritio cordis , inclinaverunt me & adduxerunt ad te.

7. AN. FID. Et dixi : Domine , vocavi te & desideravi frui te , paratus omnia respuere propter te ; tu enim prior excitasti me ut quærerem te. Sis ergo benedictus , Domine , qui fecisti hanc bonitatem cum servo tuo , secundum multitudi-

nem misericordiæ tuæ. Quid habet ultra dicere servus tuus coram te , nisi ut humiliet se valde ante te , memor semper propriæ iniquitatis & vilitatis ? Non enim est similis tibi in cunctis mirabilibus cœli & terræ. Sunt opera tua bona valde , iudicia vera ; & providentiâ tuâ reguntur universa. Laus ergo tibi & gloria , ô Patris Sapiaientia : te laudet & benedicat os meum , anima mea , & cuncta creata simul.



CAPUT XXII.

De recordatione multiplicium beneficiorum Dei.

I. AN. FID. **A**PERI, Domine , cor meum in lege tuâ , & in præceptis tuis doce me ambulare. Da mihi intelligere voluntatem tuam , & cum magnâ reverentiâ ac diligenti consideratione beneficia tua , tam in generali quam in speciali , memorari ; ut dignè tibi ex hinc valeam gratias referre. Verum scio & confiteor , nec pro

LIBER III. CAP. XXIJ. 181

minimo puncto me posse debitas gratiarum laudes persolvere. Minor ego sum omnibus bonis mihi præstitis ; & quum tuam nobilitatem attendo , deficit præ magnitudine spiritus meus.

2. Omnia quæ in animâ habemus & corpore , quæcumque exterius vel interiùs , naturaliter vel supernaturaliter possidemus , tua sunt beneficia , & te beneficum ; pium , ac bonum commendant , à quo bona cuncta accepimus. Et si alius plura , alius pauciora accepit ; omnia tamen tua sunt , & sine te nec minimum potest haberi. Ille qui majora accepit non potest merito suo gloriari , neque super alios extolli , nec minori insultare ; quia ille major & melior , qui sibi minus adscribit & in regratiando humilior est atque devotior : & qui omnibus viliores se existimat & indigniores se judicat , aptior est ad percipienda majora.

3. Qui autem pauciora accepit , contristari non debet , nec indignanter ferre , neque ditiori invidere ; sed te potius at-

182 DE IMIT. CHRISTI.


tendere & tuam bonitatem maximè laudare , qui tam affluenter , tam gratis & libenter , sine personarum acceptione , tua munera largiris. Omnia ex te ; & ideo in omnibus es laudandus. Tu scis quid unicuique donari expediat ; & cur iste minus , & ille amplius habeat , non nostrum , sed tuum est hoc discernere , apud quem singulorum definita sunt merita.

4. Unde , Domine Deus , pro magno etiam reputo beneficio non multa habere , unde exterius & secundum homines laus & gloria apparet : ita ut consideratâ quis paupertate & vilitate personæ suæ , non modo gravitatem aut tristitiam vel dejectionem inde concipiat , sed potius consolationem & hilaritatem magnam ; quia tu , Deus , pauperes , & humiles , atque huic mundo despectos tibi elegisti in familiares & domesticos. Testes sunt ipsi apostoli tui , *quos constituisti principes super omnem terram* (Ps. xliv , 17) : fuerunt tamen sine querelâ conversati in mundo , tam humiles & simplices , sine omni ma-

LIBER III. CAP. xxij. 183

litia & dolo , ut etiam pati contumelias gauderent pro nomine tuo , & quæ mundus abhorret ipsi amplecterentur affectus magno.

5. Nihil ergo amatorem tuum & cognitorem beneficiorum tuorum ita lætificare debet , sicut voluntas tua in eo & beneplacitum æternæ dispositionis tuæ : de quâ tantum contentari debet & consolari , ut ita libenter velit esse minimus sicut aliquis optaret esse maximus ; & ita pacificus & contentus in novissimo sicut in loco primo ; atque ita libenter despicibilis & abjectus , nullius quoque nominis & famæ , sicut ceteris honorabilior & major in mundo. Nam voluntas tua & amor honoris tui omnia excedere debet , & plus eum consolari magisque placere quam omnia beneficia sibi data vel danda.





CAPUT XXIII.

*De quatuor magnam importantibus
pacem.*

1. CHR. **F**ILI, nunc docebo te viam pacis & veræ libertatis.

2. AN. FID. Fac, Domine, quod dicis; quia hoc mihi gratum est audire.

3. CHR. Stude, Fili, alterius potius facere voluntatem quam tuam; elige semper minus quam plus habere; quære semper inferiorem locum & omnibus subesse; opta semper & ora ut voluntas Dei integrè in te fiat: ecce talis homo ingreditur fines pacis & quietis.

4. AN. FID. Domine, sermo tuus iste brevis multum in se continet perfectionis; parvus est dictu, sed plenus sensu & uber in fructu: nam si posset à me fideliter custodiri, non deberet tam facilis in me turbatio oriri; nam quoties me impacatum sentio & gravatum, ab hâc doctrinâ

LIBER III. CAP. XXiiij. 185

me recessisse invenio. Sed tu, qui omnia potes & animæ profectum semper diligis, adauge majorem gratiam, ut possim tuum complere sermonem & meam perficere salutem.

Oratio contra cogitationes malas.

5. DOMINE, Deus meus, *ne elongeris à me ; Deus meus, in auxilium meum respice* (Ps. lxx, 12) ; quoniam insurrexerunt in me variæ cogitationes & timores magni affligentes animam meam. Quomodo pertransibo illæsus ? quomodo perfringam eas ?

6. Ego, inquis, *ante te ibo, & gloriosos terræ humiliabo* (Is. xlv, 2) : aperiam januas carceris, & arcana secretorum revelabo tibi.

7. Fac, Domine, ut loqueris ; & fugiant à facie tuâ omnes iniquæ cogitationes. Hæc spes & unica consolatio mea, ad te in omni tribulatione confugere, tibi confidere, ex intimo invocare, & patienter consolationem tuam exspectare.

Oratio pro illuminatione mentis.

8. CLARIFICA me, JESU bone, claritate interni luminis, & educ de habitaculo cordis mei tenebras universas. Cōhibe evagationes multas, & vim facientes elide tentationes. Pugna fortiter pro me & expugna malas bestias, concupiscentias dico illecebras, ut fiat pax in virtute tuā (Ps. cxxj, 7), & abundantia laudis tuæ resonet in aulâ sanctâ, hoc est, in conscientiâ purâ. Impera ventis & tempestatibus: dic mari, Quiesce; & aquiloni, Ne flaveris; & erit tranquillitas magna.

9. Emitte lucem tuam & veritatem tuam (Ps. xlij, 3), ut luceant super terram; quia terra sum inanis & vacua, donec illumines me. Effunde, Domine, gratiam tuam desuper; perfunde cor meum rore cœlesti; ministra devotionis aquas ad irrigandam faciem terræ, ad producendum fructum bonum & optimum. Eleva mentem pressam mole peccatorum, & ad cœlestia totum desiderium meum suspende;

LIBER III. CAP. XXIIJ. 187

ut , gustatâ suavitâte supernâ felicitatis ,
pigeat de terrenis cogitare.

10. Rape me & eripe ab omni creatu-
rarum indurabili consolatione , quia nulla
res creata appetitum meum valet plena-
riè quietare & consolari : junge me tibi
inseparabili dilectionis vinculo , quoniam
tu solus sufficis amanti , & absque te fri-
vola sunt universa.

C A P U T XXIV.

*De evitatione curiosæ inquisitionis
super alterius vitâ.*

I. CHR. **F**ILI, noli esse curiosus nec va-
cuas gerere sollicitudines. Quid hoc vel
illud *ad te* ? Tu me *sequere* (Joan. xxj ,
22). Quid enim *ad te* , utrum ille sit talis
vel talis , aut iste sic & sic agit vel loqui-
tur ? Tu non indiges respondere pro aliis ,
sed pro te ipso rationem reddes. Quid ergo
te implicas ? Ecce ego omnes cognosco ;
& cuncta quæ sub sole fiunt video ; &

scio qualiter cum unoquoque sit, quid cogitet, quid velit, & ad quem finem tendat ejus intentio. Mihi igitur committenda sunt; tu vero serva te in bonâ pace. Dimitte agitantem agitare quantum voluerit; veniet super eum quidquid fecerit vel dixerit, quia me fallere non potest.

2. Non tibi sit curæ de magni nominis umbrâ, non de multorum familiaritate, nec de privatâ hominum dilectione; ista enim generant distractiones & magnas in corde obscuritates. Libenter loquerer tibi verbum meum & abscondita revelarem, si adventum meum diligenter observares & ostium cordis mihi aperires. Esto providus, & vigila in orationibus, & humilia te in omnibus.





C A P U T XXV.

*In quibus firma pax cordis & verus
profectus consistit.*

1. CHR. **F**ILI, ego loquutus sum : *Pacem relinquo vobis , pacem meam do vobis ; non quomodo mundus dat ego do vobis (Joan. xiv , 27).* Pacem omnes desiderant , sed quæ ad veram pacem pertinent non omnes curant. Pax mea cum humilibus & mansuetis corde. Pax tua erit in multâ patientiâ. Si me audieris & vocem meam sequutus fueris , poteris multâ pace frui.

2. AN. FID. Quid igitur faciam ?

3. CHR. In omni re attende tibi quid facias & quid dicas ; & omnem intentionem tuam ad hoc dirige , ut mihi soli placeas & extra me nihil cupias vel quæras. Sed & de aliorum dictis vel factis nil temerè judices , nec cum rebus tibi non commissis te implices ; & poterit fieri ut

parum vel raro turberis. Nunquam autem sentire aliquam turbationem nec aliquam pati cordis vel corporis molestiam, non est præsentis temporis; sed status æternæ quietis. Non ergo æstimes te veram pacem invenisse, si nullam senseris gravitatem; nec tunc totum esse bonum, si neminem pateris adversarium; nec hoc esse perfectum, si cuncta fiunt secundum tuum affectum: neque tunc aliquid magni te reputes aut specialiter dilectum existimes, si in magnâ fueris devotione atque dulcedine; quia in istis non cognoscitur verus amator virtutis, nec in istis consistit profectus & perfectio hominis.

4. AN. FID. In quo ergo, Domine?

5. CHR. In offerendo te ex toto corde tuo voluntati divinæ; non quærendo quæ tua sunt, nec in parvo, nec in magno, nec in tempore, nec in æternitate; ita ut unâ æquali facie in gratiarum actione permanear inter prospera & contraria, omnia æquâ lance pensando. Si fueris tam fortis & longanimis in spe, ut, subtractâ

LIBER. III. CAP. XXV. 191

omni interiori consolatione , etiam ad ampliora sustinenda cor tuum præparaveris ; nec te justificaveris quasi hæc tantaque pati non deberes , sed me in omnibus dispositionibus justificaveris & sanctum laudaveris : tunc in verâ & rectâ viâ pacis ambulas , & spes indubitata erit quod rursus in jubilo faciem meam sis visurus. Quod si ad plenum tui ipsius contemptum perveneris , scito quod tunc abundantiam pacis perfruêris secundum possibilitatem tui incolatûs.

C A P U T X X V I.

*De eminentiâ liberæ mentis , quam
supplex oratio magis meretur
quam lectio.*

I. AN. FID. **D**OMINE , hoc opus est perfecti viri , nunquam ab intentione celestium animum relaxare , & inter multas curas quasi sine curâ transire , non more torpentis , sed prærogativâ quâdam liberæ

mentis , nulli creaturæ inordinatâ affectione adhærendo.

2. Obsecro te , piissime Deus meus , præserva me à curis hujus vitæ , ne nimis implicer ; à multis necessitatibus corporis , ne voluptate capiar ; ab universis animæ obstaculis , ne molestiis fractus dejiciar : non dico ab his rebus quas toto affectu ambit vanitas mundana ; sed ab his quoque miseriis quæ animam servi tui , communi maledicto mortalitatis , poenalter gravant , & retardant ne in libertatem spiritûs , quoties libuerit , valeat introire.

3. O Deus meus , dulcedo ineffabilis ! verte mihi in amaritudinem omnem consolationem carnalem , ab æternorum amore me abstrahentem & ad se intuitu cujusdam boni delectabilis præsentis malè allicientem. Non me vincat , Deus meus , non me vincat caro & sanguis ; non me decipiat mundus & brevis gloria ejus ; non me supplantet diabolus & astutia illius ! Da mihi fortitudinem resistendi ,
patientiam

LIBER III. CAP. XXVj. 193

patientiam tolerandi , constantiam perseverandi. Da , pro omnibus mundi consolationibus , suavissimam Spiritûs tui unctiorem ; & pro carnali amore , tui nominis infunde amorem.

4. Ecce cibus , potus , vestis , ac cætera utensilia ad corporis sustentaculum pertinentia , ferventi spiritui sunt onerosa. Tribue talibus fomentis temperatè uti , non desiderio nimio implicari. Abjicere omnia non licet , quia natura sustentanda est : requirere autem superflua & quæ magis delectant , lex sancta prohibet ; nam aliàs , caro adversus spiritum insolesceret. Inter hæc , quæso , manus tua me regat & doceat , ne quid nimium fiat.





CAPUT XXVII.

*Quod privatus amor à summo bono
maximè retardat.*

I. CHR. **F**ILI, oportet te dare totum pro toto, & nihil tui ipsius esse. Scito quod amor tui ipsius magis nocet tibi quam aliqua res mundi. Secundum amorem & affectum quem geris, qualibet res plus vel minus adheret. Si fuerit amor tuus purus, simplex, & bene ordinatus; eris sine captivitate rerum. Noli concupiscere quod non licet habere, noli habere quod te potest impedire & libertate interiori privare. Mirum, quod non ex toto fundo cordis te ipsum mihi committis cum omnibus quæ desiderare potes vel habere.

2. Quare vano mœrore consumeris? Cur superfluis curis fatigaris? Sta ad beneplacitum meum, & nullum patieris detrimentum. Si quæris hoc vel illud, &

LIBER III. CAP. XXVIJ. 195

volueris esse ibi vel ibi propter tuum commodum & proprium beneplacitum magis habendum ; nunquam eris in quietudine nec liber à sollicitudine , quia in omni re reperietur aliquis defectus & in omni loco erit qui adverfetur.

3. Juvat igitur , non quælibet res adepta vel multiplicata exterius ; sed potius contempta & decisa ex corde radicitus. Quod non tantum de censu æris & divitiarum intelligas , sed de honoris etiam ambitu ac vanæ laudationis desiderio ; quæ omnia transeunt cum mundo. Munit parum locus , si deest spiritus fervoris : nec diu stabit pax illa quæsitâ forinsecus , si vacat à vero fundamento status cordis , hoc est , nisi steteris in me. Permutare te potes ; sed non meliorare : nam occasione ortâ & acceptâ , invenies quod fugisti & amplius.

*Oratio pro purgatione cordis & cælesti
sapientiâ.*

4. AN. FID. CONFIRMA me , Deus ,
per gratiam sancti Spiritûs. Da virtutem

196 DE IMIT. CHRISTI.

corroborari in interiori homine , & cor meum ab omni inutili sollicitudine & angore evacuare , nec variis desideriis trahi cuiuscumque rei , vilis aut pretiosæ : sed omnia inspicere sicut transeuntia , & me pariter cum illis transiturum ; quia *nihil permanet sub sole* , ubi *cuncta vanitas & afflictio spiritûs* (Eccle. ij , 11 , 17). O quam sapiens est qui ista considerat !

5. Da mihi , Domine , cœlestem sapientiam , ut discam te super omnia quærere & invenire ; te super omnia sapere & diligere ; & cætera secundum ordinem sapientiæ tuæ , prout sunt , intelligere. Da prudenter declinare blandientem , & patienter ferre adversantem : quia hæc magna sapientia , non moveri omni vento verborum nec aurem malè blandienti præbere firene ; sic enim incepta pergitur via securè.



C A P U T X X V I I I.

Contra linguas obtreclatorum.

I. CHR. **F**ILI, non ægrè feras, si quidam de te malè senserint & dixerint quod non libenter audias: tu deteriora de te ipso sentire debes & neminem infirmiores te credere. Si ambulas ad intra, non multum curabis volantia verba. Est non parva prudentia filere in tempore malo, & introrsus ad me converti, nec humano iudicio disturbari.

2. Non sit pax tua in ore hominum; sive enim bene sive malè interpretati fuerint, non es ideo alter homo. Ubi est vera pax & vera gloria? nonne in me? Et qui non appetit hominibus placere nec timet displicere, multâ perfruetur pace. Ex inordinato amore & vano timore oritur omnis inquietudo cordis & distractio sensuum.



CAPUT XXIX.

Qualiter , instante tribulatione Deus invocandus est & benedicendus.

I. AN. FID. **S**IT nomen tuum , Domine , benedictum in sæcula , qui voluisti hanc tentationem & tribulationem venire super me. Non possum eam effugere ; sed necesse habeo ad te confugere , ut me adjuves & eam in bonum mihi convertas. Domine , modo sum in tribulatione & non est cordi meo bene , sed multum vexor à præsentī passione. Et nunc , Pater dilecte , quid dicam ? Deprehensus sum inter angustias : *salvifica me ex hac hora* (Joan. xij , 27). Sed propterea veni in hanc horam ut tu clarificeris , quum fuero valdè humiliatus & per te liberatus. *Complaceat tibi , Domine , ut eruas me* (Pl. xxxix , 14) ; nam ego pauper quid agere possum ? & quo ibo sine te ? Da patientiam , Domine , etiam hâc vice. Adjuva

LIBER III. CAP. XXIX. 199

me, Deus meus, & non timebo, quantumcumque gravatus fuero.

2. Et nunc inter hæc quid dicam? Domine, *fiat voluntas tua* (Matth. vj, 10). Ego bene merui tribulari & gravari: oportet utique ut sustineam; & utinam patienter, donec transeat tempestas & melius fiat! Potens est autem omnipotens manus tua etiam hanc tentationem à me auferre & ejus impetum mitigare, ne penitus succumbam; quemadmodum & prius sæpius egisti mecum, *Deus meus, misericordia mea* (Ps. lvij, 18). Et quanto mihi difficilius, tanto tibi facilior est hæc *mutatiq; dextera Excelsi* (Ps. lxxvj, 11).





CAPUT XXX.

De divino petendo auxilio , & confidentiâ recuperandæ gratiæ.

I. CHR. **F**ILI , ego Dominus confortans in die tribulationis (Nahum. j , 7). Venias ad me quum tibi non fuerit bene : hoc est quod maximè consolationem impedit cœlestem ; quia tardiùs te convertis ad orationem. Nam ante quam me intentè roges , multa interim solatia quæris & recreas te in externis ; ideoque fit ut parum omnia profint , donec advertas quia ego sum qui eruo sperantes in me , nec est extra me valens auxilium , neque utile consilium , sed neque durabile remedium. Sed jam , resumpto spiritu post tempestatem , reconvalesce in luce miserationum mearum : quia prope sum (dicit Dominus) ut restaurem universa , non solum integrè , sed & abundanter ac cumulatè.

2. Numquid mihi quidquam est diffici-

LIBER III. CAP. XXX. 201

le ? aut ero similis dicenti & non facienti ? Ubi est fides tua ? Sta firmiter & perseveranter ; esto longanimis & vir fortis : veniet tibi consolatio in tempore suo. Exspecta me , exspecta : *veniam & curabo te* (Matth. viij , 7). Tentatio est quæ te vexat , & formido vana quæ te exterret. Quid importat sollicitudo de futuris contingentibus , nisi ut *tristitiam super tristitiam habeas* ? (II. Cor. ij , 3). *Sufficit diei malitia sua.* (Matth. vj , 34.) Vanum est & inutile de futuris conturbari vel gratulari , quæ forte nunquam evenient.

3. Sed humanum est hujus-modi imaginationibus illudi ; & parvi adhuc animi signum , tam leviter trahi à suggestionem inimi- ci. Ipse enim non curat , utrum veris an falsis illudat & decipiat , utrum præ- sentium amore aut futurorum formidine prosternat. *Non ergo turbetur cor tuum ne- que formidet* (Joan. xiv , 27). Crede in me , & in misericordiâ meâ habeto fidu- ciam. Quando tu putas te elongatum à me , sæpe sum propinquior. Quando tu

æstimas pænè totum perditum, tunc sæpe majus merendi instat lucrum. Non est totum perditum, quando res accidit in contrarium. Non debes judicare secundum præsens sentire; nec sic gravitati alicui undecumque venienti inhærere & accipere, tanquam omnis spes sit ablata emergendi.

4. Noli putare te relictum ex toto, quamvis ad tempus tibi miserim aliquam tribulationem, vel etiam optatam subtraxerim consolationem; sic enim transitur ad regnum cœlorum. Et hoc sine dubio magis expedit tibi & cæteris servis meis ut exercitemini adversus, quam si cuncta ad libitum haberetis. Ego novi cogitationes absconditas; quia multum expedit pro salute tuâ ut interdum sine sapore relinquaris, ne forte eleveris in bono successu & tibi ipsi placere velis in eo quod non es. Quod dedi, auferre possum & restituere quum mihi placuerit.

5. Quum dederò, meum est; quum subtraxerò, tuum non tuli; quia meum est omne datum optimum & omne donum per-

LIBER III. CAP. XXX. 203

fectum (Jac. j , 17). Si tibi immisero gravitatem aut quamlibet contrarietatem , ne indigneris neque concidat cor tuum ; ego cito sublevare possum & omne onus in gaudium transmutare. Verumtamen justus sum & commendabilis multum , quum sic facio tecum.

6. Si rectè sapias & in veritate aspicias , nunquam debes propter adversa tam dejectè contristari ; sed magis gaudere & gratias agere , imò hoc unicum putare gaudium quod affligens te doloribus non parco tibi. *Sicut dilexit me Pater , & ego dilexi vos* (Joan. xv , 9) , dixi dilectis discipulis meis , quos utique non misi ad gaudia temporalia , sed ad magna certamina ; non ad honores , sed ad despectiones ; non ad otium , sed ad labores ; non ad requiem , sed ad afferendum fructum multum in patientiâ. Horum memento , Filii mi , verborum.





CAPUT XXXI.

*De neglectu omnis creaturæ , ut creator
possit inveniri.*

I. AN. FID. **D**OMINE , bene indigeo adhuc majori gratiâ , si debeam illuc pervenire ubi me nemo poterit nec ulla creatura impedire : nam quandiu res aliqua me retinet , non possum liberè ad te volare. Cupiebat liberè volare qui dicebat ; *Quis mihi dabit pennas sicut columbæ , & volabo , & requiescam ?* (Pf. liv , 7). Quid simplici oculo quietius ? & quid liberius nil desiderante in terris ? Oportet igitur omnem supertransire creaturam , & se ipsum perfectè deserere , ac in excessu mentis stare , & videre te omnium conditorem cum creaturis nil commune habere. Et nisi quis ab omnibus creaturis fuerit expeditus , non poterit liberè intendere divinis. Ideo enim pauci inveniuntur contemplativi , quia pauci sciunt se à peri-

LIBER III. CAP. XXXj. 205

turis & creaturis ad plenum sequestrare.

2. Ad hoc magna requiritur gratia, quæ animam levet & supra semetipsam rapiat: & nisi homo fit in spiritu elevatus, & ab omnibus creaturis liberatus, ac Deo totus unitus; quidquid scit, quidquid etiam habet, non est magni ponderis. Diu parvus erit & infra jacebit, qui aliquid magni æstimat, nisi solum unum, immensum, æternum bonum: nam quidquid Deus non est, nihil est & pro nihilo computari debet. Est magna differentia, sapientia illuminati & devoti viri & scientia literati atque studiosi clerici. Multo nobilior est illa doctrina quæ de sursum ex divinâ influentiâ manat, quam quæ laboriosè humano acquiritur ingenio.

3. Phures reperiuntur contemplationem desiderare, sed quæ ad eam requiruntur non student exercere. Est & magnum impedimentum, quia in signis & sensibilibus rebus statuer, & parum de perfectâ mortificatione habetur. Nescio quid est, & quo spiritu ducimur, & quid prætendimus,

206 DE IMIT. CHRISTI.

qui spirituales dici videmur ; quod tantum laborem & ampliorem sollicitudinem pro transitoriis & vilibus rebus agimus , & de interioribus nostris vix raro , plenè recollectis sensibus , recogitamus.

4. Proh dolor ! Statim post modicam recollectionem foras erumpimus , nec opera nostra districtâ examinatione trutinamus. Ubi jacent affectus nostri non attendimus ; & quam impura sint omnia , non deploramus. *Omnis quippe caro corruperat viam suam* (Gen. vj , 12) , & ideo sequebatur diluvium magnum. Quum ergo interior affectus noster corruptus sit , necesse est ut actio sequens , index carentiæ interioris vigoris , corrumpatur. Ex puro corde procedit fructus bonæ vitæ.

5. Quantum quis fecerit quæritur , sed ex quantâ virtute agat non tam studiosè pensatur. Si fuerit fortis , dives , pulcher , habilis , vel bonus scriptor , bonus cantor , bonus laborator , investigatur ; quam pauper sit spiritu , quam patiens & mitis , quam devotus & internus , à multis tace-

LIBER III. CAP. XXXj. 207

tur. Natura exteriora hominis respicit, gratia ad interiora se convertit : illa frequenter fallitur, ista in Deo sperat ut non decipiat.



CAPUT XXXII.

*De abnegatione sui & abdicatione
omnis cupiditatis.*

1. CHR. **F**ILI, non potes perfectam possidere libertatem, nisi totaliter abneges te met ipsum. Compediti sunt omnes proprietarii & sui ipsius amatores, cupidi, curiosi, gyrovagi, quærentes semper mollia non quæ JESU-CHRISTI, sed hoc sæpe fingentes & componentes quod non stabit; peribit enim totum quod non est ex Deo ortum. Tene breve & consummatum verbum : « Dimitte omnia, & invenies omnia ; relinque cupidinem, & reperiens re-
» quem ». Hoc mente pertracta ; & quum impleveris, intelliges omnia.

2. AN. FID. Domine, hoc non est opus

208 DE IMIT. CHRISTI.

unius diei nec ludus parvulorum : imò in hoc brevi includitur omnis perfectio Religioforum.

3. CHR. Fili , non debes averti nec statim dejici , auditâ viâ perfectorum ; sed magis ad sublimiora provocari & ad minus ad hæc ex desiderio suspirare. Utinam sic tecum esset , & ad hoc pervenisses ut tui ipsius amator non esses , sed ad nutum meum purè stares & ejus quem tibi præposui Patris ! tunc mihi valdè placeres , & tota vita tua in gaudio & pace transiret. Adhuc multa habes ad relinquendum ; quæ nisi mihi ex integro resignaveris , non acquires quod postulas. *Suadeo tibi emere à me aurum , ignitum probatum , ut locuplet fias* , (Apoc. iij , 18.) id est , sapientiam cœlestem omnia infima conculcantem : postpone terrenam sapientiam , omnem humanam & propriam complacentiam.

4. Dixi viliora tibi emenda pro pretiosis & altis in rebus humanis : nam valdè vilis & parva , ac penè oblivioni tradita videtur vera cœlestis sapientia , non sapiens

LIBER III. CAP. XXXij. 209

alta de se nec magnificari quærens in terrâ, quam multi ore tenus prædicant sed vitâ longè dissentiunt ; ipsa tamen est pretiosa margarita , à multis abscondita.



C A P U T XXXIII.

De instabilitate cordis , & de intentione finali ad Deum habendâ.

I. CHR. **F**ILI , noli credere affectui tuo : qui nunc est , cito mutabitur in aliud. Quam diu vixeris , mutabilitati subiectus eris , etiam nolens : ut modo lætus , modo tristis ; modo pacatus , modo turbatus ; nunc devotus , nunc indevotus ; nunc studiosus , nunc acediosus ; nunc gravis , nunc levis inveniaris. Sed stat super hæc mutabilia sapiens & bene doctus in spiritu ; non attendens quid in se sentiat vel quâ parte flet ventus instabilitatis , sed ut tota intentio mentis ejus ad debitum & optimum proficiat finem. Nam sic poterit unus & idem inconcussusque permanere , simplici inten-

cunditatem esse poterit ? Sed deficiunt in sapientiâ suâ mundi sapientes & qui carnem sapiunt ; quia ibi plurima vanitas , & hîc mors invenitur. Qui autem te per contemptum mundanorum & carnis mortificationem sequuntur , verè sapientes esse cognoscuntur ; quia de vanitate ad veritatem , de carne ad spiritum transferuntur : istis sapit Deus ; & quidquid boni invenitur in creaturis , totum ad laudem referunt sui conditoris. Dissimilis tamen & multum dissimilis sapor Creatoris & creaturæ , æternitatis & temporis , lucis increatæ & lucis illuminatæ.

3. O lux perpetua , cuncta creata transcendens lumina ! *fulgura coruscationem* (Pl. cxliij, 6) de sublimi , penetrantem omnia cordis mei intima : purifica , lætifica , clarifica , & vivifica spiritum meum cum suis potentiis , ad inhærendum tibi jubilosis excessibus. O quando veniet hæc beata & desiderabilis hora , ut tuâ me faties præsentiâ & sis mihi omnia in omnibus ! Quam diu hoc datum non fuerit , nec ple-

LIBER III. CAP. XXXIV. 213

um gaudium erit. Adhuc , proh dolor ! vivit in me vetus homo , non est totus crucifixus , non est perfectè mortuus ; adhuc concupiscit fortiter contra spiritum , bella movet intestina , nec regnum animæ patitur esse quietum.

4. Sed Tu , qui , *dominaris potestati maris motum autem fluctuum ejus mitigas* (Ps. lxxxviiij , 10) , *exsurge , Domine , adjuva me* (Ps. xliij , 26) . *Diffipa gentes quæ bella volunt* (Ps. lxvij , 31) , contere eas in virtute tuâ. Ostende , quæso , magnalia tua & glorificetur dextera tua ; quia non est spes alia nec refugium mihi , nisi in te , Domine Deus meus.





CAPUT XXXV.

*Quod non est securitas à tentatione
in hâc vitâ.*

1. CHR. **F**ILI, nunquam securus es in hâc vitâ ; sed quoad vixeris , semper arma spiritualia tibi sunt necessaria. Inter hostes versaris ; & à dextris & à sinistris impugnaris. Si ergo non uteris undique scuto patientiæ , non eris diu sine vulnere : insuper , si non ponis cor tuum fixè in me cum verâ voluntate cuncta patiendi propter me , non poteris ardorem istum sustinere nec ad palmam pertingere Beatorum. Oportet te ergo viriliter omnia pertransire , & potenti manu uti adversus objecta ; nam *vincenti datur manna* (Apoc. ij , 17) , & torpenti relinquitur multa miseria.

2. Si quæris in hâc vitâ requiem , quomodo tunc pervenies ad æternam requiem ? Non ponas te ad multam requiem , sed ad magnam patientiam. Quære veram pacem ,

LIBER III. CAP. XXXV. 215

non in terris , sed in cœlis ; non in hominibus nec in cæteris creaturis , sed in Deo solo. Pro amore Dei debes omnia libenter subire ; labores scilicet & dolores , tentationes , vexationes , anxietates , necessitates , infirmitates , injurias , oblocutiones , reprehensiones , humiliationes , confusiones , correctiones , & despectiones : hæc juvant ad virtutem , hæc probant CHRISTI tironem , hæc fabricant cœlestem coronam. Ego reddam mercedem æternam , pro brevi labore ; & infinitam gloriam , pro transitoriâ confusione.

3. Putas tu quod semper habebis pro tuâ voluntate consolationes spirituales ? Sancti mei non semper habuerunt tales ; sed multas grâvitates , & tentationes varias , magnasque desolationes : sed patienter sustinuerunt se in omnibus , & magis confisi sunt Deo quam sibi ; scientes *quod non sunt condignæ passiones hujus temporis ad futuram gloriam* (Rom. viij , 18) , promerendam. Vis tu statim habere quod multi

216 DE IMIT. CHRISTI.

post multas lacrymas & magnos labores
vix obtinuerunt? *Exspecta Dominum, viri-
liter age, & confortetur cor tuum*: (Ps.
xxvj, 14): noli diffidere, noli discedere,
sed corpus & animam expone constanter
pro gloriâ Dei: ego reddam plenissimè,
ego tecum ero in omni tribulatione.



C A P U T X X X V I.

Contra vana hominum judicia.

1. CHR. F I L I, jacta cor tuum firmiter
in Domino; & humanum ne metuas ju-
dicium, ubi te conscientia pium reddit &
insontem. Bonum est & beatum taliter pati;
nec hoc erit grave humili corde, & Deo
magis quam sibi confidenti. Multi multa lo-
quuntur, & ideo parva fides est adhibenda.
Sed & omnibus fatis esse non est possibile.
Etsi Paulus omnibus studuit in Domino
placere & omnibus omnia factus est, ta-
men etiam pro minimo duxit quod ab hu-
mano die judicatus fuit.

2. Egit

LIBER III. CAP. XXXVJ. 417

2. Egit satis pro aliorum ædificatione & salute, quantum in se erat & poterat; sed ne ab aliis aliquando judicaretur vel despiceretur prohibere non potuit. Ideo totum Deo commisit, qui totum noverat; & patientiâ ac humilitate, contra *os loquentium iniqua* (Ps. *lxij*, 12), aut etiam vana ac mendosa cogitantium, atque pro libitu suo quæque jactantium, se defendit. Respondit tamen interdum, ne infirmis ex suâ taciturnitate generaretur scandalum.

3. *Quis tu, ut timeas ab homine mortali* (Is. *lj*, 12)? hodie est, & cras non comparet. Deum time, & hominum terrores non expavesces. Quid potest aliquis in te verbis aut injuriis? sibi potius nocet quam tibi; nec poterit judicium Dei effugere, quicumque est ille. Tu habe Deum, præ oculis & noli contendere verbis querulosis. Quod si ad præsens tu videris succumbi & confusionem pati quam non meruisti; ne indigneris ex hoc, neque per impatentiam minuas coronam tuam; sed ad me potius respice in cælum, qui potens sum

eripere ab omni confusione & injuriâ , & unicuique reddere secundum opera sua.



CAPUT XXXVII.

*De purâ & integrâ resignatione sui ad
obtinendam cordis libertatem.*

I. CHR. **F**ILI, relinque te , & invenies me. Sta sine electione & omni proprietate , & lucraberis semper : nam & adjicietur tibi amplior gratia , statim ut te resignaveris nec resumpseris.

2. AN. FID. Domine , quoties me resignabo , & in quibus me relinquam ?

3. CHR. Semper , & in omni horâ ; sicut in parvo , sic & in magno : nihil excipio , sed in omnibus te nudatum inveniri volo. Alioquin , quomodo poteris esse meus , & ego tuus , nisi fueris ab omni propriâ voluntate intus & foris spoliatus ? Quanto celerius hoc agis , tanto melius habebis ; & quanto plenius & sincerius , tanto mihi plus placebis & amplius lucraberis.

LIBER III. CAP. XXXVIJ. 219

4. Quidam se resignant, sed cum aliquâ exceptione; non enim plenè Deo confidunt, ideo sibi providere satagunt. Quidam etiam primo totum offerunt; sed postea, tentatione pulsati, ad propria redeunt: ideo minimè in virtute proficiunt. Hi ad veram puri cordis libertatem & jucundæ familiaritatis meæ gratiam non pertingent, nisi integrâ resignatione, & quotidianâ sui immolatione priùs factâ, sine quâ non stat nec stabit unio fructiva.

5. Dixi tibi sæpius, & nunc iterum dico: Relinque te, resigna te, & fruëris magnâ internâ pace. Da totum pro toto; nil exquire, nil repete; sta purè & inhæsitanter in me: & habebis me; eris liber in corde, & *tenebræ non conculcabunt*, (Ps. cxxviii, 12), te. Ad hoc conare, hoc ora, hoc desidera, ut ab omni proprietate possis exspoliari & nudus nudum JESUM sequi, tibi mori, & mihi æternaliter vivere. Tunc deficient omnes vanæ phantasiæ, conturbationes iniquæ, & curæ superfluæ: tunc etiam recedet im-

moderatus ùmor , & inordinātus amor
moriatur.




CAPUT XXXVIII.

*De bono regimine in externis , & recursu
ad Deum in periculis.*

I. CHR. **F**ILI, ad istud diligenter tendere debes , ut , in omni loco & actione seu occupatione externâ , sis intimus , liber , & tui ipsius potens ; & sint omnia sub te , & non tu sub eis ; ut sis dominus actionum tuarum & rector , non servus nec emptitius ; sed magis , exemptus verusque Hebraeus , in sortem ac libertatem transiens filiorum Dei , qui stant super præsentia & speculantur æterna , qui transitoria sinistro intuentur oculo , & dextro coelestia ; quos temporalia non trahunt ad inhærendum ; sed trahunt ipsi magis ea ad bene serviendum prout ordinata sunt à Deo & instituta à summo opifice , qui nil inordinatum in suâ reliquit creaturâ.

LIBER. III. CAP. XXXVIIJ. 221

2. Si etiam in omni eventu stas non in apparentiâ externâ, nec oculo carnali lustras visa vel audita, sed mox in quâlibet causâ intras cum Moyse in tabernaculum ad consulendum Dominum; audies nonnunquam divinum responsum, & redies instructus de multis præsentibus & futuris. Semper enim Moyses recursum habuit ad tabernaculum pro dubiis & quæstionibus solvendis; fugitque ad orationis adjutorium pro periculis & improbitatibus hominum sublevandis: sic & tu confugere debes in cordis tui secretarium, divinum intentiùs implorando suffragium. Propterea namque Josue & filii Israël à Gabaonitis leguntur decepti, quia *os Domini* priùs *non interrogaverunt* (Josu. ix, 14), sed nimium creduli dulcibus sermonibus, falsâ pietate delusi sunt.





C A P U T X X X I X.

*Quod homo non sit importunus
in negotiis.*

1. CHR. **F**ILI, committe mihi semper causam tuam, ego bene disponam in tempore suo. Exspecta ordinationem meam, & senties inde profectum.

2. AN. FID. Domine, satis libenter tibi omnes res committo, quia parum potest cogitatio mea proficere. Utinam non multum adhærerem futuris eventibus, sed ad beneplacitum tuum incunctanter me offerrem!

3. CHR. Fili, sæpe homo rem aliquam vehementer agitat, quam desiderat: sed quum ad eam pervenerit, aliter sentire incipit; quia affectiones circa idem non sunt durabiles, sed magis de uno ad aliud impellunt. Non est igitur minimum, etiam in minimis, se ipsum relinquere.

4. Verus profectus hominis est abnega-

LIBER III. CAP. XXXIX. 223

tio sui ipsius , & homo abnegatus valdè liber est & securus. Sed antiquus hostis , omnibus bonis adversans , à tentatione non cessat , sed diu noctuque graves molitur insidias , si forte in laqueum deceptionis possit præcipitare incautum. *Vigilate & orate* , dicit Dominus , *ut non intretis in tentationem* (Matth. xxv , 41).



C A P U T X L.

*Quod homo nihil boni ex se habet ,
& de nullo gloriari potest.*

I. AN. FID. **D**OMINE , quid est homo , quod memor es ejus ? aut filius hominis , quoniam visitas eum (Ps. viij , 5) ? Quid promeruit homo , ut dares illi gratiam tuam ? Domine , quid possum conqueri si me deseris ? aut quid justè obtendere possum si quod peto non feceris ? Certè hoc in veritate cogitare possum & dicere : « Domi-
» ne , nihil sum , nihil possum , nihil boni
» ex me habeo ; sed in omnibus deficio

224 DE IMIT. CHRISTI.

» & ad nihil semper tendo ; & , nisi à
» te fuero adjutus & interiùs informatus ,
» totus efficior tepidus & dissolutus ».

2. *Tu autem* , Domine , semper *idem ipse* es (Ps. *cj* , 28) ; & permanes in æternum , semper bonus , justus , & sanctus , bene , justè , ac sanctè agens omnia & disponens in sapiëntiâ. Sed ego , qui ad defectum sum magis pronus quam ad pro-
fectum , non sum semper in uno statu perdurans ; quia septem tempora mutantur super me. Verumtamen cito melius fit , quum tibi placuerit & manum porrexeris adjutricem : quia tu solus sine humano suffragio potes auxiliari , & in tantum confirmare ut vultus meus amplius in diversa non mutetur , sed in te uno cor meum convertatur & quiescat.

3. Unde , si bene scirem omnem humanam consolationem abjicere , sive propter devotionem adipiscendam , sive propter necessitatē quâ compellor te quærere quia non est homo qui me consoletur ; tunc possem merito de gratiâ tuâ sperare , &

LIBER III. CAP. XL. 225

de dono novæ consolationis exsultare.

4. Grâcias tibi, unde totum venit quotiescumque mihi bene succedit. Ego autem vanitas & nihilum ante te, inconstans homo & infirmus. Unde ergo possum gloriari, aut cur appeto reputari? Numquid de nihilo? & hoc vanissimum est. Verè inanis gloria, mala pestis, vanitas maxima; quia à verâ trahit gloriâ & cœlesti spoliât gratiâ: dum enim homo complacet sibi, displicet tibi; dum inhiat laudibus humanis, privatur veris virtutibus.

5. Est autem vera gloria & exsultatio sancta gloriari in te, & non in se; gaudere in nomine tuo, non in propriâ virtute; nec in aliquâ creaturâ delectari, nisi propter te. Laudetur nomen tuum, non meum; magnificetur opus tuum, non meum; benedicatur nomen sanctum tuum, nihil mihi autem attribuatur de laudibus hominum. Tu gloria mea, tu exsultatio cordis mei, in te gloriabor & exultabo totâ die; pro me autem nihil, *nisi in infirmitatibus meis* (II. Cor. xij, 5).

6. Quærant Judæi gloriam quæ ab invicem est ; ego hanc requiram *quæ à solo Deo est* (Joan. v , 44). Omnis quidem gloria humana , omnis honor temporalis , omnis altitudo mundana , æternæ gloriæ tuæ comparata , vanitas & stultitia. O Veritas mea & misericordia mea , Deus meus , Trinitas beata ! tibi soli laus , honor , virtus , & gloria per infinita sæculorum sæcula.



CAPUT XLI.

De contemptu omnis temporalis honoris.

1. CHR. **F**ILI , noli tibi attrahere , si videas alios honorari & elevari , te autem despici & humiliari. Erige cor tuum ad me in cœlum , & non contristabit te contemptus hominum in terrâ.

2. AN. **F**ID. Domine , in cæcitate sumus , & vanitate cito seducimur. Si rectè me inspicio , nunquam mihi facta est inju-

LIBER III. CAP. xlj. 227

ria ab aliquâ creaturâ , unde nec justè habeo conqueri adversum te. Quia autem frequenter & graviter peccavi tibi , merito armatur contra me omnis creatura. Mihi igitur justè debetur confusio & contemptus ; tibi autem laus , honor , & gloria : & nisi me ad hoc præparavero , quod velim libenter ab omni creaturâ despici & relinqui , atque penitus nihil videri ; non possum interiùs pacificari & stabiliri , nec spiritualiter illuminari , neque plenè tibi uniri.



C A P U T X L I I.

Quod pax non est ponenda in hominibus.

I. CHR. **F**ILI , si ponis pacem tuam cum aliquâ personâ propter tuum sentire & convivere , instabilis eris & implicatus ; sed si recursum habes ad semper viventem & manentem Veritatem , non contristabit amicus recedens aut moriens. In me debet amari

228 DE IMIT. CHRISTI.

dilectio stare ; & propter me diligendus est , quisquis tibi bonus visus est & multum carus in hâc vitâ. Sine me non valet nec durabit amicitia , nec est vera & munda dilectio quam ego non copulo. Ita mortuus debes esse talibus affectionibus dilectorum hominum , ut , quantum ad te pertinet , sine omni humano optares esse consortio. Tanto homo Deo magis appropinquat , quanto ab omni solatio terreno longius recedit ; tanto etiam altius ad Deum ascendit , quanto profundius in se descendit & plus sibi vilescit.

2. Qui autem sibi aliquid boni attribuit , gratiam Dei in se venire impedit ; quia gratia Spiritûs sancti cor humile semper quærit. Si scires te perfectè annihilare atque ab omni creato amore evacuare , tunc deberem in te cum magnâ gratiâ emanare. Quando tu respicis ad creaturas , subtrahitur tibi aspectus Creatoris. Disce te in omnibus propter Creatorem vincere , tunc ad divinam valebis cognitionem pertingere. Quantumcumque modicum sit , si inordi-

LIBER III. CAP. xliij. 229

natè diligitur & respicitur , retardat à summo & vitiat.



C A P U T X L I I I .

Contra vanam & sæcularem scientiam.

I. CHR. **F**ILI, non te moveant pulchra & subtilia hominum dicta ; *non enim in sermone est regnum Dei , sed in virtute* (I. Cor. iv , 20). Attende verba mea , quæ corda accendunt & mentes illuminant , inducunt compunctionem & variam ingerunt consolationem. Nunquam ad hoc legas verbum ut doctior aut sapientior possis videri : stude mortificationi vitiorum , quia hoc amplius tibi proderit quam notitia multarum difficilium quæstionum.

2. Quum multa legeris & cognoveris , ad unum semper oportet redire principium. Ego sum qui doceo hominem scientiam , (Ps. lxxxiiij , 10) , & clariorem intelligentiam parvulis tribuo quam ab homine possit doceri. Cui ego loquor , cito sapiens erit

230 DE IMIT. CHRISTI.

& multum in spiritu proficiet. Væ eis qui multa curiosa ab hominibus inquirunt, & de viâ mihi serviendi parum curant ! Veniet tempus quando apparebit magister magistrorum, Christus, Dominus angelorum, cunctorum auditurus lectiones, hoc est, singulorum examinaturus conscientias ; & tunc *scrutabitur Jerusalem in lucernis* (Sophon. j, 12.) & *illuminabit abscondita tenebrarum* (I. Cor. iv, 5), tacebuntque argumenta linguarum.

3. Ego sum qui humilem in puncto elevo mentem, ut plures æternæ veritatis capiat rationes, quam si quis decem annis studuisset in scholis. Ego doceo sine strepitu verborum, sine confusione opinionum, sine fastu honoris, sine pugnatione argumentorum. Ego sum qui doceo terrena despiciere, præsentia fastidire, æterna quærere, æterna sapere, honores fugere, scandala sufferre, omnem spem in me ponere, extra me nihil cupere, & super omnia me ardentè amare.

4. Nam quidam, amando me intimè,

LIBER III. CAP. xliij. 231

didicit divina & loquebatur mirabilia ; plus profecit in relinquendo omnia , quam in studendo subtilia. Sed aliis loquor communia , aliis specialia : aliquibus in signis & figuris dulciter appareo , quibusdam vero in multo lumine revelo mysteria. Una vox librorum , sed non omnes æquè informat ; quia intus sum doctor veritatis , scrutator cordis , cogitationum intellectus , actionum promotor , distribuens singulis sicut dignum iudico.



C A P U T X L I V.

De non attrahendo sibi res exteriores.

1. CHR. **F**ILI, in multis oportet te esse inscium , & æstimare te tanquam mortuum super terram & cui totus mundus crucifixus sit. Multa etiam oportet surdâ aure pertransire , & quæ tuæ pacis sunt magis cogitare. Utilius est oculos à rebus displicentibus avertere & unicuique suum sentire relinquere , quam contentiosus sermonibus

232 DE IMIT. CHRISTI.

deservire. Si bene steteris cum Deo & ejus
judicium aspexeris, facilius te victum por-
tabis.

2. AN. FID. O Domine, quousque ve-
nimus? Ecce damnum defletur temporale,
pro modico quæstu laboratur & curritur;
& spirituale detrimentum in oblivionem
transit, & vix sero reditur; quod parum
vel nihil prodest attenditur, & quod sum-
mè necessarium est negligenter præteritur;
quia totus homo ad externa defluit, &
nisi cito resipiscat, libens in exterioribus
jacet.



C A P U T X L V.

*Quod omnibus non est credendum ;
& de facili lapsu verborum.*

1. AN. FID. **D**A mihi *auxilium*, Domi-
ne, *de tribulatione*, quia *vana salus homi-
nis* (Ps. lix, 13). Quam sæpe ibi non in-
veni fidem, ubi me habere putavi! Quo-
ties etiam ibi reperi, ubi minus præsumpsi!

LIBER III. CAP. XLV. 233

Vana ergo spes in hominibus ; salus autem justorum in te , Deus. Benedictus sis , Domine , Deus meus , in omnibus quæ accidunt nobis ! Infirmi sumus & instabiles , cito fallimur & permutamur.

2. Quis est homo , qui ita cautè & circumspectè in omnibus se custodire valet , ut aliquando in aliquam deceptionem vel perplexitatem non veniat ? Sed qui in te , Domine , confidit ac simplici ex corde quærit , non tam facile labitur : & si inciderit in aliquam tribulationem , quocumque modo fuerit etiam implicatus , citiùs per te eruetur aut à te consolabitur ; quia tu non deseres in te sperantem usque in finem. Rarus fidus amicus , in cunctis perseverans amici pressuris ; tu , Domine , tu solus es fidelissimus in omnibus , & præter te non est alter talis.

3. O ! quam bene sapuit sancta illa anima (S. Agatha) quæ dixit , *Mens mea solidata est & in Christo fundata !* Si ita mecum foret , non tam facilè timor humanus me sollicitaret , nec verborum jacula move-

234 DE IMIT. CHRISTI.

rent. Quis omnia prævidere, quis prævidere futura mala sufficit? Si prævifa sæpe etiam lædunt, quid improvisa nisi graviter feriunt? Sed quare mihi misero non melius providi? Cur etiam tam facile aliis credidi? Sed homines sumus; nec aliud quam fragiles homines sumus; etiam si angeli à multis æstimamur & dicimur. Cui credam, Domine? cui, nisi tibi? Veritas es, quæ non fallis, nec falli potes. Et rursum, *Omnis homo mendax* (Pf. cxv, 11), infirmus, instabilis, & labilis, maxime in verbis; ita ut statim vix credi debeat quod rectum in facie sonare videtur.

4. Quam prudenter præmonuisti cavendum ab hominibus! & quia *inimici hominis domestici ejus* (Mich. vij, 6: Math. x, 26), nec credendum, si quis dixerit, *Ecce hic, aut ecce illic* (Luc. xvij, 21). Doctus sum damno meo; & utinam ad cautelam majorem, & non ad insipientiam mihi (Pf. xxj, 3)? «Cautus esto, ait quidam, cautus esto; serva apud te quod dico». Et dum ego fileo & absconditum credo, nec

LIBER III. CAP. xlv. 235

ille filere potest quod silendum petiit, sed statim prodit me & se, & abit. Ab hujusmodi fabulis & incautis hominibus protege me, Domine; ne in manus eorum incidam, nec unquam talia committam. Verbum verum & stabile da in os meum, & linguam callidam longè fac à me: quod pati nolo, omnimodè cavere debeo.

5. O! quam bonum & pacificum, de aliis filere, nec indifferenter omnia credere, neque de facili ulterius effari, paucis se ipsum revelare, te semper inspectorem cordis quærere, nec omni vento verborum circumferri, sed omnia intima & externa secundum placitum tuæ voluntatis optare perfici! Quam tutum, pro conservatione cœlestis gratiæ, humanam fugere apparentiam, nec appetere quæ foris admirationem videntur præbere, sed ea totâ fedulitate sectari quæ vitæ emendationem dant & fervorem! Quam multis nocuit virtus scita ac præproperè laudata! Quam fanè profuit gratia silentio servata in hâc fragili vitâ, quæ tota tentatio ferrur & militia!



CAPUT XLVI.

*De confidentiâ in Deo habendâ ,
quando insurgunt verborum
jacula.*

I. CHR. **F**ILI , sta firmiter & spera in me. Quid enim sunt verba , nisi verba ? per aërem volant , sed lapidem non lædunt. Si reus es , cogita quod libenter emendare te velis ; si nihil tibi conscius es , pensa quod velis libenter pro Deo hoc sustinere. Parum satis est , ut vel verba interdum sustineas , qui necdum fortia verbera tolerare vales. Et quare tam parva tibi ad cor transeunt , nisi quia adhuc carnalis es & homines magis quam oportet attendis ? nam quia despici metuis , idcirco reprehendi pro excessibus non vis & excusationum umbracula quæris.

2. Sed inspice te melius , & agnosces quia vivit adhuc in te mundus & vanus amor placendi hominibus. Quum enim bas-

LIBER III. CAP. xlvj. 237

ſari refugis & confundi pro defectibus tuis ; conſtat utique quod nec verus humilis ſis ; nec verè mundo mortuus , nec mundus tibi crucifixus. Sed audi verbum meum , & non curabis decem millia verba hominum. Ecce ſi cuncta contra te dicerentur quæ fingi maligniſſimè poſſent ; quid tibi nocerent , ſi omnino tranſire permetteres nec plus quam feſtucam perpenderes ? numquid vel unum capillum tibi extrahere poſſent ?

3. Sed qui cor intus non habet nec Deum præ oculis , faciliter verbo movetur vituperationis : qui autem in me confidit nec proprio iudicio ſtare appetit , abſque humano terrore erit. Ego enim ſum iudex & cognitor omnium ſecretorum , ego ſcio qualiter res acta eſt , ego injuriantem novi & ſuſtinentem. A me exiit verbum iſtud ; me permittente hoc accidit , *ut revelentur ex multis cordibus cogitationes* (Luc. ij , 35). Ego reum & innocentem iudicabo , ſed occulto iudicio utrumque ante probare volui.

4. *Testimonium hominum ſæpe fallit ;*

meum iudicium verum est, stabit, & non subvertetur. Latet plerumque; & paucis ad singula patet; nunquam tamen errat nec errare potest, etiamsi oculis insipientium non rectum videatur. Ad me ergo recurrendum est in omni iudicio, nec proprio innitendum arbitrio. Justus enim non conturbabitur, quidquid à Deo ei acciderit; etiamsi injustè aliquid contra eum prolatum fuerit, non multum curabit. Sed nec vanè exultabit, si per alios rationabiliter excusetur: pensat namque quia ego sum *scrutans corda & renes* (Ps. vij, 10), qui non iudico secundum faciem & humanam apparentiam; nam sæpe in oculis meis reperitur culpabile, quod hominum iudicio creditur laudabile.

5. AN. FID. Domine Deus, Iudex iuste, fortis, & patiens, qui hominum nosti fragilitatem & pravitatem, esto robur meum & tota fiducia mea; non enim mihi sufficit conscientia mea: tu nosti quod ego non novi, & ideo in omni reprehensione me humiliare debui & mansuetè sustinere.

LIBER III. CAP. XLVj. 239

Ignosce quoque mihi propitius quoties sic non egi, & dona iterum gratiam amplioris sufferentiæ. Melior est enim mihi tua copiosa misericordia ad consequutionem indulgentiæ, quam mea opinata iustitia pro defensione latentis conscientiæ. Etsi nihil mihi conscius sum, non in hoc tamen justificatus sum (I. Cor. iv, 4); quia, remota misericordiâ tuâ, non justificabitur in conspectu tuo omnis vivens (Ps. cxlij, 2).

C A P U T X L V I I.

*Quod omnia gravia pro æternâ vitâ
sunt toleranda.*

I. CHR. **F**ILI, non te frangant labores quos assumpsisti propter me, nec tribulationes te dejiciant usquequaque; sed mea promissio in omni eventu te roboret & consoletur. Ego sufficiens sum ad reddendum supra omnem modum & mensuram. Non diu hîc laborabis, nec semper gravaberis doloribus: exspecta paulisper, &

videbis celerem finem malorum ; veniet una hora quando cessabit omnis labor & tumultus : modicum est & breve omne quod transit cum tempore.

2. Age quod agis ; fideliter labora in vineâ meâ , ego ero merces tua. Scribe , lege , canta , geme , tace , ora , sustine viriliter contraria ; digna est his omnibus & majoribus proeliis vita æterna. Veniet pax in die unâ quæ nota est Domino : & erit non dies neque nox hujus scilicet temporis ; sed lux perpetua , claritas infinita , pax firma , & requies secura. Non dices tunc ; *Quis me liberabit de corpore mortis hujus* (Rom. vij , 24) nec clamabis ; *Heu mihi ! quia incolatus meus prolongatus est* (Ps. cxix , 5) ! quoniam præcipitabitur mors , & salus erit indefectiva , anxietas nulla , jucunditas beata , societas dulcis & decora.

3. O ! si vidisses Sanctorum in cœlo coronas perpetuas , quantâ quoque nunc exsultant gloriâ qui huic mundo olim contemptibiles & quasi vitâ ipsâ indigni putabantur !

LIBER III. CAP. xlvij. 241

tabantur ! profectò te statim humiliares usque ad terram, & affectares potius omnibus subesse quam uni præesse ; nec hujus vitæ lætos dies concupisceres , sed magis pro Deo tribulari gauderes , & pro nihilo inter homines reputari maximum lucrum duceres.

4. O ! si tibi hæc scaperent & profundè ad cor transirent , quomodo auderes vel semel conqueri ? Nonne pro vitâ æternâ cuncta laboriosa sunt toleranda ? Non est parvum quid , perdere aut lucrari regnum Dei. Leva igitur faciem tuam in cælum : ecce ego , & omnes Sancti mei mecum , qui in hoc sæculo magnum habuere certamen ; modo gaudent , modo consolantur , modo securi sunt , modo requiescunt , & sine fine mecum in regno Patris mei permanebunt.





CAPUT XLVIII.

*De die æternitatis , & hujus vite
angustiis.*

I. AN. FID. **O** SUPERNÆ civitatis mansio
beatissima ! **O** dies æternitatis clarissima ,
quam nox non obscurat , sed summa veri-
tas semper irradiat ! dies semper læta ,
semper secura , & nunquam statum mu-
tans in contraria ! **O** ! utinam dies illa il-
luxisset , & cuncta hæc temporalia finem
accepissent ! Lucet quidem Sanctis , perpetuâ
claritate splendida ; sed non nisi à longe
& per speculum peregrinantibus in terrâ .

2. Nôrunt cœli cives quam gaudiosa sit
illa ; gemunt exsules filii Evæ , quod amara
& tædiosa sit ista. Dies hujus temporis
parvi & mali , pleni doloribus & angustiis ;
ubi homo multis peccatis inquinatur , multis
passionibus irretitur , multis timoribus strin-
gitur , multis curis distenditur , multis cu-
riositatibus distrahitur , multis vanitatibus

LIBER III. CAP. xlviii. 243

implicatur , multis erroribus circumfunditur , multis laboribus atteritur , tentationibus gravatur , deliciis enervatur , egestate cruciatur.

3. O ! quando finis horum malorum ? quando liberabor à miserâ servitute vitiorum ? quando memorabor , Domine , tui solius ? quando ad plenum lætabor in te ? quando ero sine omni impedimento , in verâ libertate , sine omni gravamine mentis & corporis ? quando erit pax solida , pax imperturbabilis & secura , pax intus & foris , pax ex omni parte firma ? **JESU bone !** quando stabo ad videndum te ? quando contemplabor gloriam regni tui ? quando eris mihi omnia in omnibus ! O ! quando ero tecum in regno tuo , quod præparasti dilectis tuis ab æterno ! Relictus sum pauper & exul in terrâ hostili , ubi bella quotidiana & infortunia maxima.

4. Consolare exilium meum , mitiga dolorem meum , quia ad te suspirat omne desiderium meum : nam onus mihi totum est quidquid hic mundus offert ad sola-

244 DE IMIT. CHRISTI.

tium. Desidero te intimè frui , sed nequeo apprehendere : opto inhærere cœlestibus , sed deprimunt res temporales & immortificatæ passiones. Mente omnibus rebus superesse volo , carne autem invitè subesse cogor. Sic ego homo infelix mecum pugno & factus sum mihi met ipsi gravis , dum spiritus sursum & caro quærit esse deorsum.

5. O ! quid intus patior , dum mente cœlestia tracto , & mox carnalium turba occurrit oranti ! Deus meus ! *ne elongeris à me* (Pl. lxx , 12) , *neque declines in irâ à servo tuo* (Pl. xxvj , 9) . *Fulgura coruscationem tuam , & dissipa eas ; emitte sagittas tuas* (Pl. cxliij , 6) , & conturbentur omnes phantasiæ inimici. Recollige sensus meos ad te ; fac me oblivisci omnium mundanorum ; da cito abjicere & contemnere phantasmata vitiorum. Succurre mihi , æterna Veritas , ut nulla me moveat vanitas. Adveni , cœlestis Suavitas , & fugiat à facie tuâ omnis impuritas. Ignosce quoque mihi & misericorditer indulge , quoties præter se aliud in oratione revolyo. Confiteor etc.

LIBER III. CAP. xlviiij. 245

nim verè quia valdè distractè me habere consuevi : nam ibi multoties non sum ubi corporaliter sto aut sedeo , sed ibi magis sum quo cogitationibus feror ; ibi sum ubi cogitatio mea est ; ibi est frequenter cogitatio mea ubi est quod amo ; hoc mihi cito occurrit , quod naturaliter delectat aut ex usu placet.

6. Unde tu , Veritas , apertè dixisti , *Ubi enim est thesaurus tuus , ibi est & cor tuum* (Matth. vj , 21). Si cœlum diligo , libenter de cœlestibus penso ; si mundum amo , mundi felicitatibus congaudeo & de adversitatibus ejus tristor ; si carnem diligo , quæ carnis sunt sæpe imaginor ; si spiritum amo , de spiritualibus cogitare delector : quæcumque enim diligo , de his libenter loquor & audio , atque talium imagines mecum ad domum reporto. Sed beatus ille homo , qui propter te , Domine , omnibus creaturis licentiam abundi tribuit , qui naturæ vim facit , & concupiscentias carnis fervore spiritûs crucifigit ; ut , serenatâ conscientia , puram tibi ora-

246 DE IMIT. CHRISTI.

tionem offerat, dignusque sit angelicis choris interesse, omnibus terrenis foris & intus exclusis.



C A P U T XLIX.

De desiderio æterna vitæ, & quanta sint certantibus bona promissa.

I. CHR. FILI, quum tibi desiderium æternæ beatitudinis desuper infundi sentis, & de tabernaculo corporis exire concupiscis ut claritatem meam sine vicissitudinis umbrâ contemplari possis; dilata cor tuum & omni desiderio hanc sanctam inspirationem suscipe. Redde amplissimas supernæ bonitati gratias, quæ tecum sic dignanter agit, clementer visitat, ardentem excitat, potenter subleuat ne proprio pondere ad terrena labaris: neque enim hoc cogitatu tuo aut conatu accipis, sed solâ dignatione supernæ gratiæ & divini respectûs; quatenus in virtutibus & majori humilitate proficias, & ad futura certamina te præpares,

LIBER III. CAP. xlix. 247

mihique toto cordis affectu adhærere ac ferventi voluntate studeas deservire.

2. Fili, sæpe ignis ardet, sed sine fumo flamma non ascendit : sic & aliquorum desideria ad cœlestia flagrant, & tamen à tentatione carnalis affectûs liberi non sunt; idcirco nec omnino purè pro honore Dei agunt, quod tam desideranter ab eo petunt. Tale est & tuum sæpe desiderium, quod insinuasti fore tam importunum; non enim est hoc purum & perfectum quod propriâ commoditate est infectum.

3. Pete, non quod tibi est delectabile & commodum, sed quod mihi est acceptabile atque honorificum; quia, si rectè judicas, meam ordinationem tuo desiderio & omni desiderato præferre debes, ac sequi. Novi desiderium tuum, & frequentes gemitus audiui. Jam velles esse in libertate gloriæ filiorum Dei; jam te delectat domus æterna & cœlestis patria, gaudio plena: sed nondum venit hora ista; sed est adhuc aliud tempus, scilicet tempus belli, tempus laboris & probationis. Optas sum-

48 DE IMIT. CHRISTI.

mo repleti bono , sed non potes hoc assequi modo. Ego sum ; exspecta me , dicit Dominus , donec veniat regnum Dei.

4. Probandus es adhuc in terris & in multis exercitandus. Consolatio tibi interdum dabitur , sed copiosa satietas non concedetur. *Confortare* igitur , & *esto robustus* (Josu. j , 6) tam in agendo quam in patiundo naturæ contraria. Oportet te novum induere hominem , & in alterum virum mutari. Oportet te sæpe agere quod non vis , & quod vis oportet relinquere. Quod aliis placet processum habebit , quod tibi placet ultra non proficiet ; quod alii dicunt audietur , quod tu dicis pro nihilo computabitur ; petent alii & accipient , tu petes nec impetrabis.

5. Erunt alii magni in ore hominum , de te autem tacebitur ; aliis hoc vel illud committetur , tu autem ad nihil utilis iudicaberis. Propter hoc natura quandoque contristabitur ; & magnum , si filens portaveris. In his & similibus multis probari solet fidelis Domini servus qualiter se ab-

LIBER III. CAP. xlix. 249

negare & in omnibus frangere quiverit. Vix est aliquid tale in quo tantumdem mori indiges, sicut videre & pati quæ voluntati tuæ adversa sunt; maximè autem quum disconvenientia & quæ minùs utilia tibi apparent fieri jubentur: & quia non audes resistere altiori potestati, sub dominio constitutus; ideo durum tibi videtur ad nutum alterius ambulare, & omne proprium sentire omittere.

6. Sed pensa, Fili, horum fructum laborum, celerem finem, atque præmium nimis magnum; & non habebis inde gravamen, sed fortissimum patientiæ tuæ solamen. Nam & pro modicâ hâc voluntate quam nunc sponte deferis, habebis semper voluntatem tuam in cœlis. Ibi quippe invenies omne quod volueris, omne quod desiderare poteris: ibi aderit tibi totius facultas boni sine timore amittendi: ibi voluntas tua, una semper mecum, nihil cupiet extraneum vel privatum: ibi nullus resistet tibi, nemo de te conqueretur, nemo impediet, nihil obviabit: sed cuncta

250 DE IMIT. CHRISTI.

desiderata simul erunt præsentia , totumque affectum tuum reficient & adimplebunt usque ad summum : ibi reddam gloriam pro contumeliâ perpeffâ , pallium laudis pro mœrore , pro loco novissimo sedem regni in sæcula : ibi apparebit fructus obedientiæ , gaudebit labor poenitentiae , & humilis subiectio coronabitur gloriosè.

7. Nunc ergo inclina te humiliter sub omnium manibus , nec sit tibi curæ quis hoc dixerit vel jusserit ; sed hoc magno-pere curato. ut , sive prælatus , sive junior aut æqualis , aliquid à te exposcerit vel iannuerit , pro bono totum accipias & sincerâ voluntate studeas adimplere. Quæret alius hoc , alius illud ; gloriatur ille in illo , & iste in isto , laudeturque millies & millies : tu autem nec in isto nec in illo , sed in tui ipsius gaude contemptu , & in mei solius beneplacito ac honore. Hoc optandum est tibi , ut , *sive per vitam , sive per mortem* (Philipp. j , 20) , Deus semper in te glorificetur.



CAPUT I.

*Qualiter homo desolatus se debet
in manus Dei offerre.*

1. AN. FID. **D**OMINE Deus, sancte Pater, sis nunc & in æternum benedictus: quia sicut vis sic factum est, & quod facis bonum est. Lætetur in te servus tuus, non in se, nec in aliquo alio; quia tu solus lætitia vera, tu spes mea & corona mea, tu gaudium meum & honor meus, Domine. Quid habet servus tuus, nisi quod à te accepit etiam sine merito suo? Tua sunt omnia quæ dedisti & quæ fecisti. *Pauper sum ego, & in laboribus à juventute mea* (Pl. lxxxvij, 16); & contristatur anima mea nonnunquam usque ad lacrymas, quandoque etiam conturbatur ad se propter imminentes passiones.

2. Desidero pacis gaudium; pacem filiorum tuorum flagito, qui in lumine consolationis à te pascuntur. Si das pacem;

252 DE IMIT. CHRISTI.

si gaudium sanctum infundis ; erit anima servi tui plena modulatione & devota in laude tuâ : sed si te subtraxeris , sicut sæpissime soles , non poterit currere viam mandatorum tuorum , sed magis ad tundendum pectus genua ejus incurvantur ; quia non est illi sicut heri & nudius tertius , *quando splendebat lucerna tua super caput ejus* (Job. xxix , 3) , & *sub umbrâ alarum tuarum protegebatur* (Ps. xvj , 8) à tentationibus irruentibus.

3. Pater juste & semper laudande , venit hora ut probetur servus tuus. Pater amande , dignum est ut hac horâ patiatur pro te aliquid servus tuus. Pater perpetuè venerande , venit hora quam ab æterno præsciebas affuturam , ut ad modicum tempus succumbat foris servus tuus , vivat vero semper apud te intus ; paululum vilipendatur , humilietur , & deficiat coram hominibus , passionibus conteratur & languoribus , ut iterum tecum in aurorâ novæ lucis resurgat & in coelestibus clarificetur. Pater sancte , tu sic ordinasti & sic voluisti ,

LIBER III. CAP. I. 253

& hoc factum est quod ipse præcepisti.

4. Hæc est enim gratia ad amicum tuum , pati & tribulari in mundo pro amore tuo , quotiescumque & à quocumque id permiseris fieri. Sine consilio & providentiâ tuâ , & sine causâ , nihil fit in terrâ. *Bonum mihi , Domine , quia humiliasti me , ut discam justificationes tuas* (Ps. cxviii , 71) , & omnes elationes cordis atque præsumptiones abjiciam. Utile mihi quod *operuit confusio faciem meam* (Ps. lxxviii , 8) ut te potiùs quam homines ad consolandum requiram. Didici etiam ex hoc inscrutabile judicium tuum expavescere , qui affligis justum cum impio , sed non sine æquitate & justitiâ.

5. Gratias tibi ago , quia non pepercisti malis meis , sed attrivisti me verberibus amaris , infligens dolores & immitrens angustias foris & intus. Non est qui me consoletur ex omnibus qui sub cœlo sunt , nisi tu , Domine , Deus meus , cœlestis medicus animarum , qui percutis & sanas , *deducis ad inferos & reducis* (Tob.

254 *DE IMIT. CHRISTI.*

xiiij, 2). Disciplina tua super me, & virga tua ipsa me docebit.

6. Ecce, Pater dilecte, in manibus tuis sum ego, sub virgâ correctionis tuæ me inclino. Percute dorsum meum & collum meum, ut incurvem ad voluntatem tuam tortuositatem meam. Fac me pium & humilem discipulum, sicut bene facere consuevisti, ut ambulem ad omnem nutum tuum. Tibi me & omnia mea ad corrigendum commendo; melius est hîc corripi quam in futuro. Tu scis omnia & singula, & nil te latet in humanâ conscientîâ. Antequam fiant nosti ventura, & non opus est tibi ut quis te doceat aut admoneat de his quæ geruntur in terrâ. Tu scis quid expedit ad profectum meum, & quantum deseruit tribulatio ad rubiginem vitiorum purgandam. Fac mecum desideratum beneplacitum tuum; & ne despicias peccaminosam vitam meam, nulli melius nec clarius quam tibi soli notam.

7. Da mihi, Domine, scire quod sciendum est, hoc amare quod amandum est,

LIBER III. CAP. I. 255

hoc laudare quod tibi summè placet, hoc reputare quod tibi pretiosum apparet, hoc vituperare quod oculis tuis fordescit. Non me finas secundum visionem oculorum exteriorum judicare, neque secundum auditum aurium hominum imperitorum sententiarum; sed in judicio vero de visibilibus & spiritualibus discernere, atque super omnia voluntatem beneplaciti tui semper inquirere.

8. Falluntur sæpe hominum sensus in judicando, falluntur & amatores sæculi visibilia tantummodo amando. Quid est homo inde melior, quia reputatur ab homine major? Fallax fallacem, vanus vanum, cæcus cæcum, infirmus infirmum decipit, dum exultat; & veraciter magis confundit, dum inaniter laudat: nam quantum unusquisque est in oculis tuis, tantum est & non amplius, ait humilis sanctus Franciscus.





CAPUT LI.

Quod humilibus insistendum est operibus, quum deficitur à summis.

I. CHR. **F**ILI, non vales semper in ferventiori desiderio virtutum stare, nec in altiori gradu contemplationis consistere: sed necesse habes interdum, ob originalem corruptelam, ad inferiora descendere; & onus corruptibilis vitæ, etiam invitè & cum tædio, portare. Quam diu mortale corpus geris, tædium senties & gravamen cordis. Oportet ergo sæpe in carne de carnis onere gemere, eo quod non vales spiritualibus studiis & divinæ contemplationi indefinenter inhærere.

2. Tunc expedit tibi ad humilia & exteriora opera confugere, & in bonis actibus te recreare; adventum meum & supernam visitationem firmâ confidentiâ expectare; exilium tuum & ariditatem mentis patienter sufferre, donec iterum à me

LIBER III. CAP. Ij. 257

visiteris & ab omnibus anxietatibus libereris. Nam faciam te laborum oblivisci & internâ quiete perfrui. Expandam coram te prata Scripturarum ut , dilatato corde , currere incipias viam mandatorum meorum ; & dices , *Non sunt condignæ passionēs hujus temporis ad futuram gloriam quæ revelabitur in nobis* (Rom. viij , 18).

C A P U T LII.

Quod homo non reputet se consolatione dignum , sed magis verberibus reum.

I. AN. FID. **D**OMINE, non sum dignus consolatione tuâ nec aliquâ spirituali vifitatione ; & ideo justè mecum agis , quando me inopem & desolatum relinquis. Si enim ad instar maris lacrymas fundere possem , adhuc consolatione tuâ dignus non essem. Unde nihil dignus sum quam flagellari & puniri , quia graviter & sæpe te offendi & in multis valde deliqui. Ergo , verâ pensatâ ratione , nec minimâ sum di-

258 *DE IMIT. CHRISTI.*

gnus consolatione. Sed tu, clemens & misericors Deus, qui non vis perire opera tua, ad ostendendum divitias bonitatis tuæ in vasa misericordiæ, etiam præter omne proprium meritum, dignaris consolari servum tuum supra humanum modum. Tuæ enim consolationes non sunt sicut humanæ consolationes.

2. Quid egi, Domine, ut mihi conferres aliquam cœlestem consolationem? Ego nihil boni me egisse recolo, sed semper ad vitia pronum & ad emendationem pigrum fuisse: verum est & negare non possum; si aliter dicerem, tu stares contra me, & non esset qui me defenderet. Quid merui pro peccatis meis, nisi infernum & ignem æternum? In veritate confiteor quoniam dignus sum omni ludibrio & contemptu, nec decet me inter tuos devotos commemorari. Et licet hoc ægrè audiam; tamen adversum me pro veritate peccata mea arguam, ut facilius misericordiam tuam merear impetrare.

3. Quid dicam, reus & omni confu-

LIBER III. CAP. liij. 259

sione plenus ? Non habeo os loquendi , nisi hoc tantum verbum : Peccavi , Domine , peccavi ; miserere mei , ignosce mihi ; sine me ut *plangam paululam dolorem meum , ante quam vadam ad terram tenebrosam & opertam mortis caligine* (Job. x , 20 , 21). Quid tam maximè à reo & misero peccatore requiris , nisi ut conteratur & humiliet se pro delictis suis ? In verâ contritione & cordis humiliatione nascitur spes veniæ , reconciliatur perturbata conscientia , reparatur gratia perdita , tuetur homò à futurâ irâ , & occurrunt sibi mutuo in osculo sancto Deus & poenitens anima.

4. Humilis peccatorum contritio acceptabile tibi est , Domine , sacrificium , longè suaviùs odorans in conspectu tuo quam thuris incensum. Hæc est gratum etiam unguentum quod sacris pedibus tuis infundi voluisti , quia *cor contritum & humiliatum numquam despexisti* (Ps. l , 19). Ibi est locus refugii à facie iræ inimici. Ibi emendatur & abluitor quidquid aliunde contractum est & inquinatum.



CAPUT LIIL.

*Quod gratia Dei non miscetur terrena
sapiantibus.*

I. CHR. **F**ILI, pretiosa est gratia mea; non patitur se misceri extraneis rebus nec consolationibus terrenis. Abjicere ergo oportet omnia impedimenta gratiæ, si optas ejus infusionem suscipere. Pete secretum tibi, ama solus habitare tecum, nullius require confabulationem; sed magis ad Deum devotam effunde precem, ut compunctam teneas mentem & puram conscientiam. Totum mundum nihil æstima: Dei vacationem omnibus exterioribus antepone; non enim poteris mihi vacare & in transitoriis pariter delectari. A notis & à caris oportet elongari, & ab omni temporali solatio mentem tenere privatam. Sic obsecrat beatus apostolus Petrus, ut *tanquam advenas & peregrinos* (I. Petr. ij, 11), in hoc mundo se contineant CHRISTI fideles.

LIBER III. CAP. liij. 261

2. O ! quanta fiducia erit morituro , quem nullius rei affectus detinet in mundo ! Sed sic segregatum cor habere ab omnibus æger necdum capit animus , nec animalis homo novit interni hominis libertatem. Attamen si verè velit esse spiritualis , oportet eum renuntiare tam remotis quam propinquis , & à nemine magis cavere quam à se ipso. Si temet ipsum perfectè viceris , cætera facilius subjugabis. Perfecta victoria est de semet ipso triumphare. Qui enim semet ipsum subjectum tenet , ut sensualitas rationi & ratio in cunctis obediat mihi , hic verè victor est sui & dominus mundi.

3. Si ad hunc apicem scandere gliscis , oportet viriliter incipere & securim ad radicem ponere , ut evellas & destruas occultam inordinatam inclinationem ad te ipsum & ad omne privatum & materiale bonum. Ex hoc vitio , quod homo semet ipsum nimis inordinatè diligit , penè totum pendet quidquid radicaliter vincendum est ; quo devicto & subacto malo , pax magna & tranquillitas erit continuo. Sed quia pauci

sibi ipsis perfectè mori laborant nec plene extra se tendunt, propterea in se implicati remanent nec supra se in spiritu elevari possunt. Qui autem liberè mecum ambulare desiderat, necesse est ut omnes pravas & inordinatas affectiones suas mortificet, atque nulli creaturæ privato amore concupiscenter inhæreat.



CAPUT LIV.

De diversis motibus Naturæ & Gratiæ.

I. CHR. **F**ILI, diligenter adverte motus Naturæ & Gratiæ quia valde contrariè & subtiliter moventur; & vix, nisi à spirituali, & intimo, illuminato homine, discernuntur. Omnes quidem bonum appetunt & aliquid boni in suis dictis vel factis prætendunt; ideo sub specie boni multi falluntur.

2. Natura callida est; & multos trahit, illaqueat, & decipit; & se semper pro fine habet: sed Gratia simpliciter ambu-

LIBER III. CAP. liv. 263

lat, & ab omni specie malâ declinat; fallacias non prætendit & omnia purè propter Deum agit, in quo & finaliter requiescit.

3. Natura invitè vult mori, nec premi; nec superari, nec subesse, nec sponte subjugari: Gratia vero studet mortificationi propriæ, resistit sensualitati, quærit subjici, appetit vinci, nec propriâ vult libertate frui; sub disciplinâ amat teneri, nec alicui cupit dominari; sed sub Deo semper vivere, stare, & esse, atque *omni humanæ creaturæ propter Deum* (I. Petr. ij, 13) humiliter parata est inclinari.

4. Natura pro suo commodo laborat; & quid lucri ex alio sibi proveniat attendit: Gratia autem, non quid sibi utile & commodum sit, sed quid multis proficiat, magis considerat.

5. Natura libenter honorem & reverentiam accipit: Gratia vero omnem honorem & gloriam Deo fideliter attribuit.

6. Natura confusionem timet & contemptum: Gratia autem *gaudet pro nomine*

264 DE IMIT. CHRISTI.

JESU contumeliam pati (Aët. v, 41):

7. Natura otium amat & quietem corporalem : Gratia vero vacua esse non potest , sed libenter amplectitur laborem.

8. Natura quærit habere curiosa & pulchra , abhorret vilia & grossa ; Gratia vero simplicibus delectatur & humilibus , aspera non aspernatur , nec vetustis refugit indui pannis.

9. Natura respicit temporalia , gaudet ad lucra terrena , tristatur de damno , irritatur levi injuriæ verbo : sed Gratia attendit æterna , non inhæret temporalibus , nec in perditione rerum turbatur , neque verbis durioribus acerbatur ; quia thesaurum suum & gaudium in coelo , ubi nil perit , constituit.

10. Natura cupida est & libentiùs accipit quam donat , amat propria & privata : Gratia autem pia est & communis , vitat singularia , contentatur paucis , *beatius magis dare judicat quam accipere* (Aët. xx, 35).

11. Natura inclinatur ad creaturas , ad
carnem

LIBER III. CAP. lrv. 265

carnem propriam, ad vanitates & discursus : sed Gratia trahit ad Deum & ad virtutes, renuntiat creaturis, fugit mundum, odit carnis desideria, restringit evagationes, erubescit in publico apparere.

12. Natura libenter aliquod solatium habet externum, in quo delectetur ad sensum : sed Gratia in solo Deo quærit consolari, & in summo bono super omnia visibilia delectari.

13. Natura totum agit propter lucrum & commodum proprium, nihil gratis facere potest ; sed aut æquale, aut melius ; aut laudem, vel favorem pro beneficiis consequi sperat ; & multum ponderari sua gesta & dona concupiscit : Gratia vero nihil temporale quærit ; nec aliud præmium quam Deum : solum pro mercede postulat ; nec amplius de temporalibus necessariis desiderat, nisi quantum hæc sibi ad assequutionem æternorum valeant deservire.

14. Natura gaudet de amicis multis & propinquis, gloriatur de nobili loco & ortu generis, arridet Potentibus, blanditur Di-

vitibus, applaudit sibi similibus: Gratia autem & inimicos diligit, nec de amicorum turbâ extollitur; nec locum nec ortum natalium reputat, nisi virtus major ibi fuerit; favet magis Pauperi quam Diviti, compatitur plus innocenti quam potenti; congaudet veraci, non fallaci; exhortatur semper bonos *amulari charismata meliora* (I. Cor. xij, 31), & Filio Dei per virtutes assimilari.

15. Natura de defectu & molestiâ cito conqueritur: Gratia constanter fert inopiam.

16. Natura omnia ad se reflectit, pro se certat & arguit: Gratia autem ad Deum cuncta reducit, unde originaliter emanant: nihil boni sibi adscribit, nec arroganter præsumit; non contendit nec suam sententiam aliis præfert, sed in omni sensu & intellectu æternæ sapientiæ ac divino examini se submittit.

17. Natura appetit scire secreta & nova audire, vult externus apparere & multa per sensus experiri, desiderat agnosci & agere

LIBER III. CAP. liv. 267

unde laus & admiratio procedit : sed Gratia non curat nova nec curiosa percipere ; quia totum hoc de vetustate corruptionis est ortum , quum nihil novum & durable sit super terram ; docet itaque sensus restringere , vanam complacentiam & ostentationem devitare , laudanda & dignè miranda humiliter abscondere , & de omni re & in omni scientiâ utilitatis fructum atque Dei laudem & honorem quærere ; non vult se nec sua prædicari , sed Deum in donis suis optat benedici , qui cuncta ex merâ caritate largitur.

18. Hæc Gratia supernaturale lumen & quoddam Dei speciale donum est , & propriè electorum signaculum & pignus salutis æternæ , quæ hominem de terrenis ad cœlestia amanda sustollit , & de carnali spirituales efficit. Quanto igitur Natura amplius premitur & vincitur , tanto major Gratia infunditur ; & quotidie novis visitationibus interior homo secundum imaginem Dei reformatur.



CAPUT LV.

*De corruptione Naturæ , & efficaciâ
Gratiæ divinæ.*

I. AN. FID. **D**OMINE , Deus meus ;
qui me creasti ad imaginem & similitudi-
nem tuam , concede mihi hanc Gratiâ
quam ostendisti mihi tam magnam & ne-
cessariam ad salutem , ut vincam pessimam
Naturam meam trahentem ad peccata &
in perditionem. Sentio enim in carne meâ
legem peccati repugnantem legi mentis meæ
(Rom. vij , 23) , & captivum me ducentem
ad obediendum sensualitati in multis ; nec
possum resistere passionibus ejus , nisi assis-
tat tua sanctissima Gratia cordi meo arden-
ter infusa.

2. Opus est Gratiâ tuâ , & magnâ Gra-
tiâ , ut vincatur Natura , *in malum* semper
prona ab adolescentiâ suâ (Gen. viij , 21) ;
nam , per primum hominem Adam lapsâ
& vitiatâ per peccatum , in omnes homin-

LIBER III. CAP. IV. 269

nes poena hujus maculæ descendit ; ut ipsa Natura , quæ bona & recta à te condita fuit , pro vitio jam & infirmitate corruptæ Naturæ ponatur , eo quod motus ejus sibi relictus ad malum & inferiora trahit. Nam modica vis quæ remansit est tanquam scintilla quædam latens in cinere. Hæc est ipsa ratio naturalis , circumfusa magnâ caligine , adhuc judicium habens boni & mali , veri falsique distantiam ; licet impotens sit adimplere omne quod approbat , nec pleno jam lumine veritatis nec sanitate affectionum suarum potiatut.

3. Hinc est , Deus meus , quod *condelector legi tuæ secundum interiorem hominem* (Rom. vij, 21) ; sciens mandatum tuum fore bonum , justum , & sanctum , arguens etiam omne malum & peccatum fugiendum : *carne autem servo legi peccati* (Ib. 25) , dum magis sensualitati obediō quam rationi ; quod *velle adjacet mihi , perficere autem bonum non invenio* (Ib. 18) . Hinc sæpe multa bona propono ; sed , quia Gratia deest ad adjuvandum infirmitatem meam , ex levi

270 DE IMIT. CHRISTI.

resistentiâ refilio & deficio : hinc accidit quod viam perfectionis agnosco , & qualiter agere debeam satis clarè video ; sed propriæ corruptionis pondere pressus , ad perfectiora non assurgo.

4. O ! quam maximè est mihi necessaria ; Domine , Gratia tua , ad inchoandum bonum , ad proficiendum , & ad perficiendum ! nam sine eâ nihil possum facere ; omnia autem possum in te , confortante me Gratiâ. O verè coelestis Gratia , sine quâ nulla sunt propria merita , nulla quoque dona Naturæ ponderanda ! Nihil artes , nihil divitiæ , nihil pulchritudo vel fortitudo , nihil ingenium vel eloquentia , valent apud te , Domine , sine Gratiâ. Nam dona Naturæ Bonis & Malis sunt communia ; Electorum autem proprium donum est Gratia sive dilectio , quâ insigniti digni habentur vitâ æternâ. Tantum eminet hæc Gratia , ut nec donum prophetiæ , nec signorum operatio , nec quantalibet alta speculatio , aliquid æstimentur sine eâ : sed neque fides , neque spes , neque aliæ virtutes , tibi acceptæ sunt sine caritate & Gratiâ.

LIBER III. CAP. IV. 271

5. O beatissima Gratia, quæ pauperem spiritu virtutibus divitem facis, & divitem multis bonis humilem corde reddis ! veni, descende ad me ; reple me mane consolatione tuâ, ne deficiat præ lassitudine & ariditate mentis anima mea. Obsecro, Domine, ut inveniam Gratiam in oculis tuis ; sufficit enim mihi Gratia tua, cæteris non obtentis quæ desiderat Natura. Si fuero tentatus & vexatus tribulationibus multis, non timebo mala, dum mecum fuerit Gratia tua. Ipsa fortitudo mea, ipsa consilium confert & auxilium ; cunctis hostibus potentior est, & sapientior universis Sapientibus.

6. Magistra est veritatis, doctrix disciplinæ, lumen cordis, solamen pressuræ, fugatrix tristitiæ, ablatrix timoris, nutrix devotionis, productrix lacrymarum. Quid sum sine eâ, nisi aridum lignum & stipes inutilis ad ejiciendum ? *Tua ergo me, Domine, Gratia semper præveniat & sequatur, ac bonis operibus jugiter præstet esse intentum, per Jesum Christum Filium tuum. Amen. (Orat. Dom. xvi. post. Pentecost.)* !



CAPUT LVI.

*Quod nos ipsos abnegare & CHRISTUM
imitari debemus per crucem.*

I. CHR. **F**ILI, quantum à te vales exire, tantum in me poteris transire. Sicut nihil foris concupiscere, internam pacem facit; sic se interius relinquere, Deo conjungit. Volo te addiscere perfectam abnegationem tui in voluntate meâ sine contradictione & querelâ. *Sequere me* (Matth. ix, 9), *ego sum via, & veritas, & vita* (Joan. xiv, 6). Sine viâ non itur; sine veritate non cognoscitur; sine vitâ non vivitur. Ego sum via quam sequi debes, veritas cui credere debes, vita quam sperare debes. Ego sum via inviolabilis, veritas infallibilis, vita interminabilis. Ego sum via rectissima, veritas suprema, vita vera, vita beata, vita increata. Si manseris in viâ meâ, *cognosces veritatem, & veritas liberabit te* (Joan. viij, 32), & apprehendes vitam æternam.

LIBER III. CAP. lvj. 273

2. *Si vis ad vitam ingredi, serva mandata* (Matth. xix, 17). Si vis veritatem cognoscere, crede mihi. Si vis perfectus esse, vende omnia. Si vis esse discipulus meus, abnega te ipsum. Si vis beatam vitam possidere, præsentem vitam contemne. Si vis exaltari in cœlo, humilia te in mundo. Si vis regnare mecum, porta crucem mecum; soli enim servi crucis inveniunt viam beatitudinis & veræ lucis.

3. AN. FID. Domine JESU, quia arcta est via tua & mundo despecta, dona mihi te cum mundi despectu imitari; non enim est discipulus super magistrum, nec servus super dominum suum (Matth. x, 24). Exerceatur servus tuus in vitâ tuâ, quia ibi est salus mea & sanctitas vera. Quidquid extra eam lego vel audio, non me recreat nec delectat plenè.

4. CHR. Fili, quia hæc scis & legisti omnia; beatus eris, si feceris ea (Joan. xiiij, 17). Qui habet mandata mea & servat ea, ille est qui diligit me; & ego diligam eum & manifestabo ei me ipsum (Ib. xiv,

M v

274 *DE IMIT. CHRISTI.*

21), & faciam eum confedere mecum in regno Patris mei.

5. AN. FID. Domine JESU, sicut dixisti & promifisti, sic utique fiat & mihi promereri contingat ! Suscepi, suscepi de manu tuâ crucem ; portabo, & portabo eam usque ad mortem, sicut imposuisti mihi. Verè vita boni monachi crux est, sed dux paradisi. Inceptum est ; retro abire non licet, nec relinquere oportet.

6. Eia, fratres, pergamus simul ; JESUS erit nobiscum. Propter JESUM suscepimus hanc crucem, propter JESUM perseveremus in cruce. Erit adjutor noster, qui est dux noster & præcessor. En rex noster ingreditur ante nos, qui pugnabit pro nobis. Sequamur viriliter, nemo metuat terrores : simus parati mori fortiter in bello ; nec inferamus crimen gloriæ nostræ, ut fugiamus à cruce.





CAPUT LVII.

*Quod homo non sit nimis dejectus ,
quando in aliquos labitur defectus.*

I. CHR. **F**ILI, magis placent mihi patientia & humilitas in adversis, quam multa consolatio & devotio in prosperis. Ut quid te contristat parvum factum contra te dictum? Si amplius fuisset, commoveri non debuisses: sed nunc permitte transire; non est primum, nec novum, nec ultimum erit, si diu vixeris. Satis virilis es quamdiu nihil obviat adversi. Bene etiam consulas, & alios nostri roborare verbis; sed quum ad januam tuam venit repentina tribulatio, deficiis consilio & robore. Attende magnam fragilitatem tuam, quam sæpius experiris in modicis objectis: tamen pro salute tua ista sunt, quum hæc & similia contingunt.

2. Pone, ut melius nosti, ex corde: & si te tetigit, non tamen deiciat, nec diu

276 .DE IMIT. CHRISTI.

implicet. Ad minus sustine patienter, si non potes gaudenter. Etiam si minus libenter audis & indignationem sentis, reprime te, nec patiaris aliquid inordinatum ex ore tuo exire unde parvuli scandalisentur. Cito conquiescet commotio excitata, & dolor internus revertente dulcorabitur gratiâ. Adhuc vivo ego, dicit Dominus (Jerem. xxij, 24), juvare te paratus & solito amplius consolari, si confusus fueris mihi & devotè invocaveris.

3. Animæquior esto, & ad majorem sustententiam accingere. Non est totum frustratum, si te sæpius percipis tribulatum vel graviter tentatum. Homo es, & non Deus; caro es, non angelus. Quomodo tu posses semper in eodem statu virtutis permanere, quando hoc defuit angelo in cœlo & prius homini in paradiso? Ego sum, qui moerentes erigo sospitate, & suam cognoscentes infirmitatem ad meam proveho divinitatem.

4. AN. FID. Domine, benedictum sit verbum tuum, dulce super mel & favum ori meo (Pf. cxviii, 103). Quid facerem in

LIBER III. CAP. Iviij. 277

tantis tribulationibus & angustis meis, nisi me confortares tuis sanctis sermonibus ? Dummodo tandem ad portum salutis perveniam, quid curæ est quæ & quanta passus fuero ? Da finem bonum, da felicem ex hoc mundo transitum. Memento mei, Deus meus ; & dirige me recto itinere in regnum tuum. Amen !



C A P U T L V I I I.

*De altioribus rebus & occultis judiciis
Dei non scrutandis.*

I. CHR. **F**ILI, caveas disputare de altis materiis & de occultis Dei judiciis ; cæcæ iste fides relinquitur, & ille ad tantam gratiam assumitur ; cur etiam iste tantum affligitur, & ille tam eximie exaltatur ? Ista omnem humanam facultatem excedunt, nec ad investigandum judicium divinum ulla ratio prævalet vel disputatio. Quando ergo hæc tibi suggerit inimicus vel etiam quidam curiosi inquirent homines, respon-

278 DE IMIT. CHRISTI.

de illud Prophetæ ; *Iustus es , Domine , & rectum iudicium tuum* (Ps. cxviii , 137) , & illud ; *Judicia Domini vera iustificata in semet ipsa* (Ps. xviii , 10). *Judicia mea metuenda sunt , non discutienda ; quia humano intellectui sunt incomprehensibilia.*

2. Noli etiam inquirere nec disputare de meritis Sanctorum ; quis alio sit sanctior , aut quis major fuerit in regno cœlorum. Talia generant sæpe lites & contentiones inutiles , nutriunt quoque superbiam & vanam gloriam ; unde oriuntur invidiæ & diffensiones , dum iste illum Sanctum & alius alium conatur superbè præferre. Talia autem velle scire & investigare nullum fructum afferunt , sed magis Sanctis displicent : quia *non sum diffensionis Deus , sed pacis* (I. Cor. xiv , 33) , quæ pax magis in humilitate verâ quam in propriâ exaltatione consistit.

3. Quidam zelo dilectionis trahuntur ad hos vel ad illos ampliori affectu , sed humano potius quam divino. Ego sum qui cunctos condidi Sanctos ; ego donavi gra-

LIBER III. CAP. lviii. 279

tiam , ego præstiti gloriam , ego novi singulorum merita , ego *præveni eos in benedictionibus dulcedinis* (Pf. xx , 4) meæ. Ego præscivi dilectos ante sæcula ; ego eos elegi de mundo , non ipsi me præelegerunt. Ego vocavi per gratiam , attraxi per misericordiam ; ego perduxì eos per tentationes varias. Ego infudi consolationes magnificas , ego dedi perseverantiam , ego coronavi eorum patientiam.

4. Ego primum & novissimum agnosco , ego omnes inæstimabili dilectione amplexor. Ego laudandus sum in omnibus Sanctis meis ; ego semper super omnia benedicendus sum & honorandus in singulis , quos sic gloriosè magnificavi & prædestinavi sine ullis præcedentibus propriis meritis. Qui ergo unum de minimis meis contempserit , nec magnum honorat ; quia pusillum & magnum ego feci : & qui derogat alicui Sanctorum , derogat & mihi & cæteris omnibus in regno cœlorum. Omnes unum sunt per caritatis vinculum ; idem sentiunt , idem volunt , & omnes in unum se diligunt.

5. Adhuc autem , quod multo altius est , plus me quam se & sua merita diligunt ; nam supra se rapti & extra propriam dilectionem tracti , toti in amorem mei pergunt , in quo & frutivè quiescunt : nihil est quod eos avertere possit aut deprimere ; quippe qui , æternâ veritate pleni , igne ardescunt inextinguibilis caritatis. Taceant igitur carnales & animales homines de Sanctorum statu differere , qui non nōrunt nisi privata gaudia diligere. Demunt & addunt pro suâ inclinatione , non prout placet æternæ veritati.

6. In multis est ignorantia , eorum maxime qui , parum illuminati , raro aliquem perfectâ dilectione spiritali diligere nōrunt. Multum adhuc naturali affectu & humanâ amicitia ad hos vel ad illos trahuntur ; & sicut in inferioribus se habent , ita & de coelestibus imaginantur. Sed est distantia incomparabilis , quæ imperfecti cogitant & quæ illuminati viri per revelationem supernam speculantur.

7. Cave ergo , Fili , de istis curiosè

LIBER III. CAP. lviiij. 281

tractare quæ tuam scientiam excedunt ; sed hoc magis satage & intende ut vel minimus in regno Dei queas inveniri. Et si quispiam sciret, quis alio sanctior esset vel major haberetur in regno cœlorum ; quid ei hæc notitia prodesset, nisi se ex hac cogitatione coram me humiliaret & in maiorem nominis mei laudem exurgeret ? Multo acceptius Deo facit, qui de peccatorum suorum magnitudine & virtutum suarum parvitate cogitat & quam longè à perfectione Sanctorum distat, quam is qui de eorum majoritate vel parvitate disputat. Melius est Sanctos devotis precibus & lacrymis exorare, & eorum gloriosa suffragia humili mente implorare, quam eorum secreta vanâ inquisitione perscrutari.

8. Illi bene & optimè contentantur ; si homines scirent contentari & vaniloquia sua compescere. Non gloriantur de propriis meritis ; quippe qui sibi nihil bonitatis adscribunt ; sed totum mihi, quoniam ipsis cuncta ex infinitâ caritate meâ donavi. Tanto amore divinitatis & gaudio super-

effluenti replentur, ut nihil eis desit gloria nihilque possit deesse felicitatis. Omnes Sancti, quanto altiores in gloria, tanto humiliores in se ipsis & mihi viciniore & dilectiores existunt. Ideoque habes scriptum, quia *mittebant coronas suas ante Deum* (Apoc. iv, 10); & *cecidere in facies suas coram Agno, & adoraverunt viventem in sæcula sæculorum* (Ib. v, 14).

9. Multi quærent quis major sit in regno Dei, qui ignorant an cum minimis erunt digni computari. Magnum est vel minimum esse in cœlo, ubi omnes magni sunt; quia omnes Filii Dei vocabuntur & erunt. *Minimus erit in mille* (Is. lx, 22), & *peccator centum annorum* (Ib. lxxv, 20) morietur. Quum enim quærerent discipuli, quis major esset in regno cœlorum, tale audierunt responsum: *Nisi conversi fueritis & efficiamini sicut parvuli, non intrabitis in regnum cœlorum. Quicumque ergo humiliaverit se sicut parvulus iste, hic est major in regno cœlorum* (Matth. xviii, 3 & 4).

10. Væ eis qui cum parvulis humiliare

LIBER III. CAP. lviii. 283

se sponte dedignantur , quoniam humilis janua regni cælestis eos non admittet intrare ! Væ etiam divitibus qui habent hîc consolationes suas ; quia , pauperibus intrantibus in regnum Dei , ipsi stabunt foris ejulantes ! Gaudete , Humiles ; & exsultate , *Pauperes* ; quia *vestrum est regnum Dei* (Luc. *vj* , 20) , si tamen in veritate ambulatis.



C A P U T L I X.

Quod omnis spes & fiducia in solo Deo est figendâ.

I. AN. FID. **D**OMINE , quæ est fiducia mea quam in hâc vitâ habeo ? aut quod majus solatium meum ex omnibus apparentibus sub cœlo ? Nonne tu , Domine , Deus meus , cujus misericordiæ non est numerus ? Ubi mihi bene fuit sine te ? aut quando malè esse potuit præsentem te ? Malò pauper esse propter te , quam dives sine te ; eligo potius tecum in terrâ peregrina-

284 DE IMIT. CHRISTI.

ri, quam sine te cœlum possidere. Ubi tu; ibi cœlum; atque ibi mors & infernus, ubi tu non es. Tu mihi in desiderio es; & ideo post te gemere, & clamare, & exorare necesse est. In nullo denique possum plenè confidere qui in necessitatibus auxilietur opportuniùs, nisi in te solo Deo meo. Tu es spes mea, tu fiducia mea, tu consolator meus, & fidelissimus in omnibus.

2. *Omnes quæ sua sunt quærunt* (Philip. ij, 21); tu salutem meam & profectum meum solummodo præendis, & omnia in bonum mihi convertis. Etiam si variis tentationibus & adversitatibus exponas, hoc totum ad utilitatem meam ordinas, qui mille modis dilectos tuos probare consuevisti: in quâ probatione non minùs diligere debes & laudari, quam si cœlestibus consolationibus me repleres.

3. In te ergo, Domine Deus, pono totam spem meam & refugium: in te omnem tribulationem & angustiam meam constituo; quia totum infirmum & instabile in-

LIBER. III. CAP. lix. 285

venio quidquid extra te conspicio. Non enim proderunt multi amici ; neque fortes auxiliarii adjuvare poterunt ; nec prudentes consiliarii , responsum utile dare ; neque libri doctorum , consolari ; nec aliqua pretiosa substantia , liberare ; nec locus aliquis secretus & amœnus , contutari ; si tu ipse non assistas , juves , confortes , consoleris , instruas , & custodias.


4. Omnia namque quæ ad pacem videntur esse & felicitatem habendam , te absente nihil sunt nihilque felicitatis in veritate conferunt. Finis ergo omnium bonorum , altitudo vitæ , & profunditas eloquiorum tu es ; & in te super omnia sperare , fortissimum solatium fervorum tuorum. Ad te sunt oculi mei ; in te confido , Deus meus , misericordiarum Pater. Benedic & sanctifica animam meam benedictione cœlesti ; ut fiat habitatio sancta tua & sedes æternæ gloriæ tuæ , nihilque in templo tuæ dignitatis inveniatur quod oculos tuæ majestatis offendat ! Secundum magnitudinem bonitatis tuæ & multitudinem miserationum

286 DE IMIT. CHRISTI.

tuarum respice in me ; & exaudi orationem pauperis servi tui , longè exfulantis in regione umbræ mortis. Protege & conserva animam servuli tui inter tot discrimina vitæ corruptibilis ; ac , comitante gratiâ tuâ , dirige per viam pacis ad patriam perpetuæ claritatis. Amen.

Explicit Liber de internâ consolatione.







Marillet del.

De Lauguesc. fecit.

La Manne Figure de l'Eucharistie.



DE
IMITATIONE
CHRISTI.

LIBER QUARTUS.

De Sacramento.

Devota exhortatio ad sacram Communionem.

CHRISTUS. *VENITE ad me, omnes qui laboratis & onerati estis; & ego reficiam vos (Matth. xj, 28). Panis quem ego dabo, caro mea est pro mundi vitâ (Joan. vj, 52). Accipite & manducate; hoc est corpus meum, quod pro vobis tradetur: hoc facite in meam commemorationem (I. Cor. xj, 24). Qui manducat meam carnem & bibit meum sanguinem, in me manet, & ego in illo (Joan. vj, 57). Verba quæ ego loquutus sum vobis; spiritus & vita sunt (Ib. 64).*



CAPUT I.

*Cum quantâ reverentiâ CHRISTUS
sit suscipiendus.*

1. AN. FID. **H**ÆC sunt verba tua Christe, Veritas æterna ; quamvis non uno tempore prolata , nec uno in loco scripta. Quia ergo tua sunt & vera , gratanter mihi & fideliter cuncta sunt accipienda. Tua sunt, & tu ea protulisti ; & mea quoque sunt , quia pro salute meâ ea edidisti. Libenter suscipio ea ex ore tuo , ut arctius inferantur cordi meo. Excitant me verba tantæ pietatis , plena dulcedinis & dilectionis ; sed terrent me delicta propria , & ad capienda tanta mysteria me reverberat impura conscientia. Provocat me dulcedo verborum tuorum , sed onerat multitudo vitiorum.

2. Jubes ut fiducialiter ad te accedam ; si tecum velim habere partem ; & ut immortalitatis accipiam alimoniam , si æternam cupiam .obtinere vitam & gloriam.
Venite ;

LIBER IV. CAP. j. 289

Venite, inquis, *ad me*, omnes qui laboratis & onerati estis; & ego reficiam vos. O dulce & amicabile verbum in aure peccatoris; quod tu, Domine, Deus meus, egenum & pauperem invitas ad communionem tui sanctissimi corporis! Sed quis ego sum, Domine, ut ad te præsumam accedere? Ecce cæli (cælorum te capere non possunt (III. Reg. viij, 27); & tu dicis, *Venite ad me*, omnes.

3. Quid sibi vult ista piissima dignatio & tam amicabile invitatio? Quomodo ausus ero venire, qui nihil boni mihi conficius sum, unde possim præsumere? Quomodo te introducā in domum meam, qui sæpius offendi benignissimam faciem tuam? Reverentur angeli & archangeli; metunt Sancti & Iusti; & tu dicis, *Venite ad me*, omnes! Nisi tu, Domine, hoc diceres, quis verum esse crederet? & nisi tu juberes, quis accedere attentaret?

4. Ecce Noë, vir justus, in arcæ fabrica centum annis laboravit ut cum paucis salvaretur; & ego quomodo me potero

unâ horâ præparare ut mundi fabricatorem cum reverentiâ sumam ? Moyses , famulus tuus magnus & specialis amicus tuus , arcam ex lignis imputribilibus fecit , quam & mundissimo vestivit auro , ut tabulas legis in eâ reponeret ; & ego , putrida creatura , audebo te , conditorem legis ac vitæ datorem , tam faciliè suscipere ! Salomon , sapientissimus regum Israël , templum magnificum septem annis in laudem nominis tui ædificavit , & octo diebus festum dedicationis ejus celebravit ; mille hostias pacificas obtulit ; & arcam foederis , in clangore buccinæ & jubilo , in locum sibi præparatum solenniter collocavit : & ego , infelix & pauperrimus hominum , quomodo te in domum meam introducarn , qui vix mediam expendere devotè novi horam ? & utinam vel semel dignè ferè mediam !

5. O ! mi Deus ! quantum illi ad placendum tibi agere studuerunt ! Heu ! quam pusillum est quod ago ! quam breve expleo tempus , quum me ad communicandum dispono , raro totus collectus , rarissimè ab

LIBER IV. CAP. j. 291

omni distractione purgatus ! Et certè , in tuâ salutarî Deitatis præsentia , nulla deberet occurrere indecens cogitatio , nulla etiam occupare creatura ; quia , non angelum , sed angelorum dominum suscepturus sum hospitio.

6. Est tamen valde magna distantia , inter arcam fœderis cum suis reliquiis , & mundissimum corpus tuum cum suis inefabilibus virtutibus ; inter legalia illa sacrificia futurorum præfigurativa , & veram tui corporis hostiam , omnium antiquorum sacrificiorum completivam.

7. Quare igitur non magis ad tuam venerabilem inardesco præsentiam ? Cur non majori me præparo sollicitudine ad tua sancta sumenda ; quando illi antiqui Sancti , patriarchæ & prophetæ , reges quoque & principes , cum universo populo , tantum devotionis demonstrârunt affectum erga cultum divinum ?

8. Saltavit devotissimus rex David coram arcâ Dei totis viribus , recolens beneficia olim indulta patribus ; fecit diversi

291 *DE IMIT. CHRISTI.*

generis organa , psalmos edidit & cantari instituit cum lætitiâ ; cecinit & ipse frequenter in citharâ , Spiritûs sancti afflatus gratiâ ; docuit populum Israël toto corde Deum laudare , & ore consono diebus singulis benedicere & prædicare. Si tanta agebatur tunc devotio ac divinæ laudis existit recordatio coram arcâ testamenti , quanta nunc mihi & omni populo christiano habenda est reverentia & devotio , in præsentia Sacramenti , in sumptione excellentissimi corporis CHRISTI !

9. Currunt multi ad diversa loca pro visitandis reliquiis Sanctorum , & mirantur auditis gestis eorum ; ampla ædificia templorum inspiciunt , & osculantur sericis & auro involuta sacra ossa ipsorum ; & ecce , tu præsens es hîc apud me in altari , Deus meus , Sanctus Sanctorum , Creator hominum , & Dominus angelorum. Sæpe in talibus videndis curiositas est hominum & novitas invisorum ; & modicus reportatur emendationis fructus , maximè ubi est tam levis sine verâ contritione discursus. Hîc

LIBER IV. CAP. 7. 293

autem in Sacramento altaris totus præsens es, Deus meus, homo CHRISTUS JESUS; ubi & copiosus percipitur æternæ salutis fructus, quotiescumque fueris dignè ac devotè susceptus. Ad istud vero non trahit levitas aliqua, nec curiositas aut sensualitas; sed firma fides, devota spes, & sincera caritas.

10. O invisibilis Conditor mundi, Deus! quam mirabiliter agis nobiscum! quam suaviter & gratiosè cum electis tuis disponis, quibus temet ipsum in Sacramento sumentum proponis! Hoc namque omnem intellectum superat; hoc specialiter devotorum corda trahit & accendit affectum: ipsi enim veri fideles tui, qui totam vitam suam ad emendationem disponunt, ex hoc dignissimo Sacramento magnam devotionis gratiam & virtutis amorem frequenter recipiunt.

11. O admirabilis & abscondita gratia Sacramenti, quam nòrunt tantum CHRISTI fideles, infideles autem & peccatis fervientes experiri non possunt! In hoc Sacra-

294 *DE IMIT. CHRISTI.*

mento confertur spiritualis gratia, & reparatur in animâ virtus amissa, & per peccatum deformata redit pulchritudo. Tanta est aliquando hæc gratia, ut ex plenitudine collatæ devotionis, non tantum mens, sed & debile corpus vires sibi præstiterit sentiat ampliores.

12. Dolendum tamen valdè & miserandum super tepiditate & negligentia nostrâ, quod non majori affectione trahimur ad CHRISTUM sumendum, in quo tota spes salvandorum consistit & meritum; ipse enim est sanctificatio nostra & redemptio: ipse consolatio viatorum & Sanctorum æterna fruitio. Dolendum itaque valdè, quod multi tam parum hoc salutare mysterium advertunt, quod Cælum lætificat & mundum conservat universum. Heu! cæcitas & duritia cordis humani, tam ineffabile donum non magis attendere, & ex quotidiano usu etiam ad inadvertentiam defluere.

13. Si enim hoc sanctissimum Sacramentum in uno tantum loco celebraretur, &

LIBER IV. CAP. j. 293

ab uno tantum consecraretur sacerdote in mundo ; quanto putas desiderio ad illum locum & ad talem Dei sacerdotem homines afficerentur , ut divina mysteria celebrari viderent ? Nunc autem multi facti sunt sacerdotes , & in multis locis offertur **CHRISTUS** ; ut tanto major appareat gratia & dilectio Dei ad hominem , quanto latius est sacra communio diffusa per orbem. Gratias tibi , **JESU** bone , Pastor æterne , qui nos pauperes & exules dignatus es pretioso corpore & sanguine tuo reficere , & ad hæc mysteria percipienda , etiam proprii oris tui alloquio , invitare dicendo , *Venite ad me , omnes qui laboratis & onerati estis ; & ego reficiam vos.*





CAPUT II.

*Quod magna bonitas & caritas Dei
in Sacramento homini exhibetur.*

I. AN. FID. SUPER bonitate tuâ & magnâ misericordiâ tuâ, Domine, confisus, accedo æger ad Salvatorem, esuriens & sitiens ad fontem vitæ, egenus ad regem cœli, servus ad Dominum, creatura ad Creatorem, desolatus ad meum pium consolatorem. Sed unde hoc mihi ut venias ad me? Quis ego sum ut præstes mihi te ipsum? Quomodo audet peccator coram te apparere? & tu quomodo dignaris ad peccatorem venire? Tu nosti servum tuum, & scis quia nil boni in se habet unde hoc illi præstes. Confiteor igitur vilitatem meam; agnosco tuam bonitatem, laudo pietatem, & gratias ago propter nimiam caritatem. Propter temet ipsum enim hoc facis, non propter mea merita; ut bonitas tua mihi magis innotescat, caritas amplior ingeratur,

LIBER IV. CAP. ij. 297

& humilitas perfectius commendetur. Quia ergo tibi hoc placet & tu sic fieri jussisti; placet & mihi dignatio tua, & utinam iniquitas mea non obstat!

2. O dulcissime & benignissime JESU! quanta tibi reverentia & gratiarum actio cum perpetuâ laude, pro susceptione sacri corporis tui, debetur, cujus dignitatem nullus hominum explicare potens invenitur! Sed quid cogitabo in hac communione, in accessu ad Dominum meum, quem debite venerari nequeo & tamen devotè suscipere desidero? Quid cogitabo melius & salubrius, nisi me ipsum totaliter humiliando coram te & tuam infinitam bonitatem exaltando supra me? Laudo te, Deus meus, & exalto in æternum: despicio me & subjicio tibi in profundum vilitatis meæ.

3. Ecce tu Sanctus Sanctorum, & ego fordes peccatorum. Ecce tu inclinas te ad me, qui non sum dignus ad te respicere! Ecce tu venis ad me, tu vis esse mecum, tu invitas me ad convivium tuum! Tu

398 *DE IMIT. CHRISTI.*

mihi dare vis coelestem cibum & panem angelorum, ad manducandum; non alium sanè quam te ipsum, panem vivum qui de cœlo descendisti & das vitam mundo!

4. Ecce, unde dilectio procedit! qualis dignatio illucescit! quam magnæ gratiarum actiones & laudes tibi pro his debentur! O! quam salutare & utile consiliū tuum, quum istud instituisti! quam suave & jucundum convivium, quum te ipsum in cibum donasti! O! quam admirabilis operatio tua, Domine! quam potens virtus tua! quam ineffabilis veritas tua! Dixisti enim, & facta sunt omnia: & hoc factum est quod ipse jussisti.

5. Mira res, & fide digna, ac humanum vincens intellectum; quod tu, Domine, Deus meus, verus Deus & homo, sub modicâ specie panis & vini integer contineris, & sine consumptione à fumente manducaris. Tu, Domine universorum, qui nullius habes indigentiam, voluisti per Sacramentum tuum habitare in nobis: conserva cor meum & corpus immaculatum,

LIBER IV. CAP. ij. 299

ut lætâ & purâ conscientiâ sæpiùs tua valeam celebrare mysteria & ad meam perpetuam accipere salutem, quæ ad tuum præcipuè honorem & memoriale perenne sanxisti & instituisti.

6. Lætare, Anima mea, & gratias age Deo, pro tam nobili munere & solatio singulari in hâc lacrymarum valle tibi relikto. Nam, quoties hoc mysterium recolis & CHRISTI corpus accipis, toties tuæ redemptionis opus agis & particeps omnium meritorum CHRISTI efficeris. Caritas etenim CHRISTI nunquam minuitur, & magnitudo propitiationis ejus nunquam exhauritur. Ideo novâ semper mentis renovatione ad hoc disponere te debes, & magnum salutis mysterium attentâ consideratione pensare. Ita magnum, novum, & jucundum tibi videri debet, quum celebras aut missam audis, ac si eodem die CHRISTUS, primum in uterum Virginis descendens, homo factus esset; aut in cruce pendens, pro salute hominum pateretur & moreretur.



CAPUT LII.

Quod utile sit sæpe communicare.

1. AN. FID. **E**CCĒ ego venio ad te, Domine, ut bene mihi sit ex munere tuo & lætificer in convivio sancto tuo, quod *parasti in dulcedine tuâ pauperi*, Deus (Pl. lxxij, 11). Ecce in te est totum quod desiderare possum & debeo; & tu salus mea & redemptio, spes & fortitudo, decus & gloria. *Lætifica ergo hodie animam servi tui, quoniam ad te, Domine IESU, animam meam levavi* (Pl. lxxxv, 3). Desidero te nunc devotè ac reverenter suscipere; cupio te in domum meam inducere, quatenus cum Zachæo merear à te benedici ac inter filios Abrahæ computari. Anima mea corpus tuum concupiscit; cor meum tecum uniri desiderat.

2. Trade te mihi, & sufficit; nam præter te nulla consolatio valet; sine te esse nequeo, & sine visitatione tuâ vivere non

LIBER IV. CAP. iij. 301

valeo. Ideoque oportet me frequenter ad te accedere & in remedium salutis meae recipere; ne forte deficiam in via, si fuero coelesti fraudatus alimoniâ. Sic enim tu; misericordissime JESU, prædicans populis & varios curans languores, aliquando dixisti; *Dimittere vos jejunos nolo, ne deficiant in via* (Matth. xv, 32). Age igitur hoc mecum modo, qui te pro fidelium consolatione in Sacramento reliquisti. Tu es enim suavis refectio animæ; & qui te digne manducaverit, particeps & hæres erit æternæ gloriæ. Necessarium quidem mihi est, qui tam sæpe labor & pecco, tam cito torpesco & deficio, ut, per frequentes orationes, & confessiones, & sacram corporis tui perceptionem, me renovem, mundem, & accendam; ne forte, diutius abstinendo, à sancto proposito defluam.

3. Proni enim sunt sensus hominis ad malum ab adolescentiâ suâ; & nisi succurrat divina medicina, labitur homo mox ad pejora. Retrahât ergo sancta Communio à malo, & confortat in bono. Si enim

modo , tam sæpe negligens sum & tepidus ; quando communico aut celebros ; quid fieret , si medelam non sumerem & tam grande juvamen non quærerem ? Et licet omnâ die non sim aptus nec ac celebrandum bene dispositus , dabo tamen operam congruis temporibus divina percipere mysteria ac tantæ gratiæ participem me præbere. Nam hæc est una principalis fidelis animæ consolatio , quam diu peregrinatur à te in mortali corpore , ut , sæpius memor Deû sui , Dilectum suum devotâ suscipiat mente.

4. O mira circa nos tuæ pietatis dignatio , quod tu , Domine Deus , creator & vivificator omnium spirituum , ad pauperculam dignaris venire animam , & cum totâ divinitate tuâ ac humanitate ejus impinguare esuriem ! O felix mens & beata anima , quæ te , Dominum Deum suum , meretur devotè suscipere , & in tui susceptione spiritali gaudio repleti ! O ! quam magnum suscipit dominum ! quam dilectum inducit hospitem ! quam jucundum recipit socium ! quam fidelem acceptat amicum ! quam spe-

LIBER IV. CAP. iij. 303

ciosum & nobilem amplectitur sponsum ,
præ omnibus dilectum & super omnia de-
siderabilia amandum ! Sileant à facie tuâ ,
dulcissime Dilecte meus , cœlum , & terra ,
& omnis ornatus eorum : quoniam quid-
quid laudis habent ac decoris ex dignatio-
ne tuæ est largitatis ; nec ad decorem tuū
pervenient nominis , *cujus sapientiæ non est
numerus* (Ps. cxlvj , 5).



C A P U T I V.

*Quod multa bonâ præstantur devotè
communicantibus.*

I. AN. FID. **D** O M I N E , Deus meus ,
præveni servum tuum in benedictionibus dul-
cedinis (Ps. xx , 4) tuæ , ut ad tuum ma-
gnificum Sacramentum dignè ac devotè me-
rear accedere. Excita cor meum in te , &
à gravi torpore exue me. Visita me in sa-
lutari tuo , ad gustandum in spiritu suavi-
tatem tuam , quæ in hoc Sacramento tan-
quam in fonte plenariè latet. Illumina quo-

304 *DE IMIT. CHRISTI.*

que oculos meos ad intuentum tantum mysterium, & ad credendum illud indubitata fide me roborat. Est enim operatio tua, non humana potentia; tua sacra institutio, non hominis adinventio. Non enim ad hæc capienda & intelligenda aliquis idoneus per se reperitur, quæ angelicam etiam subtilitatem transcendunt. Quid ergo ego, peccator indignus, terra & cinis, de tam alto sacro secreto potero investigare & capere?

2. Domine, in simplicitate cordis mei, in bonâ firmâ fide, & in tuâ jussione, ad te cum spe & reverentiâ accedo; & verè credo quia tu præsens es hîc in Sacramento, Deus & homo. Vis ergo ut te suscipiam & me ipsum tibi in caritate uniam. Unde tuam precor clementiam, & specialem ad hoc imploro mihi donari gratiam; ut totus in te liquefiam, & amore peresfluam, atque de nullâ alienâ consolatione amplius me intromittam. Est enim hoc altissimum & dignissimum Sacramentum salus animæ & corporis, medicina omnis spiritualis languoris; in quo vitia mea curantur,

LIBER IV. CAP. IV. 305

passiones frenantur , tentationes vincuntur aut minuuntur , gratia major infunditur , virtus incepta augetur , fides firmatur , spes roboratur , & caritas ignescit ac dilatatur.

3. Multa namque bona largitus es & adhuc sæpius largiris in Sacramento Dilectis tuis devotè communicantibus , Deus meus , susceptor animæ meæ , reparator infirmitatis humanæ , & totius dator consolationis internæ. Nam multam ipsis consolationem adversus variam tribulationem infundis , & de imo dejectionis propriæ ad spem tuæ protectionis erigis , atque novâ quâdam gratiâ eos intus recreas & illustras ; ut , qui anxii primum & sine affectione se ante Communionem senserant , postea refectione cibo potuque cœlesti , in melius se mutatos inveniant. Quod idcirco cum Electis tuis dispensanter agis , ut veraciter agnoscant & patenter experiantur , quantum infirmitatis ex se ipsis habeant & quid bonitatis ac gratiæ ex te consequantur : quia ex semet ipsis frigidi , duri , & indevoti , ex te autem ferventes , alacres , & devoti

esse merentur. Quis enim , ad fontem suavitatis humiliter accedens , non modicum suavitatis inde reportat ? aut quis , juxta copiosum ignem stans , non parum caloris inde percipit ? Et tu fons es semper plenus & superabundans , ignis jugiter ardens & nunquam deficiens.

4. Unde , si mihi non licet haurire de plenitudine fontis nec usque ad satietatem potare , apponam tamen os meum ad foramen coelestis fistulae , ut saltem modicam inde guttulam capiam ad refocillandam fistulam meam & non penitus exarescam. Et si necdum totus coelestis & tam ignitus ut cherubim & seraphim esse possum ; conabor tamen devotioni insistere & cor meum preparare , ut vel modicam divini incendii flammam ex humili sumptione vivifici Sacramenti conquiram. Quidquid autem mihi deest , JESU bone , Salvator sanctissime , tu pro me supple benignè ac gratiosè , qui omnes ad te dignatus es vocare , dicens , *Venite ad me , omnes qui laboratis & onerati estis ; & ego reficiam vos.*

LIBER IV. CAP. IV. 307

5. Ego quidem laboro in sudore vultus mei, dolore cordis torqueor, peccatis oneror, tentationibus inquietor, multis malis passionibus implicor & premor: & non est qui adjuvet, non est qui liberet & saluum faciat, nisi tu, Domine Deus, Salvator meus; cui committo me & omnia mea, ut me custodias & perducas in vitam æternam. Suscipe me in laudem & gloriam nominis tui, qui corpus tuum & sanguinem in cibum & potum mihi parasti. *Præsta, Domine Deus, Salutaris meus, ut cum frequentatione mysteriorum tui crescat mea devotionis affectus (Ecclesiæ oratio.)*



C A P U T V.

De dignitate Sacramenti, & statu sacerdotali.

1. CHR. **S**I haberes angelicam puritatem & sancti Joannis-Baptistæ sanctitatem, non esses dignus hoc Sacramentum accipere nec tractare; non enim hoc meritis debetur

308 *DE IMIT. CHRISTI.*

hominum, quod homo consecret & tractet **CHRISTI** Sacramentum & sumat in cibum panem angelorum. Grande mysterium, & magna dignitas sacerdotum, quibus id datum est quod angelis non est concessum! Soli namque sacerdotes ritè in Ecclesiâ ordinati potestatem habent celebrandi & corpus **CHRISTI** consecrandi. Sacerdos quidem minister est Dei, utens verbo Dei per jussionem & institutionem Dei; Deus autem ibi principalis est actor & invisibilis operator, cui subest omne quod voluerit & paret omne cui jusserit.

2. Plus ergo credere debes Deo omnipotenti in hoc excellentissimo Sacramento, quam proprio sensui aut alicui signo visibili: ideoque cum tremore & reverentiâ ad hoc opus est accedendum. Attende tibi, & vide cujus ministerium tibi traditum est per impositionem manûs episcopi. Ecce sacerdos factus es & ad celebrandum consecratus: vide nunc, ut fideliter & devotè in suo tempore Deo sacrificium offeras, & te ipsum irreprehensibilem exhibeas. Non

LIBER IV. CAP. V. 309

alleviasti onus tuum ; sed arctiori jam alligatus es vinculo disciplinæ , & ad majorem teneris perfectionem sanctitatis. Sacerdos omnibus virtutibus debet esse ornatus & aliis bonæ vitæ exemplum præbere. Ejus conversatio , non cum popularibus & communibus hominum viis , sed cum angelis in cælo aut cum perfectis viris in terrâ.

3. Sacerdos sacris vestibus indutus CHRISTI vices gerit , ut Deum pro se & pro omni populo suppliciter & humiliter roget. Habet ante se & retro dominicæ crucis signum , ad memorandam jugiter CHRISTI passionem. Ante se crucem in casulâ portat , ut CHRISTI vestigia diligenter inspiciat & sequi ferventer studeat : post se cruce signatus est , ut adversa quælibet ab aliis illata clementer pro Deo toleret. Ante se crucem gerit , ut propria peccata lugeat : post se , ut aliorum etiam commissa per compassionem defleat , & se medium inter Deum & peccatorem constitutum esse sciat , nec ab oratione & oblatione sanctâ torpescat donec gratiam & misericordiam impetrare

310 DE IMIT. CHRISTI.

mereatur. Quando sacerdos celebrat Deum honorat, angelos lætificat, Ecclesiam ædificat, vivos adjuvat, defunctis requiem præstat, & sese omnium bonorum participem efficit.



C A P U T VI.

Interrogatio de exercitio ante Communione.

1. AN. FID. **Q**UUM tuam dignitatem; Domine, & meam vilitatem penso, valdè contremisco & in me ipso confundor: si enim non accedo, vitam fugio; & si indignè me ingessero, offensam incurro. Quid ergo faciam, Deus meus, Auxiliator meus & Consiliator in necessitatibus?

2. Tu doce me viam rectam, propone breve aliquod exercitium sacrae Communioni congruum. Utile est enim scire, qualiter scilicet devotè ac reverenter tibi parare debeam cor meum, ad recipiendum salubriter tuum Sacramentum, seu etiam celebrandum tam magnum & divinum sacrificium.



C A P U T VII.

*De discussione propriæ conscientiæ ;
& emendationis proposito.*

1. CHR. **S**UPER omnia , cum summâ humilitate cordis & supplici reverentiâ , cum plenâ fide & piâ intentione honoris Dei , ad hoc Sacramentum celebrandum , tractandum , & sumendum oportet Dei accedere sacerdotem. Diligenter examina conscientiam tuam , & , pro posse tuo , cum verâ contritione & humili confessione eam munda & clarifica ; ita ut nihil grave habeas aut scias , quod te remordeat & liberum accessum impediat. Habeas displicentiam omnium peccatorum tuorum in generali , & pro quotidianis excessibus magis in speciali doleas & gemas ; & si tempus patitur , Deo in secreto cordis cunctas confitere passionum tuarum misérias.

2. Ingemisce & dole , quod adhuc ita carnalis sis & mundanus , tam immortifi-

312 *DE IMIT. CHRISTI.*

catus à passionibus , tam plenus concupiscentiarum motibus , tam incustoditus in sensibus exterioribus , tam sæpe multis vanis phantasiis implicatus , tam multum inclinatus ad exteriora , tam negligens ad interiora , tam levis ad risum & dissolutionem , tam durus ad fletum & compunctionem , tam promptus ad laxiora & carnis commoda , tam segnis ad rigorem & fervorem , tam curiosus ad nova audienda & pulchra intuenda , tam remissus ad humilia & abjecta amplectenda , tam cupidus ad multa habenda , tam parvus ad dandum , tam tenax ad retinendum , tam inconsideratus in loquendo , tam incontinens in tacendo , tam incompotus in moribus , tam importunus in actibus , tam effusus super eibum , tam surdus ad Dei verbum , tam velox ad quietem , tam tardus ad laborem , tam vigilans ad fabulas , tam somnolentus ad vigilias sacras , tam festinus ad finem , tam vagus ad attendendum , tam negligens in horis persolvendis , tam tepidus in celebrando , tam aridus in communi-

cando;

LIBER IV. CAP. VIJ. 313

cando , tam cito distractus , tam raro plene tibi collectus , tam subito commotus ad iram , tam facilis ad alterius displicentiam , tam pronus ad judicandum , tam rigidus ad arguendum , tam lætus ad prospera , tam debilis in adversis , tam sæpe multa bona proponens & modicum ad effectum perducens.

3. His & aliis defectibus tuis cum dolore & magnâ displicentiâ propriæ infirmitatis confessis ac deploratis , firmum statue propositum semper emendandî vitam tuam & in melius proficiendi. Deinde , cum plenâ resignatione & integrâ voluntate , offer te ipsum in honorem nominis mei , in arcu cordis tui , holocaustum perpetuum , corpus tuum scilicet & animam mihi fideliter committendo ; quatenus & sic dignè merearis ad offerendum Deo sacrificium accedere , & Sacramentum corporis mei salubriter suscipere.

4. Non est enim oblatio dignior & satisfactio major pro peccatis diluendis , quam se ipsum purè & integrè , cum oblatione

314 DE IMIT. CHRISTI.

corporis CHRISTI, in Missâ & in Communionem Deo offerre. Si fecerit homo quod in se est & verè pœnituerit, quotiescumque pro veniâ & gratiâ ad me accenderit : *Vivo ego , dicit Dominus , qui nolo mortem peccatoris , sed magis ut convertatur... & vivat (Ezech. xxxiiij , 11) : quoniam peccatorum ejus non recordabor amplius , sed cuncta sibi indulta erunt.*



C A P U T V I I I .

*De oblatione CHRISTI in cruce ;
& propriâ resignatione.*

1. CHR. SICUT ego me ipsum , expansis in cruce manibus & nudo corpore , pro peccatis tuis Deo Patri sponte obtuli , ita ut nihil in me remaneret quin totum in sacrificium divinæ placationis transiret ; ita debes & tu temet ipsum mihi voluntariè in oblationem puram & sanctam quotidie in Missâ , cum omnibus viribus & affectibus tuis , quanto intimius vales , offerre. Quid

LIBER IV. CAP. viij. 315

magis à te requiro , quam ut te studeas mihi ex integro resignare ? Quidquid præter te ipsum das , nihil curo ; quia non quaero datum tuum , sed te.

2. Sicut non sufficeret tibi omnibus habitis præter me ; ita nec mihi placere poterit quidquid dederis , te non oblato. Offer te mihi & da te totum pro Deo , & erit accepta oblatio. Ecce ego me totum obtuli Patri pro te ; dedi etiam tibi totum corpus meum & sanguinem in cibum , ut totus tuus essem , & tu meus permaneres. Si autem in te ipso steteris nec sponte te ad voluntatem meam obtuleris ; non est plena oblatio , nec integra erit inter nos unio. Igitur omnia opera tua præcedere debet spontanea tui ipsius in manus Dei oblatio , si libertatem consequi vis & gratiam : ideo enim tam pauci illuminati & liberi intus efficiuntur , quia se ipsos ex toto abnegare nesciunt. Est firma sententia mea : *Qui non renunciat omnibus , non potest meus esse discipulus* (Luc. xiv , 33). Tu ergo , si optas

O ij

meus esse discipulus , offer te ipsum mihi
cum omnibus affectibus tuis,



CAPUT IX.

*Quod nos & omnia nostra Deo debemus
offerre , & pro omnibus orare.*

I. AN. FID. **D**OMINE , omnia tua sunt
quæ in coelo sunt & quæ in terrâ. Desidero
me ipsum tibi in spontaneam oblationem
offerre , & tuus perpetuo permanere. Do-
mine , in simplicitate cordis mei offero
me ipsum tibi hodie in servum semper-
num , in obsequium & in sacrificium laudis
perpetuæ. Suscipe me cum hæc sanctâ obla-
tione tui pretiosi corporis , quam tibi ho-
die in præsentia angelorum invisibiliter as-
sistentium offero ; ut sit pro me & pro
cuncto populo tuo in salutem.

2. Domine , offero tibi omnia peccata
& delicta mea quæ commisi coram te &
sanctis angelis tuis , à die quo primum pec-

LIBER IV. CAP. IX. 317

care potui usque ad horam hanc, super placabili altari tuo; ut tu omnia pariter incendas & comburas igne caritatis tuæ, & deleas univērsas maculas peccatorum meorum, & conscientiam meam ab omni delicto emundes, & restituas mihi gratiam tuam quam peccando amisi; omnia mihi plenè indulgendo & in osculum pacis me misericorditer recipiendo.

3. Quid possum agere pro peccatis meis, nisi humiliter ea cōfitendo & lamentando, & tuam propitiationem incessanter deprecando? Deprecor te, exaudi me propitiū, ubi asto coram te, Deus meus. Omnia peccata mea mihi maxime displicent; nolo ea unquam ampliū perpetrare; sed pro eis doleo & dolebo quam diu vixero, paratū poenitentiam agere & pro posse satisfacere. Dimitte mihi, Deus, dimitte mihi peccata mea propter nomen sanctum tuum; salva animam meam, quam pretioso sanguine tuo redemisti. Ecce committo me misericordiæ tuæ, resigno me in manibus tuis; age mecum secundum bo-

318 *DE IMIT. CHRISTI.*

nitatem tuam, non secundum meam malitiam & iniquitatem.

4. Offero etiam tibi omnia bona mea; quamvis valdè pauca & imperfecta; ut tu ea emendes & sanctifices; ut ea grata habeas, & accepta tibi facias, & semper ad meliora trahas; necnon ad beatum ac laudabilem finem me pigrum & inutilem homuncionem perducas.

5. Offero quoque tibi omnia pia desideria devotorum, necessitates parentum, amicorum, fratrum, sororum, omniumque carorum meorum, & eorum qui mihi vel aliis propter amorem tuum benefecerunt, & qui orationes & missas pro se suisque omnibus dici à me desideraverunt & petierunt, sive in carne adhuc vivant sive jam sæculo defuncti sint: ut omnes sibi auxilium gratiæ tuæ, opem consolationis, protectionem à periculis, liberationem à pœnis advenire sentiant; & ut, ab omnibus malis erepti, gratias tibi magnificas læti persolvant.

6. Offero etiam tibi preces & hostias

LIBER IV. CAP. ix. 319

placationis , pro illis specialiter qui me in aliquo læserunt , contristaverunt , aut vituperaverunt , vel aliquod damnum vel gravamen intulerunt ; pro his quoque omnibus quos aliquando contristavi , conturbavi , gravavi , & scandalizavi , verbis , factis , scienter vel ignoranter ; ut nobis omnibus pariter indulgeas peccata nostra & mutuas offensiones. Aufer , Domine , à cordibus nostris omnem suspensionem , indignationem , iram , & disceptationem , & quidquid potest caritatem lædere & fraternam dilectionem minuere. Miserere , miserere , Domine , misericordiam tuam poscentibus ; da gratiam indigentibus ; & fac nos tales existere , ut simus digni gratiâ tuâ perfrui & ad vitam proficiamus æternam.

Amen.





CAPUT X.

*Quod sacra Communio de facili non est
relinquenda.*

1. CHR. **F**REQUENTER recurrendum est ad fontem gratiæ & divinæ misericordiæ, ad fontem bonitatis & totius puritatis; quatenus à passionibus tuis & vitiis curari valeas, & contra universas tentationes & fallacias diaboli fortior atque vigilantior effici merearis. Inimicus, sciens fructum & remedium maximum in sacrâ Communionem positum, omni modo & occasione nititur Fideles & Devotos, quantum prævalet, retrahere & impedire.

2. Quum enim quidam sacræ Communioni se aptare disponunt, peiores fatiæ immisiones patiuntur. Ipse nequam spiritus, ut in Job scribitur (Job. j, 6) venit inter filios Dei, ut solitâ illos nequitia suâ perturbet aut timidos nimium reddat & perplexos; quatenus affectum eorum minuat

LIBER IV. CAP. X. 321

Vel fidem impugnando auferat , si forte aut omnino Communionem relinquant aut cum tepore accedant. Sed non est quidquam curandum de versutiis & phantasiis illius , quantumlibet turpibus & horridis ; sed cuncta phantasmata in caput ejus sunt retorquenda. Contemnendus est miser & deridendus ; nec , propter insultus ejus & commotiones quas suscitât , sacra est omittenda Communio.

3. Sæpe etiam impedit nimia sollicitudo pro devotione habendâ & anxietates quædam de Confessione faciendâ. Age secundum consilium sapientum , & depone anxietatem & scrupulum ; quia gratiam Dei impedit & devotionem mentis destruit. Propter aliquam parvam turbationem vel gravitatem , sacram ne dimittas Communionem ; sed vade citius confiteri , & omnes offensiones aliis libenter indulge. Si vero tu aliquem offendisti , veniam humiliter precare ; & Deus libenter indulgebit tibi.

4. Quid prodest diu tardare Confessionem aut sacram differre Communionem ?

322 *DE IMIT. CHRISTI.*

Expurga te cum primis , expue velociter venenum , festina accipere remedium , & senties melius quam si diu distuleris. Si hodie propter istud dimittis , cras forsitan aliud majus eveniet ; & sic diu posses à Communionem impediri & magis ineptus fieri. Quanto citius vales , à præsenti gravitate & inertiâ te excutias ; quia nihil importat diu anxiami , diu cum turbatione transire , & ob quotidiana obstacula se à divinis sequestrare. Imò plurimum nocet diu Communionem protelare , nam & gravem torporem consuevit inducere. Proh dolor ! quidam tepidi & dissoluti moras confitendi libenter accipiunt , & communionem sacram idcirco differri cupiunt , ne ad majorem sui custodiam se dare teneantur.

5. Heu ! quam modicam caritatem & debilem devotionem habent qui sacram Communionem tam faciliter postponunt ! Quam felix ille est & Deo acceptus habetur , qui sic vivit & in tali puritate conscientiam suam custodit , ut etiam omni die communicare paratus & bene affectatus

LIBER IV. CAP. X. 323

esset, si ei liceret & sine notâ agere posset! Si quis interdum abstinet, humilitatis gratiâ aut legitimâ impediente causâ, laudandus est de reverentiâ. Si autem torpor obrepserit, se ipsum excitare debet & facere quod in se est; & Dominus aderit desiderio suo pro bonâ voluntate, quam specialiter respicit.

6. Quum vero legitimè præpeditus est, habebit semper bonam voluntatem & piam intentionem communicandi; & sic non carebit fructu Sacramenti. Potest enim quilibet devotus, omni die & horâ ad spiritualem CHRISTI communionem salubriter & sine prohibitione accedere; & tamen certis diebus & statuto tempore, corpus sui Redemptoris cum affectuosâ reverentiâ sacramentaliter debet suscipere, & magis laudem Dei & honorem prætere quam suam consolationem quærere. Nam toties mysticè communicat & invisibiliter reficitur, quoties incarnationis CHRISTI mysterium passionemque devotè recolit & in amore ejus accenditur.

324 DE IMIT. CHRISTI.

7. Qui aliter se non præparat nisi instante festo vel consuetudine compellente ; sæpius imparatus erit. Beatus , qui se Domino in holocaustum offert quoties celebrat aut communicat ! Non sis in celebrando nimis prolixus aut festinus , sed serva bonum communem modum cum quibus vivis. Non debes aliis generare molestiam & tædium ; sed communem servare viam secundum Majorum institutionem , & potius aliorum servire utilitati quam propriæ devotioni vel affectui.



C A P U T X I.

*Quod corpus CHRISTI & sacra
Scriptura maxime sint animæ fidei
necessaria.*

F. AN. FID. **O** DULCISSIME Domine JESU , quanta est dulcedo devotæ animæ tecum epulantis in convivio tuo ; ubi ei non alius cibus manducandus proponitur , nisi tu unicus Dilectus ejus , super omnia

LIBER IV. CAP. xj. 325

desideria cordis ejus desiderabilis ! Et mihi quidem dulce foret in præsentiâ tuâ ex intimo affectu lacrymas fundere , & cum piâ Magdalenâ pedes tuos lacrymis irrigare. Sed ubi est hæc devotio ? ubi lacrymarum sanctarum copiosa effusio ? Certè in conspectu tuo & sanctorum angelorum tuorum , totum cor meum ardere deberet & ex gaudio flere ; habeo enim te in Sacramento verè præsentem , quamvis alienâ specie occultatum.

2. Nam in propriâ & divinâ claritate te conspicere oculi mei non possent , sed neque totus mundus in fulgore gloriæ majestatis tuæ subsisteret. In hoc ergo imbecillitati meæ consulis , quod te sub Sacramento abscondis. Habeo verè & adoro quem angeli adorant in cœlo ; sed ego adhuc interim in fide , illi autem in specie & sine velamine. Me oportet contentum esse in lumine veræ fidei & in eâ ambulare , donec aspiret dies æternæ claritatis & inclinentur umbræ (Cant. ij , 17) figurarum. Quum autem venerit quod perfectum est

326 DE IMIT. CHRISTI.

(I. Cor. xiiij, 10). cessabit usus sacramentorum, quia Beati in gloriâ cœlesti non egent medicamine sacramentali : gaudent enim sine fine in præsentia Dei, facie ad faciem gloriam ejus specularantes ; & de claritate in claritatem abyssalis deitatis transformati, gustant *Verbum Dei caro factum*, (Joan. j, 14) sicut fuit ab initio & manet in æternum.

3. Memori horum mirabilium, grave mihi fit tædium etiam quodlibet spirituale solatium ; quia, quam diu Dominum meum apertè in suâ gloriâ non video, pro nihilo duco omne quod in mundo conspicio & audio. Testis es tu mihi, Deus, quod nulla res me potest consolari, nulla creatura quietare, nisi tu, Deus meus, quem desidero æternaliter contemplari. Sed non est hoc possibile, durante me in hâc mortalitate : ideo oportet, ut me ponam ad magnam patientiam, & me ipsum in omni desiderio tibi submittam. Nam & Sancti tui, Domine, qui tecum jam in regno cœlorum exsultant, in fide & patientiâ

LIBER IV. CAP. xj. 327

magnâ , dum viverent , adventum gloriæ tuæ expectabant. Quod illi crediderunt , ego credo ; quod illi speraverunt , ego spero ; quo illi pervenerunt , per gratiam tuam me venturum confido. Ambulabo interim in fide , exemplis confortatus Sanctorum. Habebo etiam libros sanctos pro solatio & vitæ speculo , atque , super hæc omnia , sanctissimum corpus tuum pro singulari remedio & refugio.

4. Duo namque mihi necessaria permaximè sentio in hac vitâ , sine quibus mihi importabilis foret ista miserabilis vita : in carcere corporis hujus detentus , duobus me egere fateor , cibo scilicet & lumine. Dedisti itaque mihi infirmo sacrum corpus tuum ad refectionem mentis & corporis , & posuisti *lucernam pedibus meis verbum tuum* (Ps. cxviiij , 105). Sine his duobus bene vivere non possem : nam verbum Dei , lux animæ meæ ; & Sacramentum tuum , panis vitæ. Hæc possunt etiam dici mensæ duæ , hinc & inde in gazophylacio sanctæ Ecclesiæ positæ : una mensa est sacri alta-

318 DE IMIT. CHRISTI.

ris, habens panem sanctum, id est, corpus CHRISTI pretiosum; altera est divinæ legis, continens doctrinam sanctam, erudiens fidem rectam, & firmiter usque ad interiora velaminis ubi sunt Sancta sanctorum perducens. Gratias tibi, Domine JESU, Lux lucis æternæ, pro doctrinæ sacrae mensâ, quam nobis, per servos tuos prophetas & apostolos aliosque doctores, ministrasti.

5. Gratias tibi, Creator ac Redemptor hominum, qui, ad declarandam toti mundo caritatem tuam, coenam parasti magnam, in quâ, non agnum typicum, sed tuum sanctissimum corpus & sanguinem proposuisti manducandum; lætificans omnes Fideles convivio sacro, & calice inebrians salutari, in quo sunt omnes deliciae paradisi, & epulantur nobiscum angeli sancti, sed suavitate feliciori.

6. O! quam magnum & honorabile est officium sacerdotum, quibus datum est Dominum majestatis verbis sacris consecrare, labiis benedicere, manibus tenere, ore proprio sumere, & cæteris ministrare!

LIBER IV. CAP. xj. 329

O ! quam mundæ debent esse manus illæ !
quam purum os ! quam sanctum corpus !
quam immaculatum cor erit sacerdotis , ad
quem totius ingreditur auctor puritatis ! Ex
ore sacerdotis nihil nisi sanctum , nihil nisi
honestum & utile procedere debet ver-
bum , qui tam sæpe CHRISTI accipit Sa-
cramentum.

7. Oculi ejus simplices & pudici , qui
CHRISTI corpus solent intueri : manus
puræ & in cælum elevatæ , quæ Creato-
rem cœli & terræ solent contrectare. Sa-
cerdotibus specialiter in Lege dicitur ; *Sancti
estote , quia ego sanctus sum , Dominus Deus
vester (Levit. xix , 2)*.

8. Adjuvet nos gratia tua , omnipotens
Deus , ut , qui officium sacerdotale susce-
pimus , dignè ac devotè tibi in omni pu-
ritate & conscientia bonâ famulari valea-
mus. Et si non possumus in tantâ innocen-
tiâ vitæ conversari ut debemus , concede
nobis tamen dignè flere mala quæ gessimus ,
& in spiritu humilitatis ac bonæ voluntatis
proposito , tibi ferventius de cætero deser-
vire.



CAPUT XII.

Quod magnâ diligentia se debeat communicaturus CHRISTO præparare.

1. CHR. **E**GO sum puritatis amator & dator omnis sanctitatis. Ego cor purum quero, & ibi est locus requietionis meæ. Para mihi coenaculum grande stratum, & faciam apud te Pascha cum discipulis meis. Si vis ut veniam ad te & apud te maneam, *ex-
durga vetus fermentum* (I. Cor. v, 7) & munda cordis tui habitaculum. Exclude totum sæculum & omnem vitiorum tumultum; sede *sicut passer solitarius in tecto*, (Ps. cj, 8) & cogita excessus tuos in amaritudine animæ tuæ: omnis namque amans suo dilecto Amatori optimum & pulcherri-
mum præparat locum, quia in hoc cognoscitur affectus susipientis Dilectum.

2. Scito tamen te non posse satisfacere huic præparationi ex merito tuæ actionis, etiam si per integrum annum te præpara-

LIBER IV. CAP. XIJ. 331

res & nihil aliud in mente haberes : sed ex solâ pietate & gratiâ meâ permitteris ad mensam meam accedere ; ac si mendicus ad prandium vocaretur divitis , & ille nihil aliud habeat ad retribuendum beneficiis ejus nisi se humiliando & regratiando. Fac quod in te est , & diligenter facito : non ex consuetudine , non ex necessitate , sed cum timore , & reverentiâ , & affectu , accipe corpus dilecti Domini Dei tui , dignantis ad te venire. Ego sum qui vocavi , ego jussi fieri , ego supplebo quod tibi deest : veni , & suscipe me.

3. Quum gratiam devotionis tribuo ; gratias age Deo tuo ; non quia dignus es , sed quia tui misertus sum. Si non habes , sed magis aridum te sentis ; insiste orationi , ingemisce , & pulsa , nec desistas donec merearis micam aut guttam gratiæ salutaris accipere. Tu mei indiges , non ego tui indigeo ; nec tu me sanctificare venis , sed ego te sanctificare & meliorare venio ; tu venis ut ex me sanctificeris & mihi uniaris , ut novam gratiam recipias & de novo ad

332 *DE IMIT. CHRISTI.*

emendationem accendaris. Noli negligere hanc gratiam ; sed præpara cum omni diligentia cor tuum , & introduce ad te Dilectum tuum.

4. Oportet autem , ut non solum te præpares ad devotionem ante Communionem , sed ut etiam te sollicitè conserves in eâ post Sacramenti perceptionem. Nec minor custodia postè exigitur , quam devota præparatio prius : nam bona postmodum custodia , optima iterum præparatio ad majorem gratiam consequendam ; ex eo quippe valdè indispositus quis redditur , si statim fuerit nimis effusus ad exteriora solatia. Cave à multiloquio , mane in secreto , & frue Deo tuo ; ipsum enim habes , quem totus mundus tibi auferre non potest. Ego sum , cui te totum dare debes , ita ut jam ultra , non in te , sed in me , absque omni sollicitudine , vivas.





C A P U T X I I I.

*Quod toto corde anima devota CHRISTI
unionem in Sacramento affectare
debet.*

I. AN. FID. **Q**UIS mihi det, Domine ;
ut inveniam te solum, & aperiam tibi to-
tum cor meum, & fruam te sicut desiderat
anima mea ; & jam me nemo despiciat,
nec ulla creatura me moveat vel respiciat ;
sed tu solus mihi loquaris & ego tibi, sicut
solet Dilectus ad Dilectum loqui, & ami-
cus cum amico convivari ? Hoc oro, hoc
desidero, ut tibi totus uniar, & cor meum
ab omnibus creatis rebus abstraham ; ma-
gisque, per sacram Communionem ac fre-
quentem celebrationem, cœlestia & æterna
sapere discam. Ah, Domine Deus ! quan-
do ero tecum totus unitus & absorptus ;
meique totaliter oblitus ! Tu in me, &
ego in te ; & sic nos pariter in unum ma-
gere concede !

334 DE IMIT. CHRISTI.

2. Verè tu es Dilectus meus, *electus ex millibus* (Cant. v, 10), in quo complacuit animæ meæ habitare omnibus diebus vitæ suæ. Verè tu pacificus meus, in quo pax summa & requies vera; extra quem labor, & dolor, & infinita miseria. *Verè tu es Deus absconditus*, (Is. xlv, 15); & consilium tuum non est cum impiis, sed cum humilibus & simplicibus sermo tuus. O! *quam suavis est, Domine, spiritus tuus, qui, ut dulcedinem tuam in filios demonstrares, pane suavissimo de cælo descendente illos reficere dignaris!* [Offic. de Sacr.] Verè non est alia natio tam grandis, quæ habeat deos appropinquantes sibi, sicut tu, Deus noster, ades (Deut. iv, 7) universis Fidelibus tuis; quibus, ob quotidianum solatium & cor erigendum in cælum, te tribuis ad edendum & fruendum.

3. Quæ est enim alia gens tam inclyta sicut plebs christiana? aut quæ creatura sub cælo tam dilecta, ut anima devota, ad quam ingreditur Deus ut pascat eam carne suâ gloriosâ? O ineffabilis gratia! ô ad-

LIBER. IV. CAP. XIV. 335

mirabilis dignatio ! ô amor immensus , homini singulariter impensus ! Sed quid retribuam Domino pro gratiâ istâ , pro caritate tam eximiâ ? Non est aliud quod gratius donare queam , quam ut cor meum Deo meo totaliter tribuam & intimè jungam. Tunc exsultabunt omnia interiora mea , quum perfectè fuerit unita Deo anima mea. Tunc dicet mihi ; « Si tu vis esse » mecum , ego volo esse tecum ». Et ego respondebo illi ; « Dignare , Domine , manere mecum , ego volo libenter esse tecum ; hoc est totum desiderium meum » ut cor meum tibi sit unitum ».

C A P U T XIV.

*De quorundam devotorum ardenti
desiderio ad corpus CHRISTI.*

I. AN. FID. **O** QUAM magna multitudo dulcedinis tuæ , Domine , quam abscondisti timentibus te (Ps. xxx , 20) ! Quando recordor devotorum aliquorum , ad Sacram

336 DE IMIT. CHRISTI.

mentum tuum, Domine, cum maximâ devotione & affectu accedentium, tunc sæpius in me ipso confundor & erubesco; quod ad altare tuum & sacrae Communionis mensam tam tepidè & frigidè accedo; quod ita aridus & sine affectione cordis maneo; quod non sum totaliter accensus coram te Deo meo, nec ita vehementer attractus & affectus sicut multi devoti fuerunt, qui, præ nimio desiderio Communionis & sensibili cordis amore, à fletu se non potuerunt continere, sed ore cordis & corporis pariter ad te Deum fontem vivum medullitus inhiabant, suam esuriem non valentes aliter temperare nec satiare, nisi corpus tuum cum omni jucunditate & spiritali aviditate accepissent.

2. O vera ardens fides eorum, probabile existens argumentum sacrae præsentiæ tuæ! Isti enim veraciter *cognoscunt Dominum suum in fractione panis*, (Luc. xxiv, 35), quorum cor tam validè ardet in eis de JESU ambulante cum eis. Longè est à me sæpe talis affectus & devotio, tam vehementer

LIBER IV. CAP. xiv. 337

hemens amor & ardor. Esto mihi propitius, JESU bone, dulcis, & benigne: & concede pauperi mendico tuo, vel interdum modicum de cordiali affectu amoris tui in sacrâ Communione sentire; ut fides mea magis convalescat, spes in bonitate tuâ proficiat, & caritas, semel perfectè accensa & cœleste manna experta, nunquam deficiat.

3. Potens est autem misericordiâ tua etiam gratiam desideratâ mihi præstare, & in spiritu ardoris, quum dies beneplaciti tui venerit, me clementissimè visitare. Etenim licet tanto desiderio tam specia-
lium devotorum tuorum non ardeo; tamen de gratiâ tuâ, illius magni inflammati desiderii desiderium habeo, orans & desiderans omnium talium fervidorum amatorum tuorum participem me fieri, ac eorum sancto consortio annumerari.





CAPUT XV.

*Quod gratia devotionis humilitate
& sui ipsius abnegatione
acquiritur.*

I. CHR. **O**PORTET te devotionis gratiam instantè quærere, desideranter petere, patienter & fiducialiter expectare, gratanter recipere, humiliter conservare, studiosè cum eâ operari, ac Deo terminum & modum supernæ visitationis donec veniat committere. Humiliare præcipuè te debes, quum parum aut nihil devotionis interiùs sentis, sed non nimium dejici nec inordinatè contristari. Dat sæpe Deus in uno brevi momento quod longo negavit tempore; dat quandoque in fine quod in principio orationis distulit dare.

2. Si semper citò gratia daretur & pro voto adesset, non esset infirmo homini bene portabile; propterea in bonâ spe & humili patientiâ expectanda est devotionis

LIBER IV. CAP. XV. 339

gratia : tibi tamen & peccatis tuis imputata , quum non datur vel etiam occultè tollitur. Modicum quandoque est quod gratiam impedit & abscondit ; si tamen modicum , & non potius grande , dici debeat quod tantum bonum prohibet : & si hoc ipsum modicum vel grande amoveris & perfectè viceris , erit quod petisti.

3. Statim namque ut te Deo ex toto corde credideris , nec hoc vel illud pro tuo libitu seu velle quæsieris , sed integrè te in ipso posueris ; unitum te invenies & pacatum : quia nil ita bene sapiet & placebit , sicut beneplacitum divinæ voluntatis. Quisquis ergo intentionem suam simplici corde sursum ad Deum levaverit , seque ab omni inordinato amore seu displicentiâ cujuslibet rei creatæ evacuaverit , aptissimus gratiæ percipiendæ ac dignus devotionis munere erit. Dat enim Dominus ibi benedictionem suam , ubi vasa vacua invenerit ; & quanto perfectiùs infimis quis renunciat , & magis sibi ipsi per contemptum sui moritur ; tanto

340 DE IMIT. CHRISTI.

gratia celerius venit , copiosius intrat , & altius liberum cor elevat.

4. *Tunc videbit , & affluet , & mirabitur ; & dilatabitur cor ejus* (*Is. lx. 5*) in ipso ; quia manus Domini cum eo , & ipse se posuit totaliter in manu ejus usque in seculum. *Ecce sic benedicetur homo* (*Ps. 127. 4*) qui quærit Deum in toto corde suo , nec in vanum accipit animam suam. Hic in accipiendo sacram Eucharistiam magnam promeretur divinæ unionis gratiam ; quia non respicit ad propriam devotionem & consolationem , sed , super omnem devotionem & consolationem , ad Dei gloriam & honorem.



CAPUT XVI.

*Quod necessitates nostras CHRISTO
aperire & ejus gratiam postulare
debemus.*

1. AN. FID. **O** DULCIS SIME atque
amantissime Domine, quem nunc devotè
desidero suscipere! tu scis infirmitatem
meam & necessitatem quam patior; in
quantis malis & vitiis jaceo; quam sæpe
sum gravatus, tentatus, turbatus, & in-
quinatus. Pro remedio ad te venio, pro
consolatione & sublevamine te deprecor.
Ad omnia scientem loquor, cui manifesta
sunt omnia interiora mea, & qui solus po-
tes me perfectè consolari & adjuvare. Tu
scis quibus bonis indigeo præ omnibus,
& quam pauper sum in virtutibus.

2. Ecce sto ante te pauper & nudus,
gratiam postulans & misericordiam implo-
rans. Refice esurientem mendicum tuum,
accende frigiditatem meam igne amoris tui,

342 *DE IMIT. CHRISTI.*

illumina cæcitatem meam claritate præsentiae tuæ. Verte mihi omnia terrena in amaritudinem, omnia gravia & contraria in patientiam, omnia infima & creatâ in contemptum & oblivionem. Erige cor meum ad te in cœlum, & ne dimittas me vagari super terram. Tu solus mihi ex hoc jam dulcescas usque in sæculum; quia tu solus cibus & potus meus, amor meus & gaudium meum, dulcedo mea & totum bonum meum.

3. Utinam me totaliter ex tuâ præsentia accendas, comburas, & in te transmutes; ut unus tecum efficiar spiritus, per gratiam internæ unionis & liquefactionem ardentis amoris! Ne patiaris me jejunum & aridum à te recedere; sed operare mecum misericorditer, sicut sæpius operatus es cum Sanctis tuis mirabiliter. Quid mirum, si totus ex te ignescerem & in me ipso deficerem; quum tu sis ignis semper ardens & nunquam deficiens, amor corda purificans & intellectum illuminans?

CAPUT XVII.

*De ardenti amore & vehementi affectu
suscipiendi CHRISTUM.*

1. AN. FID. **C**UM summâ devotione & ardenti amore, cum toto cordis affectu & fervore, desidero te, Domine, suscipere; quemadmodum multi sancti & devotæ personæ in communicando te desideraverunt, qui tibi maximè in sanctitate vitæ placuerunt & in ardentissimâ devotione fuerunt. O Deus meus! amor æternus! totum bonum meum! felicitas interminabilis! cupio te suscipere cum vehementissimo desiderio, & dignissimâ reverentiâ quam aliquis Sanctorum unquam habuit & sentire potuit.

2. Et licet indignus sum omnia illa sentimenta devotionis habere; tamen offero tibi totum cordis mei affectum, ac si omnia illa gratissima inflammata desideria solus haberem. Sed & quæcumque potest piæ mens concipere & desiderare, hæc omnia

344 DE IMIT. CHRISTI.

tibi cum summâ veneratione & intimo fervore præbeo & offero. Nihil opto mihi reservare, sed me & omnia mea tibi sponte & libentissimè immolare. Dominè, Deus meus, Creator meus, & Redemptor meus, cum tali affectu, reverentiâ, laude & honore, cum tali gratitudine, dignitate, & amore, cum tali fide, spe, & puritate, te affecto hodie suscipere, sicut te suscepit & desideravit sanctissima mater tua, gloriosa virgo Maria, quando angelo evangelizanti sibi incarnationis mysterium humiliter ac devotè respondit; *Ecce ancilla Domini, fiat mihi secundum verbum tuum* (Luc. 1, 38).

3. Et sicut beatus præcurfor tuus, excellentissimus Sanctorum, Joannes Baptista, in præsentia tuâ lætabundus exsultavit in gaudio Spiritûs sancti, dum adhuc maternis clauderetur visceribus; & postmodum cernens inter homines JESUM ambulantem, valdè se humilians, devoto cum affectu dicebat; *Amicus... sponsi qui stat & audit eum, gaudio gaudet propter vocem sponsi* (Joan. 3, 29): sic & ego magnis

LIBER IV. CAP. xvij. 345

& sacris desideriis opto inflammari, & tibi ex toto corde me ipsum præsentare. Unde & omnium devotorum cordium jubilationes, ardentes affectus, mentales excessus; ac supernaturales illuminationes, & cœlicas visiones tibi offero & exhibeo, cum omnibus virtutibus, & laudibus ab omni creaturâ in cœlo & in terrâ celebratis, & celebrandis, pro me & omnibus mihi in oratione commendatis, quatenus ab omnibus dignè lauderis & in perpetuum glorificeris.

4. Accipe vota mea, Domine, Deus meus, & desideria infinitæ laudationis ac immensæ benedictionis, quæ tibi secundum multitudinem ineffabilis magnitudinis tuæ jure debentur. Hæc tibi reddo & reddere desidero per singulos dies & momenta temporum; atque ad reddendum mecum tibi gratias & laudes, omnes cœlestes spiritus & cunctos Fideles tuos precibus & affectibus invito & exoro.

5. Laudent te universi populi, tribus, & linguæ; & sanctum ac mellifluum no-

men tuum cum summâ jubilatione & ardenti devotione magnificent. Et quicumque reverenter ac devotè altissimum Sacramentum tuum celebrant & plenâ fide recipiunt, gratiam & misericordiam apud te invenire mereantur, & pro me peccatore suppliciter exorent : quumque optatâ devotione ac fruibili unione potiti fuerint, & bene consolati ac mirificè refecti de sacrâ mensâ cœlesti abscesserint, mei pauperis recordari dignentur.

C A P U T XVIII.

Quod homo non sit curiosus scrutator Sacramenti ; sed humilis imitator CHRISTI, subdendo sensum suum sacræ fidei.

I. CHR. **C**AVENDUM est tibi à curiosâ & inutili perscrutatione hujus profundissimi Sacramenti, si non vis in dubitationis profundum submergi. Qui scrutator est majestatis, opprimetur à gloriâ (Prov. xxv, 27).

LIBER IV. CAP. xviiij. 347

Plus valet Deus operari quam homo intelligere potest. Tolerabilis , pia & humilis inquisitio veritatis , parata semper doceri , & per sanas Patrum sententias studens ambulare.

2. Beata simplicitas , quæ difficiles quaestionum relinquit vias & planâ ac firmâ pergit semitâ mandatorum Dei ! Multi devotionem perdiderunt , dum altiora scrutari voluerunt. Fides à te exigitur & sincerâ vita , non altitudo intellectûs neque profunditas mysteriorum Dei. Si non intelligis nec capis quæ infra te sunt , quomodo comprehendes quæ supra te sunt ? Subde te Deo , & humilia sensum tuum fidei ; & dabitur tibi scientiæ lumen , prout tibi fuerit utile ac necessarium.

3. Quidam graviter tentantur de fide & Sacramento ; sed non est hoc ipsis imputandum , sed potius inimico. Noli curare , noli disputare cum cogitationibus tuis , nec ad immixtas à diabolo dubitationes responde : sed crede verbis Dei , crede Sanctis ejus & Prophetis ; & fugiet à te nequam

348 DE IMIT. CHRISTI

inimicus. Sæpe multum prodest, quod talia sustinet Dei servus : nam infideles & peccatores non tentat, quos securè jam possidet ; fideles autem & devotos variis modis tentat & vexat.

4. Perge ergo cum simplici & indubitata fide, & cum supplici reverentiâ ad Sacramentum accede ; & quidquid intelligere non vales, Deo omnipotenti securè committe. Non fallit te Deus ; fallitur qui sibi ipsi nimium credit. Graditur Deus cum simplicibus, revelat se humilibus, *dat intellectum parvulis* (Ps. cxviii, 130), aperit sensum puris mentibus, & abscondit gratiam curiosis & superbis. Ratio humana debilis est & falli potest, fides autem vera falli non potest.

5. Omnis ratio & naturalis investigatio fidem sequi debet, non præcedere nec infringere. Nam fides & amor ibi maximè præcellunt, & occultis modis in hoc sanctissimo & superexcellentiſſimo Sacramento operantur. Deus æternus & immensus infinitæque potentiae facit magna & inscruta-

LIBER IV. CAP. xviiij. 349

bilia in cœlo & in terrâ ; nec est investigatio mirabilium operum ejus. Si talia essent opera Dei ut faciliè ab humanâ ratione caperentur , non essent mirabilia nec ineffabilia dicenda.

Explicit Liber de Sacramento.





I N D E X

C A P I T U M.

LIBER PRIMUS.

Admonitiones ad spiritualem vitam utiles.

CAP. I. <i>De Imitatione Christi</i> , * & contemptu omnium vanitatum mundi.	Pag. 13
II. <i>De humili sentire sui ipsius.</i>	16
III. <i>De doctrinâ veritatis.</i>	18
IV. <i>De providentiâ in agendis.</i>	22
V. <i>De lectione sanctarum Scripturarum.</i>	23
VI. <i>De inordinatis affectionibus.</i>	24
VII. <i>De vanâ spe & elatione fugiendâ.</i>	25

* Quatuor hos libros ut quatuor Tractatus distinctos scripserat pius auctor : postea lectores, cœlestis doctrinæ periti, ipsos simul conjungendos esse judicârunt ; ac denique totum opus hâc primi capitis inscriptione, *De Imitatione Christi*, inscriptum est (*Huetiana*. pag. 48. *Desbillons*, *Disp.* § vij.)

INDEX CAPITUM. 351

VIII. <i>De cavendâ nimîâ familiaritate.</i>	27
IX. <i>De obedientiâ & subjectione.</i>	28
X. <i>De cavendâ superfluitate verborum.</i>	29
XI. <i>De pace acquirendâ, & zelo proficien-</i> <i>di.</i>	31
XII. <i>De utilitate adversitatis.</i>	34
XIII. <i>De tentationibus resistendis.</i>	35
XIV. <i>De temerario judicio vitando.</i>	39
XV. <i>De operibus ex caritate factis.</i>	41
XVI. <i>De sufferentiâ defectuum aliorum.</i>	43
XVII. <i>De monasticâ vitâ.</i>	45
XVIII. <i>De exemplis sanctorum Patrum.</i>	46
XIX. <i>De exercitiis boni Religiosi.</i>	49
XX. <i>De amore solitudinis & silentii.</i>	53
XXI. <i>De compunctione cordis.</i>	58
XXII. <i>De consideratione humanæ miseriæ.</i>	61
XXIII. <i>De meditatione mortis.</i>	66
XXIV. <i>De judicio, & pœnis peccatorum.</i>	71
XXV. <i>De ferventi emendatione totius vitæ</i> <i>nostræ.</i>	76



LIBER SECUNDUS.

Admonitiones ad interna trahentes.

C AP. I. <i>De internâ conversatione.</i>	83
II. <i>De humili submissione.</i>	88
III. <i>De bono pacifico homine.</i>	89
IV. <i>De purâ mente & simplici intentione.</i>	91
V. <i>De propriâ consideratione.</i>	93
VI. <i>De latitiâ bonæ conscientiæ.</i>	95
VII. <i>De amore JESU super omnia.</i>	97
VIII. <i>De familiari amicitia JESU.</i>	99
IX. <i>De carentiâ omnis solatii.</i>	202
X. <i>De gratitudine pro gratiâ Dei.</i>	107
XI. <i>De paucitate amatorum crucis JESU.</i>	110
XII. <i>De regiâ viâ sanctæ Crucis.</i>	113



LIBER TERTIUS.

De internâ consolatione.

- C**AP. I. *De internâ CHRISTI loquutione
ad animam fidelem.* 123
- II. *Quod veritas intus loquitur sine strepitu
verborum.* 125
- III. *Quod verba Dei cum humilitate sunt au-
dienda, & quod multi ea non ponderant.* 127
- IV. *Quod in veritate & humilitate coram Deo
conversandum est.* 131
- V. *De mirabili effectû divini amoris.* 134
- VI. *De probatione veri amatoris.* 138
- VII. *De occultandâ gratiâ sub humilitatis
custodiâ.* 141
- VIII. *De vili æstimatione sui ipsius in oculis
Dei.* 145
- IX. *Quod omnia ad Deum, sicut ad finem
ultimum, sunt referenda.* 147
- X. *Quod, spreto mundo, dulce est servire
Deo.* 149
- XI. *Quod desideria cordis examinanda sunt
& moderanda.* 152

354 INDEX

- XII.** *De informatione patientiæ, & luctamine
adversus concupiscentias.* 154
- XIII.** *De obedientiâ humilis subditi, ad exem-
plum JESU-CHRISTI.* 157
- XIV.** *De occultis Dei judiciis considerandis,
ne extollamur in bonis.* 159
- XV.** *Qualiter standum sit ac dicendum in omni
re desiderabili.* 161
- XVI.** *Quod verum solatium in solo Deo est
quærendum.* 164
- XVII.** *Quod omnis sollicitudo in Deo statuen-
da sit.* 166
- XVIII.** *Quod temporales miseriæ, exemplo
CHRISTI, æquanimiter sunt ferendæ.* 168
- XIX.** *De tolerantia injuriarum, & quis verus
patiens probetur.* 170
- XX.** *De confessione propriæ infirmitatis, &
hujus vitæ miseriis.* 173
- XXI.** *Quod in Deo super omnia bona & dona
requiescendum est,* 176
- XXII.** *De recordatione multiplicium benefi-
ciorum Dei.* 180
- XXIII.** *De quatuor magnam importantibus
pacem.* 184

CAPITUM. 355

- XXIV. *De evitatione curiosæ inquisitionis super alterius vitâ.* 187
- XXV. *In quibus vera pax cordis & verus profectus consistat.* 189
- XXVI. *De eminentiâ liberæ mentis, quam simplex oratio magis meretur quam lectio.* 191
- XXVII. *Quod privatus amor à summo bono maximè retardat.* 194
- XXVIII. *Contra linguas obtrectatorum.* 197
- XXIX. *Qualiter, instante tribulatione, Deus invocandus est & benedicendus.* 198
- XXX. *De divino petendo auxilio, & confidentiâ recuperandæ gratiæ.* 200
- XXXI. *De neglectu omnis creaturæ, ut Creator possit inveniri.* 204
- XXXII. *De abnegatione sui & abdicatione omnis cupiditatis.* 207
- XXXIII. *De instabilitate cordis, & de intentione finali ad Deum habendâ.* 209
- XXXIV. *Quod amanti sapit Deus super omnia & in omnibus.* 211
- XXXV. *Quod non est securitas à tentatione in hac vitâ.* 214
- XXXVI. *Contra vana hominum judicia.* 216

356 INDEX

- XXXVII. *De purâ & integrâ resignatione sui
ad obtinendam cordis libertatem.* 218
- XXXVIII. *De bono regimine in externis, &
recursu ad Deum in periculis.* 220
- XXXIX. *Quod homo non sit importunus in
negotiis.* 222
- XL. *Quod homo nihil boni ex se habet, & de
nullo gloriari potest.* 223
- XLI. *De contemptu omnis temporalis honoris.* 226
- XLII. *Quod pax non est ponenda in homini-
bus.* 227
- XLIII. *Contra vanam & sæcularem scientiam.* 229
- XLIV. *De non attrahendo sibi res exteriores.* 231
- XLV. *Quod omnibus non est credendum, &
de facili lapsu verborum.* 232
- XLVI. *De confidentiâ in Deo habendâ, quan-
do insurgunt verborum jacula.* 336
- XLVII. *Quod omnia gravia pro æternâ vitâ
sunt toleranda.* 239
- XLVIII. *De die æternitatis, & hujus vitæ
angustiis.* 242

CAPITUM. 357

- XLIX.** *De desiderio aeternæ vitæ , & quanta
sint certantibus bona promissa.* 246
- L.** *Qualiter homo desolatus se debet in manus
Dei offerre.* 251
- LI.** *Quod humilibus insistendum est operibus ,
quum deficitur à summis.* 256
- LII.** *Quod homo non reputet se consolatione
dignum , sed magis verberibus reum.* 257
- LIII.** *Quod gratia Dei non miscetur terrena
sapientibus.* 260
- LIV.** *De diversis motibus Naturæ & Gratiæ.*
262
- LV.** *De corruptione naturæ , & efficaciam gra-
tiæ divinæ.* 268
- LVI.** *Quod nos ipsos abnegare & CHRISTUM
imitari debemus per crucem.* 272
- LVII.** *Quod homo non sit nimis dejectus ,
quando in aliquos labitur defectus.* 275
- LVIII.** *De altioribus rebus & occultis judiciis
Dei non scrutandis.* 277
- LIX.** *Quod omnis spes & fiducia in solo Deo
est figenda.* 283



LIBER QUARTUS.

De Sacramento.

- D***evota exhortatio ad communionem.* 287
- CAP. I.** *Cum quantâ reverentiâ CHRISTUS sit suscipiendus.* 288
- II.** *Quod magna bonitas & caritas Dei in Sacramento homini exhibetur.* 296
- III.** *Quod utile sit sæpe communicare.* 300
- IV.** *Quod multa bona præstantur devotè communicantibus.* 303
- V.** *De dignitate Sacramenti, & statu sacerdotali.* 307
- VI.** *Interrogatio de exercitio ante communionem.* 310
- VII.** *De discussione propriæ conscientiæ, & emendationis proposito.* 311
- VIII.** *De oblatione CHRISTI in cruce, & propriâ resignatione.* 314
- IX.** *Quod nos & omnia nostra Deo debemus offerre, & pro omnibus orare.* 307
- X.** *Quod sacra communio de facili non est relinquenda.* 320

C A P I T U M. 359

- XI. *Quod corpus CHRISTI & sacra Scriptura
maximè sint animæ fidei necessaria.* 324
- XII. *Quod magnâ diligentia se debeat com-
municaturus CHRISTO præparare.* 330
- XIII. *Quod toto corde anima devota CHRISTI
unionem in Sacramento affectare debet.* 333
- XIV. *De quorundam devotorum ardenti desi-
derio ad corpus CHRISTI.* 335
- XV. *Quod gratia devotionis humilitate & sui
ipsius abnegatione acquiritur.* 338
- XVI. *Quod necessitates nostras CHRISTO
aperire & ejus gratiam postulare debemus.*
341
- XVII. *De ardenti amore & vehementi affectu
suscipiendi CHRISTUM.* 343
- XVIII. *Quod homo non sit curiosus scrutator
Sacramenti, sed humilis imitator CHRISTI,
subdendo sensum suum sacra fidei.* 346

F I N I S,

L'Approbation & le Privilège, se trouvent à la fin
de la Traduction françoise.

